


玉
笥
集



成集書叢

編初

者編主
五雲王

行發館書印務商



玉 笥 集



3 0646 3284 1

張 憲 撰

本館據粵雅堂叢
書本排印初編各
叢書僅有此本

原序

予嘗於岳武穆王精忠錄。閱先輩張思廉所作詩歌。其辭氣抑揚感激。所以爲王自處。而表其忠烈者。曲盡無遺。意其爲人。必慷慨瓌特。以忠義自許。非可以一詩人目之也。惜未觀其全集。以究其蘊。迺者常山丞前侍御黃君玉輝。發其尊府僉憲嘿菴先生所藏思廉玉笥集一帙。將繡梓以傳。託同年僉憲高公汝賢屬予序。因得遍閱之。其詠史。非徒詳其事實。且寓褒貶鑑戒之意。其琴操樂府五言。及近體諸作。通暢俊爽。森嚴壯麗。如入羣玉之府。琳琅瓊瑤。粲然照目。如閱武庫之兵。戈矛交戟。雜然陳列。誠非苟作者。於是益重其人焉。蓋思廉當元季擾攘之秋。嘗仕爲帥府參謀。與僚案議不合。罷去。志不獲伸。才不克售。傷時感物。而洩其悲憤於詩者如是。使其生當熙皞之世。所以咏歌秦平之化。當何如哉。嗟乎。聖人刪詩三百篇。其美其刺。存乎勸戒。下至楚騷。比物興言。雖過乎怨。其感人亦至矣。漢魏而唐。作者不一。獨杜子美之詩。謂之詩史。以其忠君愛國之誠懇也。思廉其殆欲追逐古作者與。考其所交。若鐵崖楊君。伯雨張君。輩皆一時能言之士。其所得。固有自哉。夫詩運於精神心術之微。勤一世以盡心。而不得以詩鳴者。多矣。間有鳴者。不幸不見收錄於賢人君子。往往湮沒無聞者。何可勝數。獨思廉之詩。晦於前而顯於今。吾又幸其有遺乎。僉憲先生。昔以遠學宿德。提學於吾江右。造就士類甚衆。玉輝能世其業。立朝佐邑。皆有聲。

茲又承其先志。不沒人善。以嘉惠後學。可謂濟美者矣。故爲序之不辭。思廉名憲。會稽山陰人。其居有玉笥山。自號玉笥山人。因以名其集云。成化五年春三月。旣望。賜進士出身。中憲大夫。浙江等處提刑按察司副使。奉勅提督學校。安成劉鈺序。

玉笥集卷一

詠史

黃金臺

黃金臺高且堅。三十六層凌紫煙。上不貯妓女。下不列管絃。鳳簫鸞曲匪求偶。銅盤露掌非希仙。高城不築太師塢。黃屋肯飾吳王椽。但欲強兵富國來。英賢上雪父母仇。下洗黎庶冤。黃金萬斤光燭天。曰鄒曰劇相後先。樂生往兮重燕權。燕鼎復兮齊鼎遷。變雌冀兮爲雄燕。嗚呼。火牛觸。燕師鉏。樂生去兮燕土蹙。黃金臺荒狐兔伏。昭王地下精靈哭。

屠隱行

聶屠隱。軹井里。朱屠隱。大梁市。軹井匕首尺有咫。白日殺人報知己。梁市金椎四十斤。拔趙功成耀青史。兩屠義勇勇不同。金椎匕首分雌雄。丈夫一死秦山重。匕首胡爲成小用。丈夫一死鴻毛輕。聶屠之死。不若朱屠生。

荆卿歎

元

張



白虹貫赤日。易水生淒風。燕人盡悲憤。相送冀城中。筑聲何慘慄。歌意哀無窮。豈不念卽往。立搥羸政胸。徘徊有所待。匪畏秦帝雄。自恨劍術疎。未易了君事。秣馬膏吾車。我客久不至。奈何遽相促。苦未知人意。丈夫重然諾。斷臂死不辭。但憐樊將軍。九泉終見疑。咄彼死灰兒。曷足同等夷。

安期生

吾聞安期生。賣藥阜亭東。時人不識其始末。見者但呼千歲翁。嗟嗟秦皇帝。仗劍掃六合。富貴亦已極。猶欲事吐納。琅琊臺上三月留。三晝三夜語不休。黃金白璧賜千萬。阜亭棄置無人收。空留赤玉鳥。報以後會期。蓬萊渺茫不知處。童男卯女無歸時。鮑魚風腥不忍嗅。金棺玉匣萬古埋。僵屍悲無窮。可奈何。豈如安期者。海上騎青驪。黃金化丹砂。赤棗大如瓜。遨遊宇宙間。天地以爲家。

勝廣

秦帝掃關東。六王家業空。典墳俱燬滅。兵器盡銷鎔。勝廣起田畝。一呼天下同。雖然不成事。亦足號英雄。

秦鹿行

望夷宮中養秦鹿。百二山河春草綠。穿花尙作呦呦鳴。寧識外人須爾肉。李斯父子牽黃犬。上蔡東門志何淺。血污雲陽腰。頰紅狡兔縱肥能幾樹。闔高貌。輒心跡露。稱馬獻君君不悟。羣臣相視莫敢非。只恐出言丞相怒。丞相怒。秦祚移。函谷不守秦鹿馳。高材疾足爭逐之。項王叱咤起。烏騅日千里。逐之不得不肯。

止人疲馬困烏江死。沛公隱芒碭。手劍三尺長。網羅一舉圍咸陽。扼其角。剝其腸。食肉寢皮傳後王。秦鹿死。走狗烹。後人不用悲韓彭。帝王神器匪力爭。炎炎火德多洪福。前有高皇後文叔。回首平靈莽卓生。漢業亦同蕉下鹿。

滄海君

漸離筑中鉛作水。荆卿臂落圖窮匕。鮑魚風起鸞車腥。不待明年祖龍死。赤帝子。滄海君。劍三尺。椎百斤。千金胡爲輕報秦。英雄不進圯橋履。亦作秦皇刀下鬼。

鴻門會

雲成龍。氣成虎。椎鼓撞鐘宴真主。披帷壯士髮指冠。側盾當筵請公舞。白髮老臣心獨苦。玉玦三看君不語。五星東井夜聯珠。天狗機槍落如雨。鴻溝咫尺接鴻門。千里神騅一夜奔。君不見龍泉影裏重瞳瞽。玉斗聲中五體分。

垓下歌

力拔山兮、舉世稱雄。願指諸侯兮、孰與君王。一戰不遂兮、胡爲自傷。江東雖小兮、勝負何常。努力君王兮、頭渡江。賤妾請死兮、先就劍芒。

淮陰侯

勇略震人主。奇功蓋天下。持此求令終。全身古來寡。淮陰將之傑。用智如炙輶。不忍衣食恩。甘爲轅下馬。重兵在掌握。茅土復求假。不悟齊巫言。終然三族赭。跳梁駒馮駕。覆鍾金躍冶。旣匪跋扈雄。大權宜蚤捨。忠逆無定見。身敗慘裂瓦。所以赤松遊。浮榮真土苴。

旦春詞

子爲王母爲囚。赭我衣。髡我頭。終日春。今不死不得休。東望邯鄲兮漳水流。使誰報汝兮終無由。憶君王兮解安劉。不能遠慮兮爲妾謀。彼四老兮君何求。

朱虛侯行酒歌

長樂宮中女天子。盛設賓筵懽戚里。百官侍坐莫敢違。諸呂喧闐笑聲起。御史中丞不糾儀。叔孫制作成。虛禮。朱虛奉勅起行觴。手提三尺昆吾鋼。田歌聲振野雞伏。頸血光寒漢道昌。

悲吳王

悲吳王。悲吳王。後此五十年。亂起東南方。天下旣一家。骨肉毋自傷。胡爲鑄金幣。聚餼糧。招亡命。修甲兵。几杖不復朝。西京博局之恨竟不置。反相之語奚獨忘。悲吾王。白髮種種心何長。旣不能入武關。扼咸陽。又不能據武庫。食敖倉。淹纏梁楚真自敗。雖死東越非天亡。君不見下密老人首生角。哀哉七王何不覺。

廣川王愁莫愁曲

愁莫愁。死卽休。鉛灌口。刀灼眸。托灰煮屍劍擊頭。愁莫愁。永巷春深作繫囚。愁莫愁。老嫗哭。使者來窮詔。獄徒上庸伏顯戮。雪我無辜人十六。

賈卜翁

三月長安道。雨過街樹綠。下有賈卜翁。危坐營握粟。舉口講仁義。旋式推禍福。不學賈大夫。憂來方賦鵠。

巫蠱使

禪櫬步搖冠。曲裾紗縠衣。偉哉燕趙士。借問此爲誰。謁帝登大堂。利口興禍階。能令親父子。恩愛一朝乖。血濺長安城。屍橫泉鳩里。雖族佞臣家。不益儲君死。望思思不歸。至今天下悲。請聽三老議。兒罪只當笞。

董君行

長安三月春如畫。賣珠兒騎公主馬。青年十九桃花顏。挾彈垂鞭花影下。蟬翼輕盈垂鬢旁。傅鞵綠幘紅絲韁。黃金百斤壽上客。彩段千端貽後房。長門園作行宮立。董君貴寵傾堂邑。掖庭撥賜買筵錢。御駕親臨百官集。煮豹屠麟考鼓鐘。宰人蔽膝如花紅。東廂未下膳。夫拜南面先傳謁。主翁主翁極尊榮。上殿不呼名。北宮夜鬪狗。平樂晝調鷹。入侍帝姑寢。出從人主行。生同歡樂死同塋。君不見三斬罪名加弄子。陸戟先生幾欲死。

霍將軍

熒惑守心星。鷓鴣叫庭樹。車騎聲憑陵。夢寐來相捕。赫赫奕奕豪。君觸君王怒。屏子不早誅。悍妻尤可惡。禍萌在驂乘。惡貫起投附。茂陵休上書。徒薪非不悟。何事麒麟樓。猶圖博陸侯。

月支王頭杯歌

朔風凍合諾真水。東方寒日曠曠起。白馬初腥徑路刀。一尺留犁攪金匕。穹廬側坐呼韓邪。谷蠡撫掌賢王歌。割牲飲血定約束。酒器高擎天驕窩。頂平額深如白玉。月窟日庭糟透骨。刃痕截斷伏犀根。疑是晉陽劊智伯。金蓮鑿落玻璃盃。銀稜闔葉車渠魁。葡萄未捫小馬潼。桃花先染真珠醅。老上單于遺手澤。誰問戎王包馬革。堯街不鏤邳支頭。將謂漢家輕首馘。陳湯血戰未封侯。張猛韓昌何足貴。

上元夫人詞

七月七日夜。王母降漢宮。上元何夫人。儀衛略與同。頭作三角髻。年可二十餘。身著青霜袍。坐擁紫霞車。九雲夜光冠。六山火玉佩。斂袂登殿堦。進向王母拜。王母坐止之。呼與共良會。翩翩三青鳥。飛來綠窗歇。口銜七蟠桃。甘脆勝冰雪。劉郎非仙器。內慾未斷絕。懷核欲種之。開花待桃結。一桃九千年。徒爾糜歲月。上仙噫然笑。忽逐綵雲滅。

託孤行

河間有異女。其氣上成雲。望氣往求之。乃得拳夫人。夫人雙握固。見帝卽披伸。生子鉤弋宮。立名堯母門。

一朝忽被譴。割愛非無恩。子少母且壯。亂階人所聞。君王願大計。牽去不容存。拓跋躡遺範。胡姬埋禍根。司馬受寄託。弱兒終被吞。乃知宣室畫。僅有霍將軍。

燕燕吟

燕燕在昭陽。昭陽勝未央。黃金塗地限。白玉護椒房。燕燕情無已。專寵恩無比。啄死漢皇孫。占斷張公子。
名放。富平侯。哀哀許美人。戚戚曹宮使。綠綈方底赫。蹠書赫蹠。薄小紙也。天道好還須記取。

折檻行

師傅不言事。國柄歸五侯。賢哉槐里令。抗疏謁宸旒。願請上方劍。先斷佞臣頭。狂直不畏死。甘心地下遊。大呼攀殿檻。壯氣驚千秋。御史將雲去。將軍拜不休。君王意亦解。折檻不容修。表表直臣節。漢廷無與儔。

東門行

東都門外今古稀。東宮二傅同日歸。百官祖道設供帳。勅賜黃金作酒貲。歸來日日會親友。盡賣賜金買醇酒。白頭剛傅蕭望之也。空勞勞。一杯鳩羽不就獄。博得君王祠少牢。

董舍人

董賢帝寵之哀。

蓮箭銅壺催日晷。舍人走報天顏喜。日驂鸞駕共相憑。夜直龍牀同臥起。雙闕累豎立冢壘。洞房重殿營軒楹。珠襦玉匣賜祕器。錦闌綈檻塗丹青。金翦落衣龍袖斷。黃腸剝柏御棺成。合門貴寵專天眷。內廷嚴

上麒麟殿元舅徒爭城邑封。天子已師堯舜禪。古來喪邦由女色。籍閣韓鄧多男德。司馬何為位獨尊。曼
 柔便辟能傾國。王莽白髮大師躬拜塵。孔光病免中郎堅避姻。中郎嘗為子求戚女。戚也賢父恭
 入園扉裏漢業潛移王巨君。巨君為元帝后。王賀女 羸屍未

聖女謠

陰為陽雄天道否。元城郭東君莫語。繡衣御史活千人。王賀火土相乘生聖女。六百四十又五年。漢家大
 業歸齊田。夢中誰報滿輪月。尤物禍人天使然。翁孺諸子多女德。丙殿目成意相得。畫堂良夜太孫生。兄
 弟五人俱食邑。日月無光黃霧昏。諫書終莫奪天恩。兵權國柄遞相襲。四世母儀培禍根。黃耆龍鍾容色
 槁。銅壁鬼符夸壽考。黑貂徒守舊家風。太后令官屬黑貂白玉已虧傳國寶。君不見持詔籌行囊。楫析關踰
 牆走不休。君如不信西王母。試看門樞亦白頭。

昆陽行

天囚行屍聚蜂螳。新市平林健兒起。白水真人應讖文。春陵子弟持弓矢。切雲高冠爛錦袍。朱旗白馬青
 龍刀。漢官威儀喜復見。下視赤眉銅馬紛騰逃。長驅宛鄧摧枯葉。夜火軍書連奏捷。八千驍果獨磨鋒。誰
 道將軍平日怯。司徒司空雙將兵。百里晴雷鼓聲。長人壘尉不護壘。四十萬人同日崩。昆陽城濠水流
 血。六十三家謀議拙。象犀瞑目虎豹蹲。疾雨狂風天降孽。司徒受首司空奔。長安四面兵雲屯。承明殿裏

自避火。敬法闕前誰斧門。君不見。啗鮪魚。讀兵書。漸臺勢促將何如。天符金櫃不復驗。哆口蹙頰終就誅。紺約之衣虞舜七。按圖旋席猶逃死。七珠斗柄不掩身。劉秀明年作天子。

井底蛙 公孫述

清水令井底蛙。鸞旗旄騎稱警蹕。垂旒佩玉登龍車。不知天下本一家。雌雄未決胡矜夸。井底蛙井中小。堂堂東帝天日表。南廡岸幘彼何心。都布單衣笑君狡。君不見故人共臥嚴子陵。一夜客星侵帝星。何嘗解作木偶形。

強項令 董宣

夏門亭東數公主。格殺蒼頭如殺螳。一言回天天亦喜。縱奴殺人何以理。擊頭流血臣所甘。俯首頓地臣所恥。賜錢三十萬。分須不私已。強項縣令今豈無。不遇明君空篋死。

跋扈 梁冀

乘氏忠侯骸未冷。癡兒遽起專宮省。使者彈章十五條。極惡猶遭進湯餅。夏門亭外迎鸞車。常侍私謀定蠡吾。寃刑誰復掾李杜。公議徒然唾趙胡。將軍權勢迷天日。天富淫人天益疾。白鶴書生獻佞詞。絳帳名儒纔掌筆。長史忠言若不聞。故吏諫書何足云。佩刀夜落議郎省。日食明誅言事臣。埤犢獄冠異巾服。彈碁挽滿俱精熟。兔園羽蓋鼓吹喧。喚起花奴陪蹋踘。連房奧室相對街。飄飄雲氣如蓬萊。黃金白玉充藏。

室門外車聲聒旱雷。土山千里九折坂。臂鷹走馬歸來晚。誰盜千金十斛珠。坐使良民喪貨產。守藏婢。監宅奴。奴何幸。婢何辜。羽林奪劍不論罪。歲餘又贖張尚書。口吟舌剩積惡。豺目鳶肩不道誅。君不見墮馬髻。折腰步。愁眉。一旦溼啼妝。蓋世榮華逐飛絮。七君三后六貴人。將校尹卿同日仆。家財三十萬萬充王府。為謝皇家戚里賢。勿效將軍懷跋扈。

黨錮獄 漢桓帝延熹九年。殺成瑨等并黨人。

黃門貂璫。乃專殺生。內幹心符。外典政刑。樹立鬻發。傾陷忠貞。牢修一紙。四海俱驚。使者四出。逮捕縱橫。囊頭五木。拷掠笞榜。詔獄慘酷。有冤誰聲。賢哉賈長。奮袂西行。網羅解張。大禍底寧。云胡諸公。既哲且明。不晦其光。尚貪美名。卒蹈大戾。自殞厥生。乃有君子。龍蛇潛伏。匪惠匪夷。靡榮靡辱。不近軒冕。不罹極楛。茂樹鬱盤。爰托我屋。

誅宦官 漢靈帝建寧元年。太傅陳蕃等。奏誅宦者曹節等。不果。俱被害。

太白入房。天示傲。上相上公。俱有眚。侍中已奏天官書。北寺獄詞。猶上請。五官令史發奏章。姦謀夜召王與張。尚書詔版出脅筆。一十七閣心計長。白頭老翁短才術。拔劍突門肆呼叱。門生官屬務相隨。誰解盡言箴。八失於乎。太傅死。將軍誅。洛陽都亭集血顛。宗親賓黨一日屠。朝廷大柄歸閹奴。胡為何國舅。中平元年。不肯鑑前車。又向嘉德殿前伏屬鏹。誅宦官良可乎。

• 何進誅宦張讓等
• 又不果。被害。

千里草謠董卓

青青千里草。荒瀰長安道。轡畫竿。摩車金花蓋。飛阜天子任廢置。公卿聽呼召。生殺擅大權。劫弑甚羣盜。築塢高埒城。埋金動盈窖。司徒展祕謀。義子奉密詔。逆屍不待燃。臍炷自堪照。乃知董公力。驅除付姦操。

一柄謠獻帝興平二年。郭汜。李傕。劫帝入其營。

一柄不雨雄。治兵日相攻。北營李劫萬乘。南岩郭質三公。祠鬼淫祠下。朝王葦箔中。上供牛骨臭。賜質馬錢空。夜火焚行殿。妖氛貫紫宮。鳴錐驚輦轂。飛矢射籬櫳。天子猶徒步。何人敢騎從。顛危策東澗。狼狽走新豐。皇極災頻煽。朝廷塵再蒙。誰能為此禍。宣義是元功。

大礪謠公孫瓚以此謠從鎮易。積穀休兵。以待天下之事。後袁紹攻敗。自焚死。

燕南陲。趙北際。中不合。大如礪。惟此中。可避世。移易鎮。築易京。廣積穀。多屯兵。閱世變。待時平。大柱折。隊道裂。樓櫓傾。骸骨爇。白馬義。從不自亡。誰為劉虞洗冤血。

梁父吟武侯成就關張。勝晏子殺三士多矣。故反其詞。

伏龍隱南陽。高臥久未起。不肯渡長江。焉能涉漳水。炎炎火絕卯。金刀巍巍土。王當塗。高種瓜。兒子不力戰。織履郎君無地逃。伏龍一起捍坤軸。雄據西南成鼎足。十年汗血戰元黃。五出王師爭九六。萬人之敵兩熊虎。百戰辛勤事行伍。河南河北謾稱雄。不得袁曹一丸土。伏龍纔起帝業新。千古君臣魚水親。遂使

真龍全羽翼。風雲成就二將軍。

南飛鳥曹操

南飛鳥尾畢逋。白頭啞啞將衆雛。渭河西岸逐野馬。破黃巾也白門東樓追赤兔。擒呂布也冀豚冀荆犬劉琮肉不飽。

展翼南飛向江表。江東林木多俊禽。不許南枝三匝遶。老鳥莫侮髻郎小。髻郎詎讓老鳥老。東風一炬鳥

尾焦。不使老鳥矜鬚爪。老鳥自謂足姦狡。豈信江湖多鷺鳥。摔鳥頭。啄鳥腦。不容老鳥棲樹枝。肯使蛟龍

戲池沼。赤壁之戰釋老鳥。未肯搏紫髯大耳先相攫。河東老羽雲外落。雲長死老鳥巢成哺銅雀。

合肥戰當陽坂。抗張遼。寧統諸將。不及飛遼矣。賦合肥戰。

合肥戰戰甚力。盪寇將軍持銳戟。甘寧紫髯郎君馬飛空。孫權江表虎臣俱辟易。君不見瞋目橫矛決死敵。張飛

百萬曹兵莫敢逼。止啼之威未為特。惜矣江東無益德。

縛虎行

白門樓下兵合圍。白門樓上伏虎威。戟尖不掉丈二尾。袍花已脫斑爛衣。摔虎腦。截虎爪。眼中視虎如貓

小。猛跳不越當塗高。血吻空腥千里草。養虎肉不飽。虎饑能噬人。縛虎繩不急。繩寬虎無親。座中叵信劉

將軍。先主不縱猛虎食漢賊。反殺猛虎生賊臣。食原食卓何足噴。

獵許行忠義

老髯古義勇。望蓋取顏良。況茲遊獵時。獵操如獵獐。桓桓劉將軍。度量符高皇。帝王討賊有大義。豈與蛛蠹爭小智。丈夫成敗皆聽天。利鈍兵家乃常事。髯郎勿用苦相尤。飄飄江渚吾何憂。

成子閣識 諸葛恪

越椒滅若敖。伯石喪羊舌。生子縱多才。禍福未可決。藍田產玉信佳兒。剛戾自用誰能醫。西朝大志不易繼。西朝。蜀也。格乃諸葛亮。繼。姪。欲繼其出師表之志。東關小勝何足奇。大臣未附主少國疑。呂侯有深戒。一事須十思。呂侯。戒曰。世方多難。出師表之志。東關小勝何足奇。大臣未附主少國疑。呂侯有深戒。一事須十思。諸葛恪子每事必十思。豈宜履敵庭。千里勞從師。新城一倒不自合。張特守新城。恪攻將陷。特給之曰。攻不下。遂歸來憤色將誰移。虹繞輿。犬銜衣。水腥血臭知不知。獨不聞童謠云。蘆葦單衣箠落。於何相求。

成子閣 費尙書郎將郭循刺之

尙書秉國樞。詎宜矜有餘。縱不愛身須愛國。富兒尙保千金軀。來敏棋。魏曹爽寇漢中。勃裨救之。來敏。詎裨別。求圍棋。裨無倦色。必能辨賊。公張嶷書。嶷嘗致書於裨。裨不從。故被害。嗟哉二子多良圖。尙書何不置之左右隅。西平之子何足誅。

夕陽亭 晉裴楷惡賈充。薦充督秦涼諸軍。充問計於荀勗。曰。辭之實難。獨結婚

百官供帳紛營營。夕陽亭西誰遠行。充問之子專鬪鉞。伏節萬里西南征。結婚一語聳天耳。既繫凶門行。

復止衛家五美空善評。姦謀仍落三豎子。君不見魯公怒攝項城軍。殘喘聊延衛府勳。枯木劍銘金屑酒。天刑猶脫廣成君。

玩鞭亭 晉王敦在姑熟。明帝出看敦督。敦夢覺。逐帝。帝以馬鞭與老姥。及追者至。問姥玩鞭。帝遂去。追不及。

饑鳥壓營營作聲。紅光紫電圍金鉞。黃鬚小龍馬上笑。白首饑豺夢裏驚。老奴怒擲珊瑚枕。追兵起合琉。璃井。巴馬東歸疾似風。道傍遺糞如冰冷。健兒空玩七寶鞭。荆臺老姥功誰傳。

孟參軍 孟嘉

孟嘉盛德士。而有敏贍才。觀其言動間。正順不可階。雖云善酣飲。亦不傷雅懷。以此得聲譽。何必狂與乖。

五湖長 桓元後僭號楚。被都護馮遷斬於枚回洲。傳首梟於大桁。

父為九州伯。兒作五湖長。父子共一轍。相繼猶影響。老奴首領幸爾全。豎子凶逆那可言。流芳本不願百世。遺臭竟能傳萬年。五湖長。晉之賊。總百揆。稱相國。封十郡。加九錫。坐南面。以負屐。竊神器。而改歷。司徒奉璽綬。萬乘讓宸極。永始建新元。僞楚承金德。百官勸進稱聖明。龍牀后土為之傾。草間英雄興甲兵。龍行虎步見者驚。天言欲俟關河平。行宮起居注未成。義兵已破潁陽城。漢中遁舟胡可到。回州短刃遙相迎。楚王楚帝幾日榮。血顛模糊梟大桁。

舉几行 南宋劉太子劭。弑其父義隆。兵入舍章殿。義隆舉几捍之。五指皆落。

含章殿前玉像毀。畫輪車發宮門起。逆刃鏗鏘五指紅。衛兵夢醒烏皮几。五州屯將不舉兵。無復人間有人理。裁弟事易裁兒難。謀及婦人何足歎。江芋漏言宮甲起。楚太子商臣。君王不記請熊蹯。

寢天師

天師元是嵩山生。挺身起繼張道陵。嵩高山頭遇老子。親手自傳圖籙經。北方真君開太平。天師亦出臣朝廷。平生不好莊老書。當時只賢崔司徒。奈何獨執弟子禮。膜拜甘作天師奴。上元靈命不可孤。牲牢玉帛走道途。重壇五層凌紫虛。日中會設千人廚。顯揚新法終何如。君不見司徒不救謗國誅。真人亦罹凶刃屠。平城道場成茂區。天宮靜輪何可誣。

高令公允。魏高允。為人文明。外柔順。崔浩嘗譏其乏矯矯風節。及浩得罪。聲嘶敗。街。必歷忠難而後見。允申釋是非。辭氣清辨。其矯矯者勝浩多矣。嘯。人固難以外貌識也。

珉球矯矯玉以璞兮。鴛駘矯矯驥踟躕兮。其終也璞者以琢。矯矯碌碌兮。又其甚也。踏者以服。矯矯斲斲兮。嗟人固不易知兮。非朝夕可能窺也。事固不可辨兮。必悠久而後見也。嗟乎。渤海芄芄兮。高公已而去者莫追兮。來者其誰。

魏孝靜別六宮歌齊高洋逼帝禪位。帝曰。推挹已久。謹當避遜。求入與六宮別。舉宮皆哭。

獻生不辰兮。身播國移。永作虞賓兮。命不復來。弊履遺簪兮。古人所思。況茲六宮兮。豈一嬪與妃。玉體其

可愛兮黃髮又奚可期。出雲龍門以悵望兮。固十步而九回。彼永言以見貽兮。淚浪浪其為誰。

梁簡文飲酒歌侯景執簡文。以絕衆望。使王偉等進酒。簡文知其將殺己。盡醉而寢。偉進土糞壓殺之。

龍為魚兮宗社移。位既禪兮公復何疑。此酒可盡兮飲不辭。卻手琵琶兮推手琵琶。四絃嘈雜兮聲急調悲。不圖為樂兮至於斯。

龍光殿梁湘東王釋繼立。號世祖孝元帝。一日嘗講老子於龍光殿。魏于謹入江陵執之。囚於烏縵之下。

赤氣干北斗。太陰犯天王。天道信可懲。人事關興亡。奈何龍光殿。戎服講老子。元談縱精緻。不救烏縵恥。介馬不習騎。死矣獨目兒。

胭脂井陳後主

胭脂井。瑪瑙鬢。琉璃欄。黃金轆轤銀繩寒。桃花小波下無底。雌龍古怨沈紅水。妖姬不作井中鬼。玉樹飛花落如雨。

鳩酒來隋煬帝

鳩酒來。鳩酒不來白練來。夜觀天象文。帝座疑有災。雍州破木不可作。龍船萬里浮龍骸。丹陽築宮事已晚。流珠堂下凶門開。佳城不受漆牀版。臭土竟污吳公臺。騎牛小兒空有意。李密龍鍾老父徒興哀。鳩酒來。白練冷。蕭娘不墮燕支井。玉掌空磨長短脛。三尺天戈全項領。

玉筍集卷二

詠史

太子建成良馬駒行

昭陵六馬平羣雄。良駒西來歸春宮。春宮飽養叱肥臍。豈識天策上將人中龍。良駒豨豨善踞嚙。不逐秦鹿空三蹶。不學拳毛騶。美良川下追金剛。不學什伐赤。虎牢關前擒夏王。隨風逐電日千里。百戰驟馳無與當。青驪拔箭吻帶血。黃驃突圍毛裏瘡。玉驄露紫競神俊。畫圖想像猶龍驤。西府真龍正宸極。東宮華廢生荆棘。昭陵風雨夜聞嘶。六馬功成化爲石。良駒老去空伏櫪。

代魏徵田舍翁詞

並序

鐵崖楊先生以殺田舍翁爲文皇根心語。蓋徵好直諫。忤意者數矣。是必有弗堪其直者。故怒曰。會須殺此田舍翁。不覺其言之出口也。此則是也。然謂徵東宮臣節之虧。故爲太宗所薄。而呼爲田舍翁者。此則非也。始徵入關。無所知名。乃自請安集山東。招徠李勣。高祖授以洗馬。與王珪同僚。東宮者。官也。非臣事建成也。徵勸建成早除秦王者。是徵盡其職。非所以取憾於文皇也。文皇亦不以是憾徵也。建成死。高祖命東宮齊府官屬。盡聽秦王處分。則徵安得獨背敕旨而死。建成

之難乎。徵，天子之臣，非東宮私臣，其事太宗，不得謂之虧臣節也。故太宗謂長孫無忌曰：徵、珪，盡心所事，故我用之。長孫后亦曰：妾亟聞陛下稱重魏徵，不知其故。觀此則知太宗決不薄徵，決不薄徵，而有田舍翁之語，何也？蓋徵貌不逾中人，而舉止疎慢，則徵得舍田舍，其以此與。雖然，此語徵不知也。徵知，必有詞，使太宗果殺田舍翁，翁必乞一言而死，決不緘口就戮也。其以長孫后諫而意悅，亦以后言婉而有理，故曲從之。然其殺徵之意，未嘗不根於心也。他日疑其黨侯杜，怒其錄諫草，而徵已死，無所洩憤，故停叔玉婚，仆所撰碑也。嗚呼！徵幸而不在，若在，則恐不免爲忠臣矣。夫盧祖尙死於朝堂，張蘊古死於刑獄，李君羨死於圖讖，劉洎、張亮死於誣謗，孰謂太宗不忍於殺徵也。徵能入夢於太宗，而不能自明其事，故代田舍翁詞，補徵諫錄云。

臣本山東農臣，誠田舍翁。臣以隋末亂，出仕蒲山公。蒲山復諫自用，故臣言不用。臣計不從，百萬糧，一日盡，百萬衆，一夕空。力屈事去，歸山東。臣義不忍棄故主，事仇充，相隨西安朝真龍。先帝不臣識，大臣不臣通。故臣上書自請安山東，山東歸皇圖，授臣洗馬之職，在東宮。東宮多不德，兄弟不相容。臣教太子翦黑闥，親元戎，又教太子除陛下。太子不臣庸，太子旣死，先帝命臣聽陛下處分。臣安敢效匹夫小諒，自與逆黨同。陛下以臣盡心所事，赦臣死罪，除臣祕書，登臣政府爵位。崇臣於是感激，時時進諫。開皇喪，陛下幸而時聽臣言，以致四海太平，年穀豐，使陛下功德及堯舜，則臣心喜。小有過失，則臣心沖。是以不四年中。

而有三代風。陛下初年誠心聽諫。故天耳聰。今聽諫不逮昔。故天耳聾。往以未治爲憂。故人心悅。今以既治爲安。故威德隆。往日用臣言。賜臣以黃金。璽天廡。聽輟殿材。構臣屋與墉。今日以人言。仆臣墓碑。停臣子婚。爲惠胡不終。喜臣則謂臣嫵媚。惡臣則謂臣田舍翁。陛下不宜以喜怒毀譽損厥躬。臣薦侯與杜。謂其才略雄。臣豈阿黨。預知其終凶。臣錄諫疏草。前後三百封。欲使後世知陛下能聽諫。致時雍。豈欲賣直歸過爲己功。避嫌焚草。徒足恭。臣幸而身先朝露。使臣不幸。恐不免隨比干。似龍逢。獨不記臣言良與忠。胡爲乎會須殺此田舍翁。田舍翁豈畏死。但惜陛下既殺張亮。又誅劉洎。翦刈大臣。如刈蓬。臣不願陛下祠少牢。立仆石。但願陛下養氣質。除內訌。毋以喜怒存諸胸。大臣無災。帝德穹。社稷無虞。王業鴻。千秋萬歲。爲唐宗。老臣不諱田舍翁。於乎老臣不諱田舍翁。

武氏之譏。太宗欲盡殺宮中疑似者。而才人在側。不疑也。豈非蔽於色與。武氏
榻馬詞。又能以柔言令色事帝。帝故不疑之。榻馬之言。天誘其衷。使之自錄。芒角。千載
之下。使人聽其言。猶凜凜有英雄氣。其志必不減高歡也。而帝不悟。且壯之。呼何
物女子如此勇健之語。徒能發之於李君美。甚矣。驛色之蔽人也。文皇且不免。況維奴
乎。之儒者。

河東女兒年二九。欲取鐵榻榻馬首。雄心詎減賀六渾。何事君王不驚傲。獨不記女武主。在宮中。元機預泄。李淳風淫心濫殺五娘子。聲色蔽人無不聾。

聖母神皇祠

東風未燥昭陵土。感業尼稱天下母。天則唐室山河忽變周。李氏兒郎更姓武。洛水泱泱出寶圖。黃金爛爛鑄天樞。五王不入迎仙院。二豎能忘受命符。君不見漢家元后號文母。廟食從來姪祀姑。

匡復府

揚州都督開三府。十萬強兵猛如虎。駱生長檄魏生謀。大義精忠照千古。山東豪傑望旌旗。蓄縮江淮立伯基。莫指金陵圖王氣。石梁鴉噪觸骸悲。

桑條草

英英武媚娘。競行新樂章。洪音入周廟。誰復歌堂堂。若若桑條草。雅製勞奉常。女妖重疊起。兒婦繼姑嫜。公主賣美官。墨敕斜封長。昭容持大秤。榮辱隨低昂。點籌煩玉指。握槩穢椒房。功臣不脫死。天子亦罹殃。潞州別駕不發憤。神器遑能歸相王。

机上肉

机上肉。禍之胎。幽求先見孰與並。季昶獨斷真奇才。去草不去根。噬臍已無及。十死鐵券不逃刑。五部空王難久立。君不見曳竹槎。飲葛汁。漢陽白髮老不歸。瓊州碎骨人誰拾。机上肉。能幾宿。尙記漢家夷產祿。羽林大將蓄奇謀。三尺短刀門外伏。机上肉。終自毒。

玉真仙人詞

玉真何仙人。唐帝之愛女。願辭湯沐邑。削號去公主。頭戴九雲髻。身著六銖衣。甘居石寶洞。不戀繡羅幃。夜枕白雲宿。朝乘紫電飛。登天謁王母。渡海尋江姝。天鼓夜作響。玉池晝生肌。眼角有時方。童顏當世稀。乃知皇姑姊。不是壽王妃。

天寶詞

林甫官朝日。韓休罷相時。新臺初納婦。興慶又生兒。玉柵籠鸚鵡。金盤進荔枝。內前車馬亂。無地避諸姨。

雙廟詞

睢陽戰敗血飄杵。力屈猶思爲厲鬼。元元祠前哭一聲。朝食愛姬暮羅鼠。唐家宮殿秋草生。二十一陵如掌平。獨遺雙廟門前石。日有行人來繫牲。

神雞童

神雞童。解雞語。青年十三動人主。雞坊小兒五百人。指揮進退皆由女。雲華雕翠聳寶冠。白繡羅襦耀金縷。振木鐸。磨玉塵。率雙雄。分兩旅。導立羣雞皆有序。左雄巍冠滴紅藍。右雄彩翮翻花羽。短喙磨鐵吻。銅鉤礪銅距。怒頸刺蝟張。老拳雙鶴舉。強者昂藏弱者僂。龍顏一笑爲君傾。賜資金繒多如雨。劍尖跳竿頭舞。弄丸兒。走繩女。教坊百伎皆色沮。君不見千里東封隨輓輿。父死歸葬天恩殊。縣官具葬器。役夫挽喪車。乘傳洛陽道。走馬長安衢。奪情起復不暫置。明年會駕驪山隅。龍榮富貴世莫比。何必宋宗勤讀書。

大腹兒

應巫夜禱。輒犖山。淫光下燭。穹廬寒。柳城小兒不敢睡。四野惡聲啼狗肝。豬龍怒磔老梟腹。鱗甲粗疏頭角秃。婪酣大肚三百斤。偷得真龍半分福。平盧寶刀未發。劓范陽。氈帳先潛形。金雞口吐東北赦。青騾啼作西南聲。鳳凰池荒金鏡破。獬豸臺傾胡眼大。東風野鹿嚼楊花。白日妖狐登御座。華清玉甃湯作泉。洗兒果撒黃金錢。并刀剪綵十六幅。錦棚壓碎宮娥肩。象牀夜冷嬰兒哭。豬龍爪破金訶玉。香齏不痛荔枝漿。雄心已飽雞頭肉。長安天奪蜜口臣。銅頭鬼鼓漁陽塵。赤心一夜變胡腹。二十四郡都無人。潼關夜漏雞聲早。馬嵬坡下冰山倒。劍門西寄杜鵑巢。練帶玉環埋翠草。嘉山土門勤戰功。豬兒帳下屠豬龍。旄頭星落大腹破。机上鸞刀一尺紅。

偃月堂

丞相總朝綱。謀深偃月堂。腹中有長劍。不用夜遷牀。

射塔謠

南八男兒忠義腸。一死不負張睢陽。救兵不出嚼指傷。天翦射塔塔欲僵。男兒姓名千古香。柳碑自與長淮長。

陳濤斜

陳濤斜。四萬義兵焚牛車。東青坂。再戰南軍俱不返。兩書生。一琴客。敗軍蠹政誰之責。君不見閬州丹旆歸來晚。魚滄預定繼茲板。

白衣山人李泌

白衣者山人。黃衣者聖人。聖人起作中興主。山人出爲謀略臣。王師尙未誅安史。何事山人先納履。學仙本不爲長生。且向牝雞逃一死。黃瓜臺下黃瓜稀。黃衣復國青驛歸。飛龍廢使交鎖鑰。天下之事無可爲。白衣不復入京國。歸食衡陽三品食。竿頭飽啖懶瓊殘。留取遺謀匡代德。

李五父李輔國

靈武儲君奮潛邸。飛龍小兒乘勢起。大權世襲脫靴翁。從此門生視天子。閣佞職本黃門郎。抵用收權生禍殃。中宮狡計殺張后。西內禁兵遷上皇。李五父。唐之悖。天刑不正市曹誅。半夜盜兒偷首骨。門生不忍醜屍分。賜葬恩酬定策勳。

奴材郭子儀嘗言吾家之子。皆奴材也。

天子鸞家公。將軍鞭節度。汾陽五福人。莫如猶恨西平生。阿剌令公能以功名終。晉梁遺蔭生八雄。幸有曜兒稱孝謹。如晞如暉皆妄庸。郭家子。雖奴材。都虞候。戴頭來。尙書留後。轅門開。尙書若斷老兵首。郭家之子真奴材。

藍面鬼 虛杞

藍面鬼內狡獪。外愿慤。人言鬼姦邪。天子殊不覺。藍面鬼肆譏毀。二帝四王相次起。矯情雖蔽中興君。至論焉逃鬼谷子。中書令公獨先知。朔方節度由女死。忠貞不學先中丞。血面能令魯公舐。

新店民

新店民何不樂。歲豐穀稔可作權。吏格詔書恩不渥。九重深下民賤。咫尺天威情不展。幸因田獵及芻蕘。又不深謀思及遠。太陽苦被浮雲遮。何不謗木肺石開南牙。廣恩沛澤被天下。無時獨復光奇家。

桐葉歎

涇卒生奇變。狂奴夜犯宮。渭橋頻力戰。魯店冠元功。御史情雖切。先生志不同。掌心桐葉破。千古恨難窮。

樊段歎

倒印召追兵。拔笏擊賊首。表表段司農。忠壯古無有。草冊復仰藥。不如先斷手。何事樊太常。殺身且遺醜。舍生固不易。處死良獨難。但看安不安。偶因樊志喪。愈覺段心丹。

弔裴晉公

客散午橋莊。人空綠野堂。涼臺風罷扇。燠館月侵牀。慷慨平淮節。淒涼別墅觴。疇咨張國勢。誰爲整王綱。邁爽虛神觀。堅貞折棟梁。四朝全懿德。五子繼恩光。用舍關輕重。華夷仰聞望。皇程纔睥睨。牛李又跳踉。

鐫詆雖無害。浮沈大可傷。元和猶負謗。寶慶固難量。侃侃詞臣疏。勤勤諫苑章。聖心存眷顧。天意幸聰明。險矣非衣讖。危哉第五岡。腐儉鋒莫觸。關子舌尤長。元老雖云壽。星圖競不昌。可憐榮配享。無復坐巖廊。特旨探遺奏。殊恩敕護喪。營塋空有地。晉祀已無盂。朋黨終軒輊。藩臣竟頡頏。惟遺身後傳。功抗郭汾陽。

柿林院

永貞天子開東邸。書奕兩奴相表裏。問安一語動天衷。從此大權皆入己。牛家之女韋家郎。女專誥命郎。平章書奕兩奴雙翼長。書奴弄筆翰林院。奕奴索飯中書堂。可憐八司馬。一例投南荒。惜乎監國不早起。奕奴明年方賜死。

甘露行

甘露夜降金吾廳。石榴枝上明珠明。金吾將軍祥瑞奏。神策中尉恫疑生。壁衣風吹機不祕。赤梘兒郎眼中真。金輿決破紫累恩。丞相綠衫借堂吏。闔屍未臭鳳鳴山。節度頭落葉盤間。天殺二凶天假手。相公不必咎王璠。

封刀行

永平殿下飛金仙。洛陽白馬遍中原。臺城餓鬼死不悟。武德沙汰成徒然。會昌君相兩英傑。大索逃丁出空穴。精藍四萬盡歸官。天下僧尼俱長髮。盧龍節度封寶刀。不爲困藪容逋逃。郎中淺見不足錄。大中天

子真癡叔。妄生更改。復浮屠。不記長安窟室通李吳。

餞梁王

壽春殿。延喜樓。梁王欲歸天子留。樓前百戲排倡優。百官陪宴酬未休。梁王上馬樓上頭。梁王東歸天子愁。天子愁。梁王喜。鷓鴣暗移傳國璽。碭山王氣瓏璚起。皇后捧金卮。天子歌柳枝。家亡國破無多時。讀此

王鐵鎗

朱晃帝中國人。皆盜賊之。沙陀起並世。勢力相扶持。血戰長河間。六年筋力疲。兵威日益弱。國勢日益痿。儒將外召侮。奸臣內生欺。將軍食其祿。報主死不辭。願以一鎗勇。往濟社稷危。慷慨吐雄略。發憤親戎師。夜火焚河梁。敵人俱紛披。南城竟不守。果速稱神奇。藐視太原孽。聲聲呼小兒。良猷未及展。庸君先見疑。左右盡側目。逐之惟恐遲。竟奪虎熊旅。付彼河上癡。卒畀保鑾隊。殉君忠壯屍。丈夫頭可斷。豹死固留皮。雖曰置身錯。大節終不墮。蕭條滑州寺。遺像父老思。禍亂五十年。置君如奕棋。爲臣死國難。此義無人知。五朝八易姓。主死臣不悲。不意武夫中。有臣能若斯。豈無長樂老。爵位榮一時。縱保兔園冊。至今天下嗤。

李天下

沙陀一夜鴉兒死。夾寨堤邊黃霧起。三枝誓箭挂馬鞍。誓與先王刷遺恥。六年河上幾辛苦。纔得河南一

丸土。盧龍悖子雖剖心。耶律羶夷猶未虜。櫛風沐雨壯志荒。傅粉塗朱樂未央。癩鼻本爲太原孽。驕子都
化。邯鄲倡歌吳歛習。趙舞吹玉笙。擊花鼓。十萬貔貅介冑雄。三千粉黛煙花主。呼優名。李天下。龍顏輕批
面如赭。法刀不斬敬新磨。鏡破銅光解如瓦。魏州總管著柘黃。門高流矢生金瘡。劉尼不進銀瓶禮。鳳瑟
龍箏殉龍體。君不見鐵鎗將軍有先知。鬪雞咬犬呼小兒。

金牀兔

兔子上金牀。閉門作天子。日從日上生。竟促明年死。大鳥名鸞鷖。四目而三足。聲聲呼羅平。羅平赤公族。
碧楮降朱文。赤光耀金虺。本圖南越榮。翻作西江鬼。順天者昌逆天亡。南金越綾從多藏。八都副使拜尙
父。四世相承吳越王。羅平燭髓悲血光。

申伶兒

黃金鍾。眞珠酒。弟飲此兮千歲壽。眞珠酒。黃金鍾。兄分飲兮壽當與弟同。兄不飲兮弟愈恭。兄色變。弟心
疑。弟不追兮兄無辭。申伶兒。起合雙金卮。一飲漬腦死莫醫。死莫醫。置不知。願全紫荆樹。莫忘棠棣詩。

陳橋行

唐宮夜祝逸佶烈。憂民一念通天闕。帝星下射甲馬營。紫霧紅光掩明月。殿前點檢作天子。方頤大口空
誅死。重光相盪兩金烏。十幅黃旗上龍體。中書相公掌穿爪。不死不忍祕鴻寶。畫瓠學士獨先幾。禪授雄

文袖中草君不見五十三年血載塗。五家八姓相吞屠。陳橋亂卒不擁馬。撫掌先生肯墜屣。

金櫃書

約誓書金櫃藏。不鑑柴家幼兒祚不長。弟兄子姪相繼作。書記署名傳晉王。金櫃書藏禍府。肘腋奇凶起。慈母深宮燭影夜無人。漏下嚴更天四鼓。寡婦孤兒不敢啼。截地有聲金柱斧。太平天子著龍衣。定策元勳不敢非。藝祖有靈君莫急。朱牌金字火羊飛。

澶淵行

鐵馬遼軍飲河水。三關要地平如砥。諸城閉壘百僚驚。西幸東巡議蠶起。相公峙立不動搖。忠肝義膽凌雲霄。親征雄謀出獨斷。孤注一擲先得梟。澶淵城上黃旗入。萬歲聲中河水立。神弧半夜發牀機。天殺蕃酋蕃母泣。蕃兒進退兩成禽。可惜君王不追襲。不追襲。失天賜。銀幣年年勞奉使。冠履從茲顛倒置。君不見主和至尊多善柔。懶將一矢射岐溝。歲輸二十萬匹絹。不博遼兵一顆頭。

瑤華后 郭氏

君不見明道時。美人爭寵皇后危。外廷議起呂丞相。內殿釁結閹都知。爪痕龍頰有實迹。賜號猶得稱仙師。美人之寵尋亦衰。又不見紹聖中。婕妤凌后禮不恭。用事擠挑郝內侍。順旨迎合章相公。妄興魘魅卒無驗。詔獄慘酷冤血紅。婕妤正位名號崇。瑤華兩后轍迹同。郭后不歸。孟后生還宮。天刑不殺侍醫賊。地

下仁皇愧哲宗。

哀熙寧

熙寧天子仁如堯。熙寧相臣奸如梟。王荆公心管商。口蘊皋。朝保甲兮暮青苗。三司條例紛牛毛。祖宗制度皆動搖。百年流毒毒不消。於乎仁皇有意安天下。悔不十年相司馬。南方聖人真土苴。

紹述謠

紹述復紹述。賢才一時出。壞盡祖宗基。遂得奸臣術。

悲靖康

悲靖康。一主戰。百議和。括金銀。搜馬騾。不將一矢射勁敵。奉使往來如走梭。青城車駕不復返。玉緝金支皆渡河。君不見幸使橋口六馬。原鈔本當有脫誤呼二酋話香火。

一網謠 李綱

一網舉。萬目張。建炎帝。開重光。首竄賣國牙。繼誅易姓王。募軍買馬事戰備。誓爲吾君復舊疆。忤汪黃。七十五日中書堂。奉祠已落張公章。嗟乎。一網去。萬目弛。敵馬長驅飲江水。張公督戰方未已。

岳鄂王歌

君不見南薰門。鐵爐步。神矛丈八舞長蛇。雙練銀光如雨注。又不見鐵浮屠。拐子馬。斫鏗鋼刀飛白霜。貫

陣背嵬紛解瓦。義旗所指人不驚。王師到處壺漿迎。兩河忠義望風附。襄鄧荆湖唾手寧。朱仙鎮上馬如
虎。百戰經營心獨苦。賜環竟壞迴天功。捲旆歸來臥樞府。錢塘宮殿春風輕。嬌兒安晏醉未醒。徒令功臣
三十六。舞女歌兒樂太平。虎頭將軍面如鐵。義膽忠肝向誰說。只將和議兩封書。往拭先皇目中血。將軍
將軍通軍術。君命不受未爲失。大夫出疆事從權。鐵馬長驅功可必。功成解甲面赤墀。拜表謝罪死不遲。
惜哉忠義重山岳。智不及此良可悲。嗚呼肆讒言。加毒手中王。心循王口。斬王湖上乘驢走。五國城頭帝
鬼啼。殷勤相酌平安酒。

悲建紹

張都督。殺曲端。關中斷右腕。中興天子無相干。秦丞相。陷岳飛。江左長城墮。中興天子知不知。鐵象馬。精
忠旗。羅索望風走。烏珠搵淚歸。旗折馬斃事可悲。君不見竄李綱。死宗澤。可憐建紹同轍迹。中興中興良
可惜。

冷山使 洪皓

冷山使者蘇武流。仗節不畏敵人囚。冷山八月雪成丈。四月五月猶氍毹。土人畏寒不敢出。使者甘居十
五秋。戎王聚落不滿百。土廬氍毹帳風蕭索。採薪乞食教兒童。嚼雪嚼氍籌漢策。歸來館閣席未溫。一斥南
荒九年謫。天之報公何偏側。君不見兩樞相。一侍臣。天之報公不在身。

韓太師

黃袍飛著嘉王體。閣門知事從龍起。經筵侍講戲倡優。定策宗臣趙汝恩。永州死。諫司臺憲鷹犬多。擗忠正收讒阿。何劉胡沈奮牙爪。五十九賢投網羅。北珠冠子高一尺。十四夫人分寵席。行燈午夜闌元宵。京尹師舉明朝轉恩澤。地衣紅錦齊中堂。真珠搭當生明光。大臣排列賀生旦。進奏文移行四方。太師權重專天眷。邊釁胡爲起征戰。威行宮省勢如山。一日惡盈翻局面。玉津園裏悲風生。日色慘慘天冥冥。中軍統制權車轂。密旨一語加天刑。殺韓侂胄天殺權姦天假手。何事斲棺遠函首。君王不復三世讎。地下權姦堪藉口。

咸淳師相買似道

咸淳師相專軍國。堂吏館賓供羽翼。諸司百職聽使令。臺諫承顏言路塞。輪舟五日一入朝。湖山佳處多逍遙。諛言佞語頌公德。邊事軍聲聽寂寥。半閑堂連多寶閣。歌姬舞妓相懽樂。十年國勢盡傾摧。猶謂師臣堪付託。師臣師臣躬督兵。珠金沙頭鑼一聲。十三萬人齊解甲。寡婦孤兒俱北行。君不見黯淡溪流東復東。木棉花開生悲風。師臣不忍馬革裹。廁上有人能拉胸。

從容堂詞江萬里

朔風翻大江。吹仆碧油幢。儒將爭投款。奸臣竊去邦。從容堂上鬼。節義獨成雙。更有熊湘閣。全家死不降。

厓山行

三宮銜璧國步絕。燭天炎火隨風滅。間關海道續螢光。力戰厓山猶一決。午潮樂作兵合圍。一字舟崩遂不支。檣旗倒仆百官散。十萬健兒浮血屍。皇天不遺一塊肉。一瓣香焚海舟覆。猶有孤臣臥小樓。南面從容就刑戮。

玉笥集卷三

古樂府

古有所思行

我思古之人兮不可從。乃在黃土之底。青編之中。青編幾帙。載名姓。黃土萬冢埋英雄。重泉黯黯隔白日。宰木颯颯生悲風。我雖有言誰爲通。皇天不肯惜人物。百年轉眼如飄蓬。秦皇漢武氣餒蓋一世。彭殤邱跖俱成空。黃帝升鼎湖。橋山葬遺弓。虞舜死九疑。鑾輿不還宮。明王聖主只如此。紛紛二子直螻蟻。二女泣兮湘竹斑。羣臣歸兮弓劍閒。弔古昔兮望遠。見江上之青山。白玉槨。黃金棺。千年滯魄生辛酸。功名震主亦閒事。不若樽前且破顏。

從軍行

從軍天目山。走馬臨安道。雖不著戰士。鐵鎖袍。亦載趙公渾脫帽。金鼓震四野。秋風吹三關。將軍不尙殺。士卒何時還。白露下青草。高樓多怨思。杵聲空入夢。誰解送征衣。三軍糧食盡。將士衣裘暖。女且拾橡栗。我欲醉絃管。楚王挾纊。越子投醪。同功共事。均苦分勞。入參謀議。出事弓馬。黃石之言。聽者蓋寡。

雉子斑曲

雉子斑。曲雙起。錦膺繡頸斑。爛尾十步一啄粟。百步一飲水。雌逐雄飛。雄隨雌逝。不願拘繫生。寧求野鬪死。野鷹昨夜下蒿藜。搦雄飛去雌獨歸。雉子斑。忍分離。辟邪伎作鼓吹悲。

行路難

行路難。前有黃河之水。後有太行之山。車聲宛轉羊腸坂。馬足踉蹌人頭關。白日叫虎豹。腥風啼狗獾。拔劍顧四野。使我摧心肝。東歸旣無家。西去何時還。行路難。重咨嗟。乞食淮陰市。報仇博浪沙。一劍不養身。千金徒破家。古來未際皆紛拏。行路難。多歧路。馬援不受井蛙囚。范增已被重瞳誤。良禽擇木乃下棲。不用漂流歎遲暮。

擬招

以我美姝。易彼紫駟。裝刀頭兮飾箭廚。西蕩秦隴。東清荆吳。擬立功於不朽。任市人之擲榆。客有忘君背國竊祿而活者。亦何異食溷之鼠。穴墓之狐。厭見窮猿守株於岩野。困鳥脫羅於江湖。吾誠不能依阿偃仰以殉世。仰皇穹而號呼。若乃沐浴日光。廓清天衢。抑血誠憤發於所感。又孰知強弱成敗之何如。豪傑兮歸來。吾與爾兮良圖。

將進酒

酒如澠肉如陵。趙婦鼓寶瑟。秦妻彈銀箏。歌兒舞女列滿庭。珊瑚案。玻璃罌。紫絲步障金雀屏。客人在門

主出迎。蓮花玉杯雙手擎。主人勸客客勿停。十圍畫燭夜繼明。但願千日醉。不願一日醒。世閒寵辱何足驚。珠萬斛。金千籩。來日大難君須行。胡不飲此長命觥。劉伯倫。王無功。醉鄉深處了平生。英雄萬古瘞黃土。惟有二子全其名。

行行重行行

行行重行行。此別何時還。風霜阻道路。歲月凋朱顏。層冰剝肌肉。半是刀箭瘢。金印大如斗。積功良亦艱。君看霍去病。終葬祁連山。

白雪吟

白雪復白雪。寡儔將奈何。不如下里唱。能使和者多。繁囂亂俗耳。寧復知謬訛。五絃斷南風。咸韶隨逝波。正聲久絕學。舉世皆淫哇。吾將復大雅。盡掃蚊與蛙。后夔今不在。曲成誰爲歌。

俠贈

趙客虎皮冠。走馬章臺柳。自小恥讀書。吳鉤不離手。千里殺讎家。空中騰匕首。俠累座上死。嬴政廷中走。屠兒貪黃金。狂生終掣肘。丈夫難圖名。合義死不朽。安得蘭相如。澠池一杯酒。

房中思

紅象作小梳。髻龍盤漆髮。香泥擣守宮。染透桃花骨。白馬不歸來。倚牀弄紅拂。桂陰綠團團。坐對玲瓏月。

銅雀妓

陵樹日沈西。秋風石馬嘶。芳樽傾總帳。詎肯溼黃泥。慘慘笙歌合。遙遙望眼迷。玉人脆如草。能得幾回啼。

秋怨

雨聲繞山來。撼屋風獵獵。銀牀暑氣消。金井下梧葉。胭脂墮微淚。鸞鏡曉妝怯。香冷紅象梳。髻薄釵燕貼。明日玉闌干。槿花飛莫蝶。

天府告斗

黃巾騎馬騰紅雲。綠章細書天篆文。芙蓉小冠切白玉。伏地夜奏中天君。灼灼桃花映羊首。電繞魁罡百怪走。九皇一笑帝車移。銀鹿作狴靄注酒。玉衡閃爍招搖光。人間塵土何茫茫。石家買得綠珠笑。五雲踏地椒壁香。知衣吹秋車武子。乾抱流螢照書紙。虛空喉舌正司權。杳杳冥冥注生死。

端午詞

榴花照鬢雲髻熱。蟬翼輕綃香鼻雪。一丈戎葵倚繡窗。雨足江南好時節。五色靈錢傍午燒。綵勝金花貼鼓腰。段家橋下水如潮。東船奪得西船標。棹歌聲靜晚山綠。萬鎰黃金一日銷。

白苧舞詞

吳宮美人青犢刀。自裁白苧製舞袍。輕雲冉冉白勝雪。激楚一曲回風高。九雛鳳釵簪紫玉。長裾窄腰蓮

步促。翩翮素袖啓朱櫻。金籠鸚鵡飛來熟。館娃樓閣搖春暉。臺城少年醉忘歸。瑤窗綺戶鎖風色。桃樹日長蝴蝶飛。傾城獨立世希有。罷吟綠水停楊柳。急管繁絃莫苦催。眞珠贖買烏程酒。

桃花夢

美人夜出胭脂井。骨碎香肌春不醒。去年阿護不重來。獨倚晨光照芳影。彩雲紅雨兩無心。覺來飛去三青禽。

夜坐吟

蜻蜒頭落燈花黑。瓦面寒蟾弄霜色。玉壺水動漏聲乾。夜冷蓮籌三十刻。蓬頭兒子凍磨墨。欲拾羈懷尋不得。起看庭樹響風箏。斗杓墮地天盤側。

秋夢引

翠翹半暈雙飛鳳。轆轤金井懸銀甃。萬絲翠霧刷鴉光。兩點秋波和淚送。芙蓉帶露不忍折。鸚鵡隔籠時自呀。多情宋玉正悲秋。故放香魂入秋夢。

梁苑行

銀鱗靡靡天光晚。畫出梁王江上苑。脩眉凝睇秋波長。薄袖分香春麝暖。氤氳寶鼎騰水沉。寂歷宮門閉金鍵。三十六竿吹紫雲。露冷高臺雙鳳遠。

夏日吟

白日鑿鑿可礪齒。寒泉濯濯宜洗耳。六椽短屋雲下眠。三日南風樹頭起。金刀薄切紅鱗髓。玉樽細嚼松花蠟。大星西下月如冰。明漢南來天似水。

楊花詞

東風吹春春不醒。桃花杏花空娉婷。萬絲翦綠暗如霧。千里相思長短亭。亭前女兒十六七。手挽柔條背春日。六街馬蹄踏黃塵。雪花漫天愁殺人。

食燧行

曉聲夜吠樊將軍。袖刃一擲神血噴。鴻門側盾撞衛士。怒叱項王如狗蹲。黃流一仰一斗吞。生啗屍肩何足論。書生豪猛不減此。燈下漆盤生劍痕。

發白馬

朝發白馬津。暮及陳留縣。兵事急星火。驛程疾雷電。左挾弓。右擎箭。獨飛一騎報軍書。百里王城馳急變。丞相鎮靜材。清談白羽扇。天子蔽九重。張樂絳霄殿。內朝三日不得朝。咫尺天威無路見。三十萬衆解甲降。錦繡封疆成廣薦。明日腥風敵騎來。背城借一誰堪戰。嬖倖竊魯弓。姦諛賚紀甗。銜璧牽羊事已非。束手藩臣忘入援。收淚踏邊塵。含悲別宮院。回首東南漢。月高浙瀝風沙破。顏面白草黃雲望莫窮。西樓尙

隔湯成淀。木葉山前下馬時。青衣始悟降王賤。使者來。君不見。

擇交難

擇交難。結交易。杯酒可歲寒。一言相背棄。金蘭膠漆照汗青。夢魂難黍通幽冥。但慚未到張元伯。莫謂人非范巨卿。結交易。擇交難。擇交不慎生疑患。方寸鬼門關。對面九疑山。險其心。易其顏。口蜜尙甘香。腹劍已嶮峴。人生慎勿輕交歡。君結綬。我彈冠。結交未若擇交難。結交結知己。擇交慎其始。嗚呼。叔牙王佐。今豈無。安得鮑子兮。爲我交夷吾。

隴頭曲

策馬上隴坻。七日行不了。回首咸陽在井中。萬戶蒼蒼煙樹曉。隴月照黃沙。隴雲低芳草。朱顏綠鬢不建功。坐待星霜頭白早。持漢節。拂吳鉤。爲君生斫隗囂頭。誰能知李廣。百戰不封侯。

出自薊北門行

出自薊北門。遙望瀚海隅。黃沙落寒雁。衰草號雄狐。河水血成冰。土冢碑當塗。乃知古戰場。本是賢王都。武皇昔按劍。一怒萬骨枯。半夜下兵符。六郡皆譴呼。將軍各上馬。百道追匈奴。羊馬滿大野。萬帳收穹廬。英英長平侯。六驛走單于。至今青史上。猶壯武剛車。

北風行

北風吹胡沙。客上居庸關。山高落日黃。車重牛力殫。土岡隱顯際。百步聞鈴響。白馬流星來。上搭虎皮鞍。英英鞍上郎。髮拳雙頰丹。竹槽駕鞭箭。猿臂雕弓彎。連呼客避箭。箭出雙轅閒。客懼墮車下。伏地不敢看。徑前驅車去。可望不可攀。轉丐田野中。一飽祈生還。江南有少婦。閉閣畏風寒。便識北風寒。北風摧心肝。

擬邯鄲才人嫁爲廝養卒婦

妾家叢臺下。自小善鳴箏。十五面如月。不離保姆行。敵塵西北來。盜據邯鄲城。驅民出戰鬥。十戶九爲兵。五載不解甲。千里屍縱橫。司徒朔方至。賊勢始不撐。官軍下井陘。良家盡焚劫。掠爲廝養婦。哀怨何時徹。

吳鉤行

炭山燒天色如赭。神血噴人雙躍冶。紫鑕百鍊結松紋。三尺清冷掌中瀉。吳人作鉤鉤同形。吳王不知鉤有靈。鉤師向鉤呼鉤名。雙搵父胸飛應聲。百金懸賞金爲輕。吳人重鉤如連城。吳鴻扈稽雙厲鬼。價重連城精莫比。不殺句踐雪遺恥。誤人亦似夫人匕。

採蓮曲

明月滿大堤。盪舟湖水西。槳牙鳴浪碎。船尾拂花低。綠鬢溼香霧。紅袖漬香泥。採蓮不得藕。空妬鴛鴦棲。

空城雀

嗷嗷空城雀。一飽啄餘場。不比珍奇鳥。自矜毛羽光。翹首仰喂飼。巧語如笙簧。幽棲樊籠裏。黃口不得將。

一 韜詞

一鞘容兩刀。古人恥不佩。一牝聚三雄。君子忍爲配。株林從夏南。遺臭穢千古。惟聞褚彥回。不污宋公主。當壇曲擬梁簡文帝。

初八月上弦。十五月正圓。當壚設夜酒。客有黃金錢。權濃易得曉。別遠動經年。相送大堤上。舉杯良可憐。薄命妾。

少長深閨裏。面不識風吹。自爲薄情婦。懶塗紅玉脂。花軒背春睡。月榭惱秋思。不嫁張京兆。敢煩郎畫眉。猛將吟擬孟郊。

手捽敵人頭。臨陣試劍術。氣酣乳虎怒。拳捷秋鷹疾。鏖戰每在前。上功當第一。江南未嘗見。自古山西出。刺客行。

刺客膽激烈。見義卽內熱。每聞不平事。怒髮目眦裂。方別奸相喉。又斷佞臣舌。試看腰下劍。常有未凝血。胡姬年十五。擬劉越石。

胡姬年十五。芍藥正含葩。何處相逢好。并州賣酒家。面開春月滿。眉抹遠山斜。一笑能相許。何須羅扇遮。春晝遲。

樓觀參差半空起。縹緲闌干煙霧裏。綠萍一道浸鴛鴦。笑聲只隔桃花水。柳下粉牆斜靠街。當晝紅門半。

扇開遊絲冉冉掛簷角。燕子一雙何處來。

江南弄

菱尾蒲芽水新足。沙暖小桃紅夾竹。誰家燕燕倦東風。戢翼畫梁春睡熟。螭頭舫子載醴醑。勿惜千金買詞曲。明朝風雨蔽九川。千里江南芳樹綠。

日出入行

東邊日出翠動作。蚤蚤營營異憂樂。須臾力倦各暫寧。日光亦向西邊落。枕衾未暖夢未成。金雞一聲扶桑明。孜孜爲善尙不及。何暇欲存身後名。

哀亡國

買桑餒蠶絲不多。繫注種藕蓮幾何。廣陵夜月瑤花宴。結綺春風玉樹歌。君不見黑頭江令承恩早。白髮蕭娘情未了。狎語淫人夢不醒。宮城綠遍王孫草。昏昏黃霧塞宮門。白練寒生玉頸痕。錦繡江山春似畫。幾傷風雨弔迷魄。

瑤池曲

曼倩啼饑桃未熟。綺窗珠樹層陰綠。上清童子晝臨關。鸞尾掃雲方種玉。芙蓉畫闌春晝長。簫韶一派起回廊。八龍未暇送周穆。三鳥遽能迎漢皇。風雨蒼蒼隔元圃。不勞西望祠王母。贈君桃核大如杯。歸植茂

陵陵上土。

歸來曲

芍藥薔薇向春泣。湖上春風政無力。綠塵滿街馬跡多。良人未歸將奈何。娟娟脩娥久凝佇。阿侯如今在何處。錦箏撥斷十四絃。絃聲清苦愁不眠。粉香翠黛凝芳筵。

襄陽白銅鞮曲

襄陽白銅鞮。下踏揚州郭。可憐揚州兒。棄戈甘面縛。大堤女兒何命薄。青年坐失榮華樂。蕩子功成未肯歸。閉門三月楊花落。

楊白花

楊白花。何輕薄。隨風渡江去。飛向誰家落。江南風雨春先老。陌上悠揚爲誰好。永巷春歸夢不成。綠池一夜浮萍生。

車遙遙

車遙遙。推向何處去。勸君勿輕行。前途有泥淤。勸君君不留。銳意作遠遊。前有伏路者。勇力能挾輶。挾君輶。劫君財。夕陽衰草暴君骸。君魂有靈招不來。

俠士吟

俠士有時有，不平無日無。安得匕首劍，贈與軹井屠。刺殺韓王相，報仇嚴大夫。俠士死傷勇，亦勝懦夫活。許身然諾閒，不爲勢利奪。瓊瑜兩不掩，意氣足相埒。俠士赫赫聲，懦夫厭厭生。懦夫視死重，俠士視生輕。我吟俠士詩，俠士爲我起。斷卻權奸頭，少雪懦夫恥。君不見臨安軍士彼何人，能斫申王鐵輿子。

寒女歎

楚楚寒家女，老在閨房空。懷標梅歎，對鏡悲春陽。豈無媒妁言，配彼多金郎。竊念豈容易，欲嫁不復行。坐使窈窕容，綠鬢成秋寧。寧爲未嫁女，莫作失節孀。

征婦歎

日暮鼓鼙急，呼聲如雷闐。漢兵三十萬，夜戰胭脂山。風皴皮肉疽，血染車輪般。技窮下馬鬪，矢盡張空券。夫君暴骸骨，妾正摧心肝。豈無膏沐容，妝艷不成懽。亦有琴瑟絃，音好誰與彈。枕痕掩淚迹，鏡影緘愁顏。高堂舅姑老，聊復強加飧。

靜女吟

豔女羅綺裳，靜女荆布妝。豔女嫁大將，靜女歸農莊。大將死邊疆，豔女愁空房。農莊務耕作，靜女勤筐篋。豔女迭三嫁，末路流爲娼。靜女教子成，五福垂高堂。好花空窈窕，桃李不如桑。

昭君怨

四絃嘈嘈彈。北風胡馬嘶。回頭望漢月。遙落長安西。白草沒行路。萬里春淒迷。誰謂秭歸女。去作單于妻。
披淚入穹廡。翠眉向羊酪。敢恨君恩輕。惟憐妾命薄。嫁女媚夷狄。良爲中國羞。謀臣自無策。畫史不須尤。
秦臺曲

神絃十一曲

朝行青溪曲。暮宿青岩阿。女蘿施長松。白蘋依綠荷。神來水風生。神去水無波。朝雲不爲雨。夕露將如何。
右宿阿

古皇上帝高無語。十二天門守金虎。道君飛下玉清來。獨與蒼生作宗主。奈何人事多醜糺。閣阜號赤狐。
玉泉飛白鼠。武夷失左肩。羅浮虧右股。東明海波高拍天。幽魂滯魄稱神仙。腥風剝面晦白日。老蛟頑蜃
垂饑涎。道君道力通上元。天篆印文紅玉鐫。七星劍光上掩斗。五嶽小冠騰紫煙。飛雷走電搖山川。巍巍
正位專天權。叱咤百神如轉圓。賢哉道君胡得焉。嗟哉道君胡得焉。
右道君

雙頭牡丹大如斗。簇金小帽銀花鏤。綠鬪長眉丹激唇。白馬黃衫灌江口。平頭奴子金絲髮。六尺竹弓開
滿月。神葵帖尾臥牀前。頑蛟尙染刀銀血。靈風颺颺石崖吼。吳船楚舵紛搔首。紅雲忽報七聖來。蜀波水

色濃於酒。右望
郎

四十九鞭鞭馬箠。合眼旋風馬頭起。曲項琵琶金帖槽。七寶銀瓶勸金醴。紅斑碎纈石榴裙。弓尖絳縹飛輕塵。雙鬢髮髻好容色。十步回頭九媚人。舌尖若血噴紅雨。偏剝有聲微扣齒。綵衣零亂野花枝。頓地神狐拖九尾。右嬌
女

石郎家住南山裏。夜叱臥羊成隊起。研光羅帽舞山香。金礦銀坑爛如紙。竹節短鞭鞭赤狐。山精水魅聲鳴鳴。回風蹋水過溪曲。旋折山花聘小姑。右白
石郎

香爐盤盤青霧起。靈帷撒動金錢紙。練帶斜垂八尺冰。纏項白蛇神色死。青溪小姑雙露乳。起著神衫代神語。花裙繡袴蹋旋風。雙袖翻飛小蠻舞。西山日落雲冥冥。金龍畫燭燈光青。土妖木魅作人立。古壁空廊開履聲。繁絃嘈雜社鼓吼。體挂羊腸磔牛首。扶神上馬送神歸。老狐醉臥簷前柳。右青溪
小姑

洞庭八月明月寒。湖龍捧出玻璃盤。湖風忽來浪如山。銀城雪屋相飛翻。白鼉樹尾月中泣。倒捲君山輕一粒。浪花拍碎回仙樓。萬斛龍驤半天立。雨師騎羊轟晝雷。紅旗照波水路開。青娥鬢髮紅藍腮。紫絲絡頭垂黃能。神絃調急龍姑來。右湖
龍姑

西溪日落星離離。龍姑廟下號狐狸。東家少婦呼小姨。紙錢香奩左右提。紅甘紫嫩栗與梨。畫羅小扇相分攜。吹燈照道溪之涓。古祠深深溪岸陡。熒熒鬼火紅窠走。履聲襲人不敢啼。小姨堅持少婦手。心香一

辨謝姑恩。鸞刀自斫烏羊首。右姑恩

兩兩白玉童。採菱湖淥中。一雙木蘭棹。飛臂破南風。雁頭刺帶綠。菡萏花房紅。折來神女廟。進入湘妃宮。

豈欲偶奇遇。願然神惠終。右探菱童

皇皇明下福。祿是臻。燁燁靈童按舞段。段管蕭炳煥。元氣氤氳。幡盤屈以下墜。神昭回而上伸。右明下童

枝葉同生。根株異歸。萬物脩短。靡不乖違。於惟靈祇。順庇咸宜。穆穆一德。雍雍百禱。雷霆以鼓之。風雨以舞之。俾爾生無阻兮。俾爾歸有所兮。右同生

拂舞詞五章

翩翩白鳧集我堂下。悠悠江湖。逸焉得所。白鳧之白。皎如雪霜。金堂高明。君惠無疆。葑湖下開。白鳧飛來。

青蓋黃旗。入洛何時。雕鴉食人。剝面殘肌。白鳧飛來。吾與女兮忘機。右白鳧

躋躋跼跼。舞鳳飛凰。童子不孤。寡婦不孀。聖人在上。萬物斯視。五日一風。十日一雨。成湯祝網。大禹下車。

載道庶歌。盈庭都兪。猛虎不食。仁厚如騶虞。兇器各斂。衽干羽束籟。懷哉堯舜世。千古共嗟吁。右濟

獨漉獨漉。水高沒屋。沒屋尙得。水高何卽。野鷹西來。摩天高飛。我欲射之。氣衰力疲。桃牀泛泛。東流西陷。

嗟我伶俜。與之同憾。牀深幃低。對影獨棲。如有遠志。勿念繡闥。吳刀夜噪。長弓在彀。父死不報。何用勞勞。

申胥復楚。魯連卻秦。一言定事。彼獨何人。右獨漉

碣石沒海水。淪湮無已時。望之小如拳。鼇冠露玉筍。海波揚黃塵。碣石乃還故。雖復高際天。半已成灰土。
靈龜固云壽。豈與天地久。騰蛇縱有神。頑鱗終亦朽。朱顏能幾何。轉眼成老醜。胡不廣作權。日夜飲醇酒。
右碣石
靈龜

秋風下桐葉。輓轡動金井。美人汲寒漿。銀瓶垂素綆。綠莖掃晴空。洗靜青天影。淮王尊有酒。箕踞事酩酊。
撫手作悲歌。徘徊顧光景。八公門首待。滄洲路非永。丹成劈空去。血劍全首領。文成八卦背。秀聚三花頂。
逍遙太清中。龍虎遞馳騁。全勝茂陵郎。銅盤花露冷。終然三泉下。玉匣蔽幽境。
右淮
南王

秋來

雨聲連夜捲江水。霹靂破車騰赤鯉。寒梢露翠劈空飛。壓地黑龍扶不起。大山搖搖小山崩。黃能夜吐雹
如冰。天宮鬼箭自空注。下射行人攢刺蝟。六丁長爪攪明河。扛起虹橋翻玉波。陽烏白頭朱雀叫。電蛇閃
爍天孫笑。曇雲藹藹白帝來。銀旗玉甲光明開。拳毛老虎排天門。颼颼涼氣吹黃昏。袂羅小衫裁嫩綠。金
翦高堂對明燭。深沉鳳帳寂無聲。一夜輕涼新睡足。明朝織女會牽牛。更上西家乞巧樓。

江南謝二首

江南謝。今何在。生綠畫羅屏。春光不相待。藕莖拗折蓮絲長。千尺春愁不可量。
江南謝。春風隔長夜。柏枝亭下水連空。捲銀瓶向身瀉。綵雲分得香囊麝。夢裏如今頻見書。欲煩神媪

寄箜篌。箜篌未彈先淚流。

卿卿曲

煮蠶纒絲頭緒多。出門上馬歧路差。卿卿不嚮奈卿何。

君道曲

大君若天道。廣運無不周。明視並日月。生殺成春秋。疆場盡兩極。聲教被九州。丞相任股肱。尙書總襟喉。雷霆出號令。前宿分諸侯。沈潛出陽剛。高明破陰柔。乾健不少息。兢業毋自偷。以此守神器。堅固如金甌。

天狼謠

煌煌天狼星。芒角射參昴。獨步天東南。燁燁竟昏曉。天弧不上弦。金虎斂牙爪。萬里食行人。白骨遍荒草。火蒸烏龍岡。血染朱雀航。列宿不盡力。五緯分乖張。戍客困疆場。荷戈涕成行。誰爲補天手。爲洗日重光。

雙燕辭

雙燕復雙燕。雙飛繡戶中。梅梁立春雨。桂殿別秋風。火焚柏梁臺。信斷烏衣國。羈雌憶孤雄。雙飛難再得。卵破巢旣空。繫絲徒爾紅。曾如燕赤鳳。能入漢皇宮。

綠水謠

今宵何處月。南浦木蘭船。半夜涼風起。荷花如錦鮮。莫翦莖上葉。水珠有時圓。且留泥下藕。要使根株連。

鴛鴦不並翅。好事琉璃脆。解佩擲真珠。少酬交甫意。

君馬篇

君馬獅子花。臣馬照夜白。君著紫襜褕。臣著金蔽膝。天高風勁弓力強。一鞭飛過黃茅岡。豐狐狡兔少顏色。元熊文豹走且僵。君撚箭。臣臂鎗。馬上各垂雙白狼。歸來解鞍坐。對飲一百觴。劍尖啗肉臂作俎。醉臥不知更漏長。

子夜吳聲四時歌四首

朱雀街頭雨。烏衣巷口風。飛來雙燕子。不入景陽宮。爲問秦淮女。還知玉樹空。湖上水雲綠。荷花十里香。啞啞木蘭棹。驚起睡鴛鴦。雌雄兩分去。不覺斷人腸。白苧鴉頭襪。紅綾錦鞞靴。玉堦零露冷。羞折鳳仙花。去去蕩遊子。秋深不念家。瓦上松雪落。燈前夜有聲。起持白玉尺。呵手製吳綾。穩紉征袍縫。邊庭草又青。

莫種樹

莫種樹。種樹枝葉多。枯楊易生稊。鈍斧難伐柯。秋風動悲思。春月夜如何。

估客二首

發舟石頭城。繫舟梅根渚。江月夜寥寥。照見家人語。

割裳製家書，刺指題日月。不知何時到，但見今朝發。

史童兒曲

君騎汗血駒，兒臥紫絲幙。杜鵑滿空山，君行何時還。

阿母祠

阿母似麻姑，十指如鳥爪。先彼日月生，後于天地老。

高句驪

魚髓走朱蒙，夫余王氣終。金花紫羅帽，長袖舞遼東。

塘上行擬甄后

白露下塘蒲，芙蓉秋露溼。不忍生別離，時抱蒹葭泣。

芙蓉花一首三解

芙蓉花，大如杯，露爲醴，玉作臺。勸客飲，客勿推。芙蓉花，嬌殺人，紅爲袖，綠爲裙。舞回風，歌停雲，勸客飲，客須醺。芙蓉花，何娉婷，舞嬌堂上燕，歌響花間鶯。子高未合卷，曼卿先寄聲。人閒永夜秋風冷，莫說韓娥絲竹亭。

丁督護曲一首五解

丁督護北征去。衰草沒戰場。郎尸在何處。丁督護勿回顧。千里馬蹄塵。遙遙盟津渡。丁督護寶刀鞍上據。百戰無前敵。收功洛陽路。丁督護冬窮歲云暮。相送落星墟。哀情向誰訴。丁督護白楊響墟墓。馬革易成泥。郎尸今暴露。

段兒歌

玉童礪礪兩鬢墜。雙瞳射人秋水媚。情濃意遠風骨異。微笑向人書段字。花覆古城心欲醉。地遠如今空有淚。春風淡沓東北來。綠雲隔春眉不開。郎眉雖不開。未比兒心哀。紫絲竹鞭玉腕馬。踏破花城何日回。

紅門曲

紅門欲開人漸稀。棲鳥啞啞漫天飛。西宮寶燭明如晝。玉筵圍坐諸嬪妃。黃羊夜剝博兒赤。金椀銀鐺進魚炙。銀漢依微白玉橋。隔花宮漏夜迢迢。內城馬嘶丞相朝。

和陸州雜詩十四首

五將開新府。三軍解沸湯。將軍驅土鬼。部曲散夫娘。右大將令

白牙山下水如湯。烏龍嶺頭日無光。五龍墜地化作狗。怒目嚙人烏喙長。右白牙

開花竹竿三丈長。紅皮縵笠繡衣裳。石榴花曲唱得好。爭奈吳娘不斷腸。右石樹花

十月四日天沙黃。虎狼西來將軍亡。帳前嬖倖屍骸僵。君不見崔杼鋒刃三尺長。晏嬰民望那可傷。右黃沙行

孤城新築十丈高。五狼西來成夜噪。將軍夜別美人去。輓玉不禁朱粲糟。右孤城

城土未乾城主改。長旗夜入黃巢砦。怨禽飛來遶砦啼。不學精衛填東海。右怨禽

鳳鳴不向阿閣巢。網羅畢張將焉逃。此身尚不免鼎俎。豈問摧殘五色毛。右鳳鳥

睦州女兒嬌如花。閨門不出愁風沙。今朝忽遇沙吒利。白馬馱入何人家。右睦州女兒

婦人在軍鼓不揚。軍中豈宜安女郎。鄭旦西施齊入水。將軍真有鐵心腸。右且施

西王孫女嫁東郎。不學虞姬就劍芒。忍懷遺腹事仇主。不見胡法生兒洗滌腸。右西王孫

南國香誰家女。容貌如花絕代嫩。嫁郎西去久不歸。今日相逢在軍壘。宮妝不著嫁衣裳。三尺罌罌包髻

子。右南國香

相如全璧目眇裂。劍指秦王衣濺血。衣濺血。不比儀秦爭口舌。右壯士行

秦王雄飛六王伏。六王戰敗疆土蹙。英雄獨有朱屠兒。袖隱金椎入函谷。圜中饑虎思人肉。屠兒入圜虎

閉目。右壯士行

義鷁子雙翼長。獨入雁羣擒雁王。不比饑鷹肉飽思飛颺。君不見公孫子陽墜馬洞胸死。七尺虎軀橫戰

場。右義鷁子

睦州相杵歌六解

韓公西築受降城。吐蕃不來城下行。將軍築城城未了。隔城聽得打城聲。築城築城忙築城。敵人去城不十程。雲梯火炮製作巧。中有魯般能用兵。搬土築城民力多。晝夜不息如擲梭。黃梅雨來江水漲。城脚不牢將奈何。蒸土築城不須高。買石甃城不須牢。城中一旦化爲敵。十萬天兵先敗績。一月築城城漸高。將軍心喜民力勞。將軍須與城俱碎。一寸城土皆民膏。金城巍巍高際天。湯池泱泱洪若淵。堅深自古說統萬。猶有敵人擒赫連。

三忠詞

精衛苦精衛苦。口銜木石填水府。水府若地平。精衛作人語。海鯨三頭共一尾。挾潮作兮挾瀾上。吞舟殺人如殺螳。豈無傷弓禽。不學精衛死。精衛溺死不足恤。填海不乾。誓願不肯畢。長鯨悔罪海寧謐。精衛雖死功第一。右精衛

戰銅城。死湖水。父忠臣。兒孝子。淮南烽火吹邊塵。淮南將帥逃如麇。秋高覽鏡思血戰。誓死不作偷生臣。磨白羽。接短兵。有進死。無退生。騎可陷。身可殺。忠魂義氣無時歇。銅城不平血不滅。右戲銅城 她磧在湖北。她原在湖南。神蛟誓擊她。首碎。蜉蝣不思她。味甘。她類多。蛟力少。盡力搏她。她不了。蜉蝣一旦化爲她。肆毒毒蛟。蛟潰腦。神蛟死。她當途。雷聲爲我行天誅。右她磧

富陽行

搖首上馬金鞭揮。山頭白旗如鳥飛。西來萬騎密蜂蟻。四面鼓聲齊合圍。金城木柵大如斗。五百貔貅誇善守。鐵關不啓火筒焦。力屈花獠皆自走。城南城北血成窪。十里火雲飛火鴉。將軍豪飲不追殺。掠盡野民三百家。

鐵礮行

黑龍墮卵大如斗。卵破龍飛雷鬼走。先騰陽燄電火紅。霹靂一聲混沌剖。山河傾。不擊妖孽空作聲。天威褻瀆人不驚。

燭龍行

燭龍燭龍。女居陰山之陰。大漠之野。視爲晝。瞑爲夜。吸爲冬。噓爲夏。虵身人面髮如赭。銜珠吐光照天下。天地寬。日月小。烏兔盤旋行不了。窮陰極漠無昏曉。女代天光補天眇。女乃不知日被黑子遮。月爲妖蟆食。五緯無精光。萬象盡奪色。下民媮炎皆昏惑。燭龍燭龍代五職。胡不張爾鬣。奮爾翼。磨牙礪爪起圖南。遍吐神光照南極。補缺免無損傷。正畸烏。不傾昃。妖蟆黑子紛誅殛。重光重輪開萬國。胡爲藏頭縮尾窮陰北。坐視乾坤黯然黑。乾坤若崩摧。吾恐女龍有神無處匿。

白翎雀

真人一統開正朔。馬上鞬韉手親作。教坊國手頤德閭。傳得開基太平樂。檀槽鈇絃鳳凰鬪。十四銀鑲挂

冰索摩訶不作兜勒聲。聽奏筵前白翎雀。霜燿燿。風殼殼。白草黃雲日色薄。玲瓏碎玉九天來。亂散冰花灑氈幕。玉翎琤琕起盤礴。左旋右折入寥廓。翠嶽孤高繞羊角。啾啾百鳥紛參錯。須臾力倦忽下躍。萬點寒星墜叢薄。碧然一聲震龍撥。一十四絃暗一抹。鴛鴦飛起暮雲平。鷺鳥東來海天闊。黃羊之尾文豹胎。玉液淋漓萬壽杯。九龍殿高紫帳暖。踏歌聲裏懼如雷。白翎雀樂極哀。節婦死忠臣摧。八十一年生草萊。鼎湖龍去何時回。

偃魂啼血行二首

孤城四面啼猛虎。怒豹咆哮餓彪舞。東海王公長獵兒。手有長刀腰有弩。王公前日爲虎吞。膽落獵兒深閉門。今晨馮婦復攘臂。虎視不動門邊蹲。君不見妖狐假威不敢搏。而況真虎據岩壑。偃魂導虎何已時。血腥荒草愁離離。

白面於菟行偃草。雄劍爲牙戟爲爪。夜越鐵關吞九牛。弱婦嬰兒眼中飽。郊原十里吹腥風。白骨塞途秋草紅。肝腸掛樹野鴉噪。鬼火照城人跡空。嗚呼獵師心力巧。藥箭無功機發早。舊魂走抱新魂啼。一夜黑風天亦老。

次韻壯士歌

春來塞草青。秋來塞草黃。草黃馬肥弓力勁。邊聲徹夜交鋒芒。鋒芒直上爛霄漢。壯士目炬與之相短長。

王師十年厭追逐。朱粲黃巢食人肉。天津誰弔杲卿痛。秦庭孰舉包胥哭。壯士怒翻海。百川皆可西。巍巍鸞鳳闕。肯使鷓鴣棲。漫漫長夜久未旦。一聲啼白須雄雞。君不見淮陰勝。夫餓不死。一劍成名有如此。斬蛇未覩隆準公。沐猴寧數重瞳子。

孟城吟

孟城如斗復如鐵。百萬天兵半魚鼈。狼星爛地響晴雷。白馬將軍夜流血。匣中寶劍寒生雷。一擊能令太山缺。怒提往斷落星石。獻與師臣補天裂。

生別離

有烏有烏桓之山。一乳四雛長羽翰。一朝棄母絕四海。母啼不絕聲悲酸。聲悲酸。摧心肝。生別離。死別難。南鄰健兒戍渤海。東家壯子征函關。賣田買寶刀。賣牛裝馬鞍。父母墮苦淚。弟妹增離顏。呱呱子乳獨。慘慘妻啼單。出關道路遠。匹馬鏖戰難。百見月魄死。十度霜華寒。霜華寒。月魄死。悠悠歲月何時已。主將不尙謀。士卒欲誰倚。英雄務割據。盜賊何由弭。白骨積成山。仆地如螻蟻。普天事征戰。荷戈動逾紀。烽火入中原。千村不一存。初聞父母計。繼傳家鄉焚。有喪不敢奔。有苦誰與論。生別離。聞者猶銷魂。死別離。痛極聲復吞。人生慎勿輕從軍。桓山烏啼聞不聞。

殺氣不在邊

殺氣不在邊。凜然起比鄰。隔城聞叫喧。白日飛黃塵。春雨夜鬼哭。青燈火燐燐。豈無籌邊臣。百駝馱金銀。亦有館閣賓。紅粟盈倉困。佞語喜見色。直辭怒生嗔。兵強不出戰。師老志何伸。

怯薛行

怯薛兒郎年十八。手中弓箭無虛發。黃昏偷出齊化門。大王莊前行劫奪。通州到城四十里。飛馬歸來門未啓。平明立在白玉墀。上直不曾違寸晷。兩廂巡警不敢疑。留守親姪尙書兒。官軍但追上馬賊。星夜又差都指揮。都指揮宜少止。不用移文捕新李。賊魁近在王城裏。

賦得關山月送速博安卿

少室青連雲。虎牢峻削鐵。茫茫雒陽道。寒月正淒切。遊子悲故鄉。西望淚嗚咽。豈不念早歸。兵火久隔絕。山高月輪小。關險車輪缺。虎豹起食人。狐狸坐憑穴。枯草白零露。陰風青燐血。跣足晝十程。鶉衣冬百結。弱子面削瓜。老妻頭覆雪。紀綱無力人。十進五復輟。似聞鄉里雄。百萬總旄鉞。王師雖戰勝。妖孽未盡滅。攘臂起作勢。欲歸備行列。徒存壯士心。奈此筋力別。人固有老少。月亦有圓缺。月魄死復生。精神老衰竭。關塞遠且長。歸心中道折。六親不易見。萬古憑誰說。誦爾北征詩。知爾中腸熱。念爾行路難。贈爾關山月。

白頭母次徐孟岳韻

道旁哀哀白頭母。西馬塋上花翁婦。數莖短髮不勝簪。百結鶉衣常露股。自言夫本業種樹。一朝棄業從

戎伍荷戈南征竟不歸。不知被殺還被虜。屈指十年音信斷。獨宿孤房誰共語。家在錢塘古蕩東。門前正壓官橋路。恰憶夫在種花時。春來桃李下成蹊。自從夫死花樹折。錦繡園林成馬埒。縱餘梨杏與梅花。無力入城供富家。富家遭兵亦銷歇。金錢誰復收名花。何況邇來新將相。一體好儉不好奢。兵餘城市化村塢。亂後名園作軍府。年年寒食杜鵑啼。人家上冢西湖西。時光荏苒易飄忽。可憐誰拾花翁骨。君不見海棠風。楊柳雨。牢落錦紋箏。凋零金雁柱。黃四娘家客漸稀。蛺蝶飛來過牆去。

澈海洋書海盜錄後

海漫漫。颶風拍浪高如山。盜長踞坐大樓船。手劍三尺神思何安閑。淮樞官見之心膽寒。膠州龍公空授徑寸珠耳環。盜長乃爲天除奸。不用大呼天可汗。天可汗。刑已失。吾非利若財。抵跪何足恤。失土民。眞罪人。女命雖螻蟻。吾禮有主臣。穴胸取心賽海神。淫怒殺人天乃嗔。澈海洋。闊無垠。過者不用多金銀。重裝往往能殺身。

主家貓

主家畜雄貓。文采玳瑁光。晨飡溪魚飽。午睡花陰涼。營營溝中鼠。白日登我牀。鼠東貓卻西。所恨不相當。一朝忽相當。反爲鼠所戕。淋漓兩脣疽。跼促四足僵。呼奴起繫鼠。鼠去貓倉惶。作炊實貓腹。割裳裹貓瘡。愛貓心雖仁。敗事流毒長。所媿主家關。貓驚庸何傷。

塗山渡河女

公無渡河公渡河。公自取死死奈何。女無渡河女渡河。後有白刃前白波。上無橋與梁。下無舟與槎。渡河女寧死河水不死賊。戈死戈比節。婦死水齊孝娥。所以塗山女受死不受辱。勿使賊刃斫妾頸。寧使河水爛妾肉。箜篌有聲如麗玉。

琴操 干戈不息。殆且十年。余流連江湖間。且所不忍。將欲仗劍軍門。而可依者何在。作琴操十二。以寄意焉。俾能琴者尋聲而鼓之。余倚歌而和之。或者可以少泄於梗梗云。

灑水東奔兮澗水攸同。禾黍離離兮薺麥蓬蓬。周召不作兮桓文告終。王目以公兮雅降為風。嗚呼平既自夷兮報寧得不窮。右閱

秋草兮芊芊。黃金臺兮夷為淵。悵廣宇兮裂瓦。望離宮兮生煙。淚可盡兮目可穿。思昭王兮不可言。右懷

帝庭淵淵。玉京雄兮。憶我壯年。竊觀光兮。虜龍在朝。天下文明兮。既盛則衰。喻炎涼兮。耄期倦勤。禍亂之秋兮。通都大邑。天實荒之。織畚販繒。天實昌之。天自作孽。俾我不能生兮。右觀

茫茫禹蹟兮畫為九州。侯伯牧守兮職貢是脩。女或不臣兮天討罔偷。夫胡今世兮敵國同舟。嗚呼哀哉。兮吾誰與謀。右商

聲裂裂兮揚沙騰颺。雲冥冥兮雷蒸怒潮。雨澤不降兮倏虹滅而電銷。不擊妖孽兮不潤枯焦。天威自襲。

兮怒曾不崇朝。右風雷操

日薄西山兮沴氣交羅。魍魎迭作兮狐狸嘯歌。方當陽於中天兮四海融和。忽出路以噫墜兮光景蹉跎。末虞淵兮浴咸池。乘六龍兮挾以馳。世無其人兮奈日何其。右西日操

高山巍巍兮危峯際天。蟠據厚土兮根入重淵。草木不遂兮赭如血鮮。礪不可薪兮瘠又不可以田。徒載祀典兮配岳與川。不雨不雪兮民何望焉。右高山操

渭水齼齼兮函谷嶙峋。我馬西逝兮意將涉秦。父母止我兮子宜愛身。子毋違西兮秦其有人。右涉秦操漳之水幽幽其色。望魏陵兮悽然心惻。美人化土兮銅駝荆棘。徘徊涕泗兮弔孟德。翦羣雄兮建皇極。何

中道兮變鬼蜮。爾後人兮鑑失得。毋披猖兮恃強力。甘惡名兮稱漢賊。右望魏操春江兮潺潺。目浩浩兮煙瀾。水浪浪以激石。日汨汨而含山。忽中流之白叟。楫芳桂兮舟木蘭。渺浮羽以

輕舉。坦千里兮忘還。豈余心之不能。梗王室之未安。右春江操大田蕩蕩。時雨施之。東作既興。耜耰菑之。黍稷穰穰。歲計資之。嗟我驅馳。寒饑載途。豈不懷耕。歸守弊廬。

民亦有言。田實禍余。右懷耕操屈吾指兮計吾壽。指白日兮怨清晝。惜芳年兮不吾幼。螻蛄兮春秋。長無窮兮宇宙。右惜逝操

被薜荔兮帶女蘿。乘赤豹兮變現多。手擲揄兮足趨跳。夜吹燈兮晝長嘯。爲鬼爲物兮我不知。察爾情狀

兮識者誰右山
鬼操

朔風起兮天地昏冥。寒氣結兮河水成冰。舟楫不行兮車騎憑陵。狐兮狐兮身且輕。狐猶疑兮側耳聽右

操兮

我有巢兮手自爲之。朝朝暮暮兮飛銜樹枝。精神疲勞兮爰托我私。女何爲者兮心實險巇。據我所兮使

我朝不得食而暮無所歸。鳳凰莫訴兮余心孔悲右鳥失
巢操

萬木號風兮振山阿。垂舌舐掌兮刀劍磨。豐狐狡兔兮女食自多。虎乃傷人兮奈女何右山
君操

有犬猶猜兮相雄其聲。努目研研兮復獰其形。匪盜是求兮主心靡寧。牢可食兮竇可經。犬毋咋骨兮污

主人之庭右咋
骨操

飛鳶兮徐徐翔而集兮污渠。幸一飽兮腐鼠。遽仰嚇兮天衢。醴泉可飲兮竹實可茹。鳶毋鳳嫉兮鳳食有

餘右嚇
腐操

春江東流。懷我舊隱。萬岡屢來。一溪橫引。碧漣漪以生瀾。綠銜從兮分眇。修竹映戶。茂樹覆楯。枝纂纂兮

秋實。林飀飀兮春筍。羹魴鯉兮梁有筍。廚雉兔兮韝有隼。奕清晝兮文楸。鼓良宵兮玉軫。願晏安兮是湛。

忽垂兕兮荆蠶。抑天意之玉成。降孤臣以疾疢。復吾故兮允難。恨忘歸兮安忍右懷舊
隱操

和趙子固平章水仙二操

蹇予步兮南浦。水落落兮石魯魯。望漢江兮心獨苦。擲珠結兮贈交甫。右解佩操
整予駕兮洛食。水瀾瀾兮石泐泐。望成皋兮目無極。緇朱絲兮待曹植。右鼓琴操

賦松隱二操

彼髯叟兮幽獨。避秦爵兮如避辱。甘霜雪兮在空谷。牽女蘿兮補茅屋。右牽蘿操
彼髯叟兮幽貞。蹇吾形兮全吾壽齡。鬱歲寒兮青青。抱長鏡兮采茯苓。右採茯苓操

秦寓操

方寸微兮且大圓。形不鑿兮七竅全。天光發兮日月內旋。我在其中兮以樂吾天。

玉筍集卷四

歌吟

桃花馬歌

房星下飲瑤池清。神光夜化花龍精。東風滿背騎不得。冰痕淨洗黃魚腥。斑斑朱英點晴雪。滴滴真珠汗。疑血高蹄蹴踏花雨香。仰面嘶春春正熱。周家穆滿遊元圃。萬里西馳覲王母。青絲繫樹搖玉珂。錦繡叢中五雲舞。歸來復入元都觀。紫陌韶華政零亂。天閑不數連錢驄。路人只作文彪看。天台九曲溪流芳。解鞍春水浮丹光。劉郎牽入落花去。撲面玉鞭蝴蝶忙。風流自許王武子。未信叔癡癡不語。千年駿骨作銅聲。燕昭臺高金似土。

走馬歌

春風壓城紫燕飛。繡鞍寶勒生光輝。輕沙青草平似鏡。花雨滿巾風滿衣。潛蛟雙縮玉抱肚。朱鬣生光散紅霧。金龍五爪蟠彩袍。滿背真珠撒秋露。生援俊健雙臂長。左腳踏鐙右蹴轡。銅鏡四扇透十指。玉聲珠碎金琅璫。黃蛇下飲電掣地。錦鷹打兔起復墜。袖雲突兀鞍面空。銀鬃駝囊兩邊綫。西宮彩樓高插天。鳳凰繚繞排神仙。玉皇拍闌誤一笑。不覺四蹄如迸煙。神駒長鳴背疑血。郎君轉面醉眼纈。天恩翦下五色

雲打鼓歸來汗如雪。嘔出錦心。可與桃花爭奇。

宛平主簿駱馬歌

宛平主簿堂。訪余於大都雙橋里。指其所乘驕馬曰。能騎此否。余笑曰。自西而東。既過。余乃執策就馬。足甫及燈。則已奮迅馳突。入翰林隊中矣。羣馬辟易。於煙塵中。但聞。翰林厲聲曰。馬好。甫南。馳至南橋。越壑而過。俯身就轡。羣馬辟易。於天師庵。樞密院街矣。遂縱轡至哈達門。而回。乃散。訝余久不返。騎。他馬來追。遇

癸感宮中一團火。踢倒祝融掣金鎖。飛來塵世化禳虬。滿背紅雲結花朵。絳髻拂膝朱尾長。赤瑛絡腦紅絲韁。炎光閃閃照人熱。渴死造父愁王良。北平公子宛平簿。萬鎰黃金求赤兔。黃羅稊首袴褶靴。虎氣逼人如呂布。江南書生力不多。一躍五丈飛官河。翰林馬上失聲笑。但見碧煙如鳥過。電光拂眼騰朱梭。駿快不數生蛟鼉。研朱爲寫紅叱撥。喚起杜陵賡我歌。

樹稼謠

西風一夜吹黃沙。千林萬木森瓊芽。江南客子未嘗見。認作燕山臘雪花。品明皎潔枝條小。的皜珠兒照瑤草。金刀擊破雲母屏。六出梅花碎龍腦。銀絲精巧細如毛。觸蠻戈戟槐安刀。春秋一筆照千古。天人感應誰能逃。妖星上射廣寒府。粉黛三千淚如雨。姮娥不起元霜飛。玉兔空提雲外杵。蓬萊仙藥救不活。萬里悠悠夢魂闕。

酬海藏主紙扇歌

海一漚。氣骨有似生驂。凡鬻俗絡羈不得。西望八駿瑤池游。終焉不遂志。屏棄妻子祝髮爲比邱。遨遊
名山川。腳趺不肯休。誓絕俗士交。有語常不酬。西來貽我白紙扇。瀟灑不盡三湘秋。雙石相對峙。下壓長
江流。上有禿髮翁。踞坐披羊裘。手垂獨繭絲。下掛直鐵鉤。其意不在鱸與鯢。涼風從西來。短髮吹颼颼。故
人位九五。駕六龍。垂冕旒。諫議亦好官。視若囹圄囚。作書罵丞相。傲氣凌公侯。天星徹夜鬧。帝座疑有憂。
胡爲太史公。仰觀勞心眸。偶然共臥伸一足。誤壓天子腹。奚足尤。飄然納爵去。天子不可留。清灘七里水
如玉。上縛草廬下艤舟。有時耕白雲。鞭青牛。何庸圖像南宮樓。我今把釣釣臺去。海漚此意知我否。海漚
此意知我否。此篇亦似生馬悍氣。不可羈也。知此僧不凡。

伍擊罕元帥斬新李行

中原惡少稱新李。八尺長軀勇無比。鐵鎗丈二滾銀龍。白面烏騅日千里。攻州劫縣莫敢撓。烏羊渾脫縵
胡纓。輕車壯士三十兩。戰則爲陣屯爲營。殿前將軍不敢搏。羽林孤兒甘受縛。柳林道上掠寶車。獨樹堆
邊劊罷幕。吐蕃老帥西南來。虎頭不掛三珠牌。弊衣羸馬失故態。寶刀繡澀盃生埃。步入中書謁師相。願
請長纓三百丈。生縛兇魁獻至尊。不使朝廷乏名將。相臣入奏大明宮。玉旨特賜天廡聽。親軍百騎備兩
翼。綠旗登出東華東。硬弓二石力逾弩。長驅夜走涿城下。土岡無樹著伏兵。兩陣相當如怒虎。彎彎弓弣
抱團月。點點鎗尖飛急雪。神騅未隨白羽仆。賊顛已逐青萍缺。一騎平原報捷歸。天狗有聲流作血。

北庭宣元杰西番刀歌

此刀乃江浙平章徵化公征淮西所佩者

金神起持水火齊。煅鍊陰陽結精銳。七月七日授冶師。手作鉗鎚股石礪。一千七百七十鋒。脊高體狹刀口洪。龍飛蛟化歲月久。阮師舊物今無蹤。瓜哇繡鑲柔可曲。東倭純鋼不受觸。賢侯示我西番刀。名壓古今。刀劍錄。三尖兩刃圭首圓。劍脊亂亂生黑煙。朱砂斑痕點人血。雕青皮鞭金鉤聯。唐人寶刀誇大食。於今利器稱安息。十年土測松紋生。戎王造時當月蝕。平章遺佩固有神。朱虛固始多奇勳。三公重器不虛授。往繼王祥作輔臣。

西雲篇爲李山人賦

金天之西。其西孰存。有雲英英。運如車輪。上拂若木枝。下蟠崑崙根。六龍之所窟宅。二氣之所結屯。中有滂沛澤。可以蘇乾坤。何人獨幹元化柄。坐使天道久失尊。十鳥並出。四海皆焚。槁裂下土。萬彙不蒙恩。吾將上天問。叩天閭。諮元父。勅天孫。命傅說騎箕。鼓罡風以駿奔。以爾彌縫混沌。浩然使七竅無垠。

槎洲歌

明珠洲。水西行。九萬七千里。上直箕尾通銀河。洲中之地三萬六千頃。下有登天貫月槎。洲旁瑤草白似雪。瓊林大樹高可五百尺。樛枝的礫瑤瑰葩。人閒百世始一日。何有寒暑歲序白兔隨。朱鴉家雞曉啼朝。陽九苞鳳家犬晝戲。于闐獅子五色石盤擎。雪龍切鱸色奪日月。露注酒光燦霞。白石髓。青胡麻。王母蟠

桃七顆碧玉斗。安期大棗五尺青銅瓜。明星之精化作老仙降。槎上手揮白鸞尾。身坐白鹿車。長髮晞綠水。童臉浮丹砂。西方康胡跪進酒。南極丈人來獻花。蓬萊散仙遣以照書杖。大瀛海伯貢以黃茅芽。明星翁壽何遐。樂無加時呼鐵崖。老仙友西渡弱水。逾流沙。杖拄青騰蛇。橋踏金蝦蟆。五城十二樓。到處皆爲家。淋漓宮錦袍。倒著青綸紗。桑田東海不足較。麻姑三見何庸誇。明星翁樂無極。壽無涯。吹笙駕鶴一去五千載。歸來重醉槎頭槎。

此又於賀證離而去之掉
辭擊韻所謂橫絕欸起者

薛相士歌

君不聞蔡澤問齒不問貴。壽夭不可知。富貴能自致。又不見裴中丞貌不逾中人。靈臺不可狀。容色何足論。河東薛相士。兩與中道逢。玉筍生一見笑復驚。爲言爾相寒且怪。讀書萬卷今何成。計羅侵驛馬。野雪蔽天庭。山根斷而側。地閣削且傾。縮頤故不壽。鞋頰難於榮。垂吻招謗。撐頰寡朋。利不利。名不名。東西南北身雲萍。玉筍生胡不抑爾氣。庶可全女形。坦爾性。庶可延女齡。胡爲捩手傲世。不肯隨逢迎。奮髯晨擊劍。抵掌夜談兵。挽弓欲射封豕。拔刃欲屠長鯨。鑄銅立伏波柱。蒸土築韓公城。骸誅武陵蜃。骨碎斬黃脰。呼晉重耳。起作踐土會。挽齊小白。重結葵邱盟。決浮雲不使蔽白日。斬彗孛不使侵前星。玉筍生心血赤。膽銅青。將不逢李郭甲冑雄。相不逢姚宋冠冕英。歲月逝去可奈何。河山破碎難爲情。玉筍生蒙且狂。豈不知背可貴。鯨可王。黃金可術致。周鼎可力扛。玉筍生頭可斷。身可削。一寸丹心不可變。三語不爲揀。五

斗不作縣。不求嬖臣推。不希狗豎薦。甘貧若回。甘病若憲。頭如虎。額如燕。食玉橫金何足羨。一貧何以報父師。報以孤忠身後傳。薛鑑士心如鏡。目如電。慎勿逢人易貧賤。君不見邗溝一夜轉東風。枯楊盡拂黃金線。

戲贈乍浦稅使歌

去年四月雨如竹。錢幣不行百姓哭。故人走馬初上官。日日誅求征稅足。今年四月雨如箭。海賊東來船著岸。士兵東走百姓空。商征不成官吏散。故人本是西河夫。殺賊得官心氣盛。如何臨難乃無勇。不敢東向鳴桑弧。君不見彭城劉寄奴。長刀獨戰今非無。詞氣豪宕。可激立頹靡。

白雲觀遠圖歌

儀鑾江邊架層屋。萬里江流俱在目。上下風帆如馬飛。煙浪雲濤遠相逐。山頭白雲遠如許。西岸欲晴東岸雨。張公對此倚闌干。目送檣烏杳無語。樓心有窩深復深。白雲當晝生秋陰。少焉因倦閉窩睡。咫尺華山無處尋。邊城一夜失關左。到處黑灰揚劫火。雕檐畫棟飛上天。介馬十年戎事夥。秦吳羈府相望開。銜命使者勤往來。中流倚櫂蕙西顧。矯首故居安在哉。風流最愛王記室。結攬江山歸彩筆。繭藤一尺破憂思。鬱悒心胸盡消失。吾聞丈夫不爲無益悲。明日以往未可知。且當把酒對圖畫。碎擊唾壺歌我詩。君不見白雲一去雖不返。江上青山常在眼。待君恢復父母邦。重建新樓未爲晚。

君不見簡孫明

君不見文豹隱南山。又不見潛龍居淺水。七日霧雨甘忍饑。一尺風雷終滌恥。丈夫變化自有時。刺客誰能困鄉里。爲豹爲龍總未知。切勿輕看游俠子。

吳興才人歌爲沈文學賦

吳興才人沈亞之。曾懷寶礦獻春闈。璞頑采晦世莫識。萬里江南負笈歸。歸來破屋壓江水。馬斃僕疇容色死。勞勞空惱瘦王孫。扼腕長歌淚盈眚。有孫有孫能讀書。懷寶不進非踟蹰。短裙破帽蔽風日。落拓長途驅蹇驢。東南大府求賢急。華館雄開君不入。商歌金石振秋風。別足羞同卞和泣。平湖鏡靜九峯青。萬古乾坤一草亭。寄謝天官賢太史。不勞仰望少微星。

新豐酒贈馬敬常

丈夫重功名。結交須死友。道逢馬賓王。一作富貴樂少年。貧賤淹老醜。結交馬賓王。共飲新豐酒。燈前快意且高歌。莫管明朝遽分手。夕陽衰草長亭柳。萬古英雄此中走。勸君痛飲勿固辭。更飲爲君沽一斗。古來流落多不偶。韜裏雄刀作雷吼。不用閑噴逆旅兒。彼識吾曹是誰某。君馬駿。我馬輕。起看東方明未明。與君會食長安城。

春山行

須彌削出金芙蓉。青蒼萬古摩元穹。丹砂豈緣闈靈壽。七十二候常春風。金骨仙人祕靈寶。蟠桃花下金

光草不知壽與天齊傾。但見羣真頭白早。君不見十八公封五大夫。根盤琥珀枝珊瑚。與君繪作春山圖。

赤松仙人歌

赤松之山上有宮。赤松仙人騎赤龍。虬鬚插戟動成把。七粒五粒皆龍馱。茯苓入地多神功。琥珀照人如酒濃。千年老幹足高壽。誰識城南十八公。青牛奔走快如鹿。幾見劫灰然若木。貪生不數漢文成。白日閉門空辟穀。天上金銀十二樓。一彈指頃三千秋。吾將永棄人間事。馭氣排風從爾遊。

鹿皮仙人歌爲鐵崖先生壽

鹿皮子。方瞳眸。曾從羣仙登瀛洲。海風高寒不耐冷。帝命王母錫以漢武所獻上林白皮幣。月娥親手裁成裘。副以華陽巾。佩以蒼玉球。授以丹臺長生錄一卷。白玉兔白飯以元雪三千秋。歸來人世忽已換。九霞文毛至今溫且柔。玩珠之峯洗玉之湫。醉跨茅君赤虎。戲騎老子青牛。東方小兒蒼隱語。南極老人躬點籌。鹿皮子。壽與五總之龜伴。老仙開筵席長流。神仙老嫗彈箜篌。幔亭仙客起舞且謳。老仙一飲千日酒。南山爲俎海作甌。君不見碧紗帽上二十萬錢不得留。九十榮翁帶索行不休。賢哉鹿皮誰與儔。優哉鹿皮誰與儔。

橘洲行

太湖之水分三支。注爲長泖東去無已時。泖灣之口有大橋。一樹盤盤蔭門楣。里鄰呼爲橘洲衆所知。洲

之上。橘之下。矮屋六七間。皆茅茨。孝子萬生三世以來。皆居之。生衣無綾錦華。食無肉作糜。讀書談道操履。步步以古哲自礪。不肯苟爲。堂有老親。白髮垂。必須甘旨備。二膳家貧不常得。十年客寄。爲人訓其兒。所得金。悉以爲奉母資。母病下痢。不能自潔。生卽棄業歸。取中裙。湔浣穢。手奉虎子。晝夜伺母。不使牀席沾淋漓。母有女。贅狼壻。不識孝義。惟務利。日思剝取。生家貲。甚至湯藥之費。亦來掙尅。生卽與之無吝詞。惟恐致鬪。傷母慈。使母不得差。以陷終天無窮悲。卒能護持。母病無恙。以終天年之壽期。噫。吁。橘洲之水清且漪。橘洲之橘碩且飴。飲洲之水。食洲之橘。誰無父母思。嗟哉萬生。孝義今古稀。我詩直欲追韓奇。此篇步驟。全是老韓。想見萬孝子不在董南下也。

玉壺歌

藍田四萬八千畝。玉子團欒大如斗。阿剛月斧巧斲成。外潤中虛可盛酒。金盤露。眞珠醅。春風吹水桃花腮。嗟爾玉壺子。攜壺何處來。老奴玉壺何以如意碎。亞父玉斗何以寶劍開。玉壺子云是玉京來。但知元石之酒可以千日醉。不知雍伯之玉何以千歲栽。玉壺子。吾當與爾澆塊磊。開雅懷。便呼王勣起。作醉鄉記。更喚李白重築精邱臺。鳳凰曲。鸚鵡杯。壺公狡獪不足法。玉筍山中歸去來。

玉帶生歌 玉帶生。端人也。事文山丞相。爲文墨賓。與同館謝先生。相友善。宋革。丞相殉國死。計開。生與翱哭於西臺之下。復悲。宋諸陵暴露。私相蓋覆。議以冬青木而去。後翱道卒。生今歸會稽。抱遺老人。生爲人端厚。強記默識。不妄開口。丞相素重相恩。賜以紫衣玉帶。至今不改其舊服。生爲人端厚。強記默識。不妄開口。丞相素重

之。呼召不以名。但曰玉帶生。故作玉帶生歌。

鸞刀夜割黑龍尾。碾作端溪蒼玉砥。花鑲鐵面一尺方。紫霧紅光上書几。銀絲雙纏玉腰圍。翡翠青斑繡

紫衣。金星鵠眼不敢現。案上墨花皆倒飛。景炎丞相魁龍榜。撫玩不殊珠在掌。背銘刻骨四十四。文山硯

書小篆四十四字云。紫之衣兮綿綿。玉之帶兮磷磷。中之藏兮淵淵。外之澤兮日宜。烏乎。磨爾心之堅兮。壽吾文之傳兮。廬陵文天祥造。血錄至今猶可想。謝公

古文今所師。西臺一慟神血垂。獨持老瓦出門去。冬青樹邊書憤詞。天翻地覆神鬼怒。九廟成灰陵骨露。

廬陵忠魄上騎箕。流落端生何所寓。抱遺老人生計拙。愛把文章寫忠烈。霜臺一夜電光飛。不必矮桑重

鑄鐵。

夏蓋山石鼓謠。鼓高一丈。徑三尺。下有盤石爲足。諺云。石鼓鳴。三吳兵。

臨平石鼓不自鳴。直待蜀桐魚作形。陳倉石鼓載文字。徒有鼓形無鼓聲。夏蓋之石或自鳴。蓋石一鳴三

吳兵。嗚呼。三吳十年厭干櫓。不緣夏蓋鳴石鼓。

玉龍洞天謠。至正己亥冬臘月廿一日。飲酒碧雲玉龍洞天上。其製。石室窈然。塚以粉。外植老梅一株。鑿窻引南枝。入座。勢扶疎覆榻上。花爛漫開。香溫馨浹膚髓。

時斜月在戶。寒光照映。如銀色世界。恍不知身任羅浮夢中也。是夜獨宿花下。賦詩一章云。

海風夜捲蓬婆城。金神飛下白玉京。爛銀壁立直上八千尺。盤陀頂結穹廬形。是何年。條嶽帝鑿成。東西

覈。又何年。巨靈老剖破。駢脅開雙橋。遂令混沌質。太極一判胚胎疑。畸鳥缺兔竊跳擲。二氣光燦如珠星。

玉龍精。劈空入。瓊鱗瑤甲聲錚錚。蜿蜒屈曲布奇勢。獨據巖險誰與爭。碧雲師。來西溟。跼蹙輪。駕雲駟。右執策龍鞭。左握縛龍纓。呼小巽。驅老滕。杖龍之脊鎖龍頸。扶龍之腦散作栴檀清。優曇曼陀出神相。盤空不下交撐擎。方牀水晶座。曲几雲母屏。姑射仙。不敢現。羅浮女。不敢迎。散花不染金欄縷。朝供自作天廚馨。碧雲師。不坐九眼觀。不閱三藏經。手把玉龍尾。吹作玉龍聲。玉龍聲。沈霜五更。月輪挂樹玉林側。參旂墮地天盤傾。翠羽叫夢東方明。洞天春回晴昊晴。

渡揚子江懷祖豫州

四海茫茫混塵土。中原興廢誰能數。神州陸沈自有由。後人空罪王夷甫。王夷甫。清談亦解語。人主英雄豈無祖。士稚終令神器資強虜。

靈竹杖歌爲奎上人作

南能老子留神跡。鉢裏毒龍枯作腊。山靈瘞向栴檀林。蛻骨年深勁如石。海東昨夜轟霹靂。頭角飛空二千尺。奎公一叱來掌中。喚作鏗鏘紫篁策。紅銅鸞跽鸚鵡喙。黑節磔硯狻猊脊。色疑湘江栽。數合嶰谷裁。霞氛結雙縷。雨氣盤瑰腮。長身安尾八卦披。鮫胎杖兮杖兮異形質。不比江心桃竹堅而實。天祿爍火明一室。葛陂風雨夸幻術。韓公赤藤可以拗而屈。衛公方筍可以規而漆。孰若紫篁策。歸之靈鷲翁。嗟嗟靈鷲翁。胡不攜爾杖。往獻天王宮。截爲二十四管陰陽筒。吹作七十二鳳聲。雌雄調六氣。宣八風。載令黎庶

歌時雍。功成歸臥西螭峒。

贈鐫碑王生歌

太湖之水通吳淞。綠波冷浸青芙蓉。巨靈神斧斫不去。帝命留與歷代賢。鐫奇功。奇功曠世信希有。至德乃可齊不朽。嗟哉王生習此藝。功德不逢長袖手。虞黃歐揭牛毛多。筆端佞語如懸河。銀鈎鐵畫銜奇麗。天下匠石勞磨礱。王生手握三寸鋼。肥深瘦淺能自量。神椎輕重心應手。白蠶食鐵森成行。詞嚴筆勁逼晉漢。學士何人美詞翰。宵亭五彩護龜趺。峙立通衢人不看。人不看。恐淚垂。晉朝羊公今爲誰。高山深水苦自置。後世誰人想見之。王生王生女當知。功德豈在多文辭。君不見延陵季子碑上僅十字。千載萬載生光輝。

玉斧歌

吳郎璞中半規玉。曾向廣寒斫金粟。狡獪鑿齒怒舉頭。五尺長柯插天木。銀花裹腦金盃脣。五色天空磨石火。劍脊條成偃月稜。光涵露珠三百顆。藍河水澗巨神走。白鶴高旗懸紂首。瑤瑰合就水晶蓬。雲掩般門。雙袖手。雷聲夜破妖蟆腦。月殿重輪間七寶。九天八萬下天丁。右秉金旄肆天討。凶門未出左黃鉞。玉斧鋒鋦利如鐵。白蛇不哭卯金刀。斫落豬龍半天血。

壽客堂歌

窩存朱梓氏。替生羅檀樂山下。繞籬種菊。創堂其中。扁以壽客。調歌於余。乃爲之歌曰。

綠雲檀藥赤霞小。壺中雞犬忘昏曉。華鯨叫落青娥愁。夢壓錢鏗歲年天。石門潭水流甘芳。樓船浪隔長生方。繁英咀齒嗽香玉。百歲上壽如南陽。海風吹折蓬萊島。九節菖蒲石上老。童兒五百不歸來。仙磴青懸斷腸草。東山公主魯朱家。方頤玉頰塗丹砂。寒香五彩富秋色。七十二種金銀花。陶公一去秋無語。千載東籬悲失所。清霜九月曉生稜。紫土新阡開別墅。黃金落英白玉船。鳳笙龍管朱絲絃。元鵝對舞老鼈笑。誰識孺子爲神仙。秋風西來秋露白。高陵五美爭奇跡。百年過客醉清觴。手把黃花題壽客。

玉笥集卷五

古詩四

野亭

肅肅野亭。在彼中野。眷眷隱君。寢處其下。修竹映戶。華松覆瓦。闌楯高明。檐楹瀟灑。豐草鮮茂。雜花妖冶。絃有清瑟。飲有文斝。遠青層來。平碧概瀉。言命輕車。言駕瘠馬。臨流暫坐。釣絲時把。詠歌雍容。意思閑雅。情越羲軒。氣劇屈賈。清風古今。知爾亦寡。冠蓋遑遑。彼何爲者。

題趙仲穆蘭竹

羃羃楚雲。漠漠湘雨。懷人東皋。送別南浦。秦虜不歸。重華莫覩。二女凝佇。三閭獨苦。惡棘蕩蕩。白石魯魯。撫卷潸然。淒其千古。

題袁子寧瞻雲圖

陟彼太行。瞻望白雲。哀哀父母。疾呼不聞。彼陶者瓦。爰覆我廬。豈不興念。歸讀父書。王事多難。靡遑止居。束束者竹。肅肅者木。有石可憩。有泉可掬。閒哉歸去。毋亂心曲。白雲英英。東南是征。豈不欲往。誰與同行。道阻且修。莫知所經。陸則可輿。水則有舟。嗟我昆季。欲見無由。匪兕匪虎。匪蛟匪虬。白雲蔽空。八荒同陰。

瞻望弗及搔首沉吟。展圖莊對聊以慰心。

畫梅

溫溫春陽皎皎冰雪。小橋竹外天然幽絕。夷清惠和二聖孔并。報彼色媚望君德馨。

方寸鐵爲印工盧奐賦

唐有處士曰賤臣。全心一寸鐵。正直以剛。誓劓蟆腹。還明月光。又有奸相曰李十郎。腹懷利劍。人莫敢當。一正一邪。不翅臭芳。爾奐後出。方寸錚錚。不藉鍛礪。自成利鋼。斂鋒蓄銳。戲我文場。鐫斯刻籀。用代筆耕。惟多事秋。所在侯王。載玉其符。亦金其章。頑石獻諂。赤伏貢狂。奐不往刻。立取富榮。嗚呼。奐鐵孔方。奐心孔長。持爾利器。往獻我皇。刻秦階符。俾天下昌。無俾爾祖。專美有唐。

賦得孟軻隱几

文樞鱗鱗。烏皮皴皴。君子所憑。天天申申。宴安氣勝。乃有假寐。彼大賢者。胡寧有是。鱗鱗文樞。鷓鷯烏皮。長者見絕。蓋亦弗思。

諸葛武侯像

羽扇飄飄。給巾蕭蕭。渭原星墜。梁父寂寥。

古詩

五

呂梁洪彭越廢

黃河東南奔。呂梁屹相向。蕭蕭彭王廟。淒然據其上。空山貌秋色。衰草蔚長望。荒煙薄殘陽。柔櫓破寒浪。彭王古莊士。志節素豪宕。徒成百戰功。不獲寸土葬。哀哉虎兇軀。竟作柙中醬。可憐黃金甲。綵繪泥土像。佇想忠壯魂。陰風幾悲悵。憂來不忍去。駐馬更悽愴。

經東阿城

馬鳴西風長。赤日在高樹。輕車東南征。疾驅恐遲莫。俄經東阿城。蕪然峙中路。空垣烏鵲起。遺跡瓦礫聚。荒衢蕃草莽。陰穴竄狐兔。不見煮膠人。舊物井如故。尙憐齊大夫。投鼎有餘怖。淒然耿弇迹。寂寞曹植步。我行亦須臾。相看等朝露。

汶陽道中

汶水東入海。疾流無已時。可憐齊與魯。荒草秋離離。日澹野水黃。風高木葉飛。繫舟閑弔古。不覺淚沾衣。

任城道中

客行魯橋道。路出毒山驛。驅車上峻坂。歇馬道傍石。雨來松樹暗。風起荷葉白。一笑嘆浮生。胡爲倦行役。

汎舟黃頰湖望梅山

汎舟黃頰湖。望見梅仙山。巖巖結寶髻。轟轟浮銀灣。長風蕩青蘋。雪浪相飛翻。魚龍現怪誕。水怒山自閑。

詎知神靈意。杳在虛無閒。緬思學仙尉。一去何時還。幽姿不可見。高風邈難攀。落日動簫鼓。把酒酬潺湲。

冬夜聞雷有感

陽氣渙不收。梨花開九月。無何元冬夜。火靈飛列缺。疾雷放芻甸。大雨久不輟。頑雲聚復散。淫風赤如血。蟲豸不入藏。龍蛇競出穴。寒威變融煥。四序失故節。胡爲數歲中。雷向盛冬發。委靡不執柄。遂爲羣陰竊。及其不可忍。奮迅始一決。乃於溷寒時。礮礮未肯歇。龍戰久不解。險難紛糾結。旣乖長養意。愈使威權褻。天怒不終朝。王綱有時裂。何能堯吾君。調理繼稷契。先事誅權奸。以次及羣孽。假爾霹靂車。爲吾左黃鉞。普天新號令。坐使萬國悅。煌煌世祖業。中道復光烈。

詠窮博士

五日張京兆。猶能故殺人。一年窮博士。不救歸裝貧。深冬未衣絮。坐席長凝塵。愁吟蒼蠅叫。怒作蝦蟆噴。冷撥豆稽火。倦臥黃茅茵。饑來捕雀鼠。夢裏騎麒麟。不知貧作祟。猶道詩有神。商歌滿天地。聲響驚比鄰。歌罷自激勵。慷慨豪氣伸。揩摩雄膽略。棄捨貧賤身。左挽祖士稚。右指周伯仁。往殺諸賊奴。救我饑餓民。出門復歸來。擲劍一長鋌。天狼大如月。七將空橫陳。

贈吳仲舉

手擎白錦鷹。日暝剡溪曲。人語狡兔起。犬行山雉伏。春草足繁露。秋風多落木。雖非封侯相。不負食肉腹。

厭厭窮經士。閉戶糜蠶粥。

秋日山寨校兵呈同列

露下草木空。四山秋色峻。起持餓鷗弓。習作長蛇陣。旅分羆虎徒。翼若鷹隼奮。文成牙旣禡。血祭鼓亦鮮。日光耀旗影。霜威肅兵刃。翕張更坐作。勇怯迭退進。徐如磨蟻沿。忽若奔馬迅。向背月翰偃。孤虛斗杓運。渭原識諸葛。泚水見韓信。雖非勅敵遇。敢忘出門慎。堂堂固莫遏。整整孰敢近。哀哀白骨堆。纍纍黃金印。縱無東可平。豈患西難鎮。誰爲人中雄。往雪天下憤。盡取羈縻域。帖然作州郡。

秋日古城葉希聖見訪

夫君滄江來。訪予清溪曲。清溪窈而深。佳氣散天旭。塘蒲澤新雨。秋意冷可掬。鳥鳴萬山靜。猿下雙樹綠。相看語清晤。餘響起空谷。坐久神宇閑。斜陽在高木。

西溪出巡寄鍾君顯沈宏道

今日天氣佳。整隊適近郭。溪迂水聲緩。峪逼山勢惡。曲折盤羊腸。縈迴行棧閣。前驅迭隱見。後至猶釋絡。虎鳴彩旂動。鳥起柘弓曠。試問捫蝨談。何如逐禽樂。

於潛點砦經托和齊右丞戰地

路迴山麓交。直壁萬仞立。浮嵐滴空翠。下浸澄泓溼。長楹拱天嶽。壞道駛礪急。眷彼岩險勢。一夫自敵十。

要地不力戰。崩奔胡可戢。哀哀左轄公。馬革臥原隰。孰知王師重。戴首奉賊級。我來訪戰地。一慟已莫及。日入鬼燐生。陰風國殤泣。

自臨安往富春過芝泥嶺示隨行李巡檢

平明升肩輿。相與東西征。浮嵐翳遠道。宛在雲中行。連山互低昂。曲折如送迎。接天蔽喬木。澗與風爭聲。前登芝泥嶺。雨意漸覺晴。曛曛日色薄。蕭瑟衣裳輕。畏途見鹿角。高砦屯鄉兵。綵旗病目眩。嚴鼓羈魂驚。憑軾若夢寐。撫髓傷浮生。願謂李飛尉。我行猶幾程。

臨安道中先寄賽景初

朝入臨安山。暮上由拳嶺。周道無行蹤。晴空斷飛影。嚴關固高柵。疊嶂列危屏。荒坳斜日淡。虛市野煙冷。息肩坐茂樹。瞑目發深省。何庸馬蹄塵。兵鋒迭馳騁。

我夢騎赤龍

我夢騎赤龍。謁帝白雲庭。帝方奏大樂。鈞天聲泠泠。木公起獻壽。金母持銀瓶。麒麟伏坐下。鳳尾芙蓉青。蟠桃大如斗。一啗三千齡。太乙顧我笑。冷風吹面醒。

臨安遇革鞞

革公東方來。面有和悅色。長裾曳麻袍。散髻岸紗幘。袖書謁大臣。唾手捨恩澤。亟歸裝刀頭。買馬來擊賊。

送周尙文

手把五色筆。人呼老畫師。忽騎六尺馬。便類幽并兒。袖中安漢書。篋裏平淮碑。丞相方進賢。有志當及時。酒盡便可去。少需猶未遲。

壺隱

四山如仰壺。環護深洞府。白雲齊鶴飛。竹杖作龍語。劍術走猿公。簫聲下鸞女。曉來溪水深。零亂桃花雨。感感戀里閭。悠悠感時光。朱顏既易去。樂事何能常。不有一日功。安流百世芳。起行亂石閒。坐近流水傍。舉觥意頗適。浩歌情復傷。念彼保衡心。忍將天下忘。

贈石畊子

柳上多異人。近見石畊子。黃金鑄犁頭。白玉磨耜齒。朝鞭滄海龍。夜灌天河水。種成五色璞。幻成一萬紀。上補星文空。下堵天柱圯。庶息共工爭。少佐媧皇理。瑣瑣田舍兒。秋成望糜芑。

中秋小芝山望月

涼飈起山阿。零露下溪曲。沉沉萬籟靜。浩浩一氣肅。明河瀉匹練。白月挂團玉。庭柯棲鶴動。塔草寒螢煜。願瞻不成寐。興歎忽在目。雄才值休運。壯士恥雌伏。風雲奮英會。談辯騁鄙陸。寄謝我輩人。相期習馳逐。

遊仙

處世厭兵火，憫生悲歲華。安得乘浮雲，游彼仙人家。下視萬蛙螾，擾擾成泥沙。東望俯陽谷，凌晨滄太霞。青龍與白虎，簇擁金銀車。但恐匪仙骨，腐爛如潰瓜。

懷古

魯人不傷麟，楚狂豈歌鳳。王風逝莫追，五伯才一閔。古今等飄風，興廢迭醒夢。舉手招麴生，今古兩相送。

仲溫畫扇上作假山樓蕉梧竹

樓欄覆牆陰，芭蕉上窗綠。涼風起高梧，白露下叢竹。明月照假山，雁啼人未還。砧聲不出戶，心在玉門關。

柬宋仲溫

宋公陣右孟，楚子駕左廣。陵轢戎車奔，奮迅介馬駟。力爭良可念，幸勝未足傲。矯矯魚腹磯，石磧盤巨蚌。縱橫六十四，餘奇握在掌。衡軸示其端，機衝應如響。我欲仿佛之，伊人竟長往。按圖得其妙，不覺稽吾顙。君非米家狂，胡爲技云癢。爲君聊發蒙，睫前辯霄壤。

贈葉秀才

伏劍作說客，愧非縱橫時。漂流闔閭城，僕痲病馬遲。黃金亦併盡，困頓所不辭。獨憐懷寶腹，日肝方及炊。雖則貧有餘，不爲無益悲。賢哉顏巷樂，瓢飲吾其師。

感憤首二

手持一丈槊。坐跨八足馬。力可敵萬人。英氣邁古冶。四郊政多壘。國恥尙未洒。安得大風歌。爲君貽勇者。汗血產渥洼。其名號赤兔。高蹄踏生鐵。未許泥水汚。生猛不可騎。惜今無呂布。牽去駕鼓車。雄心向誰訴。

感寓首二

秋風吹芳草。日車縛不住。素絲變青髮。新人漸成故。莫嗟功名遲。政爲讀書誤。昔賢雖達道。不免在邱墓。我騎白鳳凰。清風上天去。遲日照芳辰。晴光在楊柳。行樂須及時。況茲樽有酒。綠髮美少年。烏馬犀匕首。一笑千金輕。章臺街上走。賈生多讀書。白骨同一朽。

潛齋

驟進易劓辱。藏修或得名。與其志聖賢。不若心孩嬰。誰知六椽茅。下隱極品榮。歷山與雷澤。萬古可與耕。大舜且不辭。況茲常人情。君看霄漢顯。孰似淵泉清。

觀倪元鎮王叔明畫

柳長女垣低。桃開小樓近。凭欄望春色。撫髀歎天運。主人愛遠客。清酌倒芳醞。坐深籟有泚。飲餘臉生暈。黃鶴素豪宕。雲林靄聲聞。畫圖寶名筆。詞章騁雄韻。諷誦心神驚。披閱目力紊。予生慕管葛。殘剩苦拾掇。

君教本家庭。翰墨抱遺訓。清顏羨軒昂。白髮厭孤憤。仰珍明月珠。俯愧蜚蠅糞。高玩固可憐。退思當自奮。

除夜^{三首}

今日歲云暮。歷日忽已周。自憐不成寐。靜坐思所由。匪無濟時心。秉鈞徒廟謀。豈以廣博材。著述驅窮愁。平生萬金璞。三獻不一酬。竟成唾面馬。不揅失水舟。何如攘六鑿。保舍全天游。放形大化門。逍遙追浮邱。梗梗集中抱。脈脈有所思。明當是四十。前悔那可追。雨潦促歸夢。畏途瀕海涯。豈無鄉井念。欲往將安之。焉得御風術。遂我懷歸思。臨觴不及樂。空成游子悲。跼蹐數時光。鬱悒歎人事。寒暑終變遷。盛衰常彼此。宇宙無窮年。人生安得已。天人互定勝。帝德自光被。嗟余蟻虱然。中處聊復爾。窮愁苟未盡。擾攘亦茲始。

題王克孝二十四孝圖

惟孝先百行。惟子乃克之。問子何以克。帝舜吾其師。父頑而母嚚。乃是舜之孝。苟非處其變。奉養亦常道。不以克自揭。孰知志乎舜。裂素以寫圖。庶使觀者信。寥寥數千載。孝行耀青史。圖今止若斯。餘豈非孝子。侃侃貢公說。英英周子書。舉圖授其概。自可見其餘。嗟哉客省吏。三公出自茲。永持食祿心。常作奉母思。忠孝不兩途。臣子匪二身。今日之孝子。後日之忠臣。謂以子餘年。事君如事母。高步追昔人。珠璧耀前古。方今風塵際。大義鈔不踰。願言存壯節。繼寫忠臣圖。

春日陪金達可張習之僧祖平燕申屠仲耀氏

晴風蕩新柳。春意滿陂塘。幸逢二三子。同上夫君堂。劇談到時事。清燕開蘭觴。念茲兵燹年。風景殊故鄉。總戎豈乏賢。軍氣胡不揚。曰子好奇計。豪宕無由嘗。乃令鼠蟻輩。撫劍歌慨慷。賢哉兩申屠。伯仲雙玉璫。髯張大雅士。雲漢飛鸞凰。睦睦金義門。七世行彌昌。席端見謙德。愈覺尊而光。平公古墨氏。詞藻葩天章。雅情雜談笑。懽樂何茫茫。卻憶圍城中。黔首紛彷徨。析骸給饑饉。易子充枵腸。豈無華元心。夜登司馬牀。懷寶不見用。坐待歲月亡。矯矯平津閣。而登白面郎。

題畫

浮雲浩茫茫。靑露兩崖壁。十尋滴秋潤。萬頃停春澤。渺渺沙渚蒲。昏昏土岡柏。豈無舟楫渡。奈此仙凡隔。瞻彼鶴髮翁。嗟予兔園冊。默默與世忘。虛亭坐生白。

枕上感興

客枕不成寐。丙夜猶展轉。香銷篆文灰。燼落燈花翦。露下林噪烏。月斜巷鳴犬。鄉心梗寂寞。歸路際屯蹇。拓疆良在念。擇木詎忘覲。嘉猷固久抱。忠憤欲誰展。豈忘藩籬護。奈此蹄涔淺。伊昔山水郡。屢興詩酒宴。勝覽熟輕輿。幽尋狎芳甸。空翠洒心目。輕紅破顏面。清流朝澄澈。密蔭鬱葱蒨。猿鳥各欣適。魚龍更變現。繁調翕寶瑟。雄儒集珍硯。妙境眇隔世。良辰迅馳傳。愛來竟作惡。事去漫興羨。北辰位極高。南州禍方熾。

何人靖妖孽。普天罷征戰。沛澤被草木。餘光照寒賤。一席倘再溫。百廢或興繕。殘喘苟未盡。太平庶幾見。

我有首二

我有駢角弓。百步能破敵。力強不受弊。材美陋越棘。時能斃飛將。萬騎莫敢逼。翻翻鐵絲箭。刻刻金爪鏑。鼓寒霜氣重。應手響霹靂。豈惟射渠魁。眼中已無敵。雄哉兩鬣健。儼若左右翼。時來亦大用。不偶直暫塞。我弓雖少置。未許楚人得。

我有鴈翎刀。寒光耀冰雪。神鋒三尺強。落手斷金鐵。在昔臨元戎。志在除草竊。怒來死不顧。決背肝膽裂。老蛟遶腰臥。夜枕寒泉冽。維時誠女賴。豈忍時暫輟。中途偶棄置。竟踐秋扇轍。塵埋土花暗。繡澀神氣滅。思之終永傷。默坐慘不悅。敢忘漢宣詔。不負呂虔說。金風吹秋郊。賊馬政侵軼。又當攜女去。舊義未遽絕。莫瑩鸚鵡膏。恐污荆卿血。

送嚴掾從軍

昔登淮安城。四面望楚國。韓信釣魚處。水落石崩崩。方其不得志。俯就婦人食。磊磊胸中奇。固非俗眼識。君去終作掾。而有自得色。竊窺步驟閒。抱負已莫測。堂堂熊虎軀。傑立萬夫特。必能樹奇勳。歸解衆人惑。毋俾淮陰侯。地下三歎息。

趙奢簿書時。已能不撓法。及其居大任。一戰斬秦甲。笑談解圍城。豈問道險狹。嚴掾抱奇器。意豈在筆劄。

平揖左轄公。從容借前筴。梁宋齊魯郊。東西久持夾。敵情指顧閒。咳唾隱顛跣。誰云擊搏使。褶袴事蘇軾。沈船防夜渡。秣馬備晨壓。拙速勝巧遲。哀哀民困乏。

哀蒼頭

蒼頭何地客。來在浙江東。母逐錢商去。父兄歸務農。力綿不足使。齒弱未禁庸。襤褸衣裳薄。倉皇途路窮。攜來客窗下。給役過殘冬。蝕舌蹇蠻語。瘦軀餘病容。鑿冰汲泉水。踏雪遞書笥。所愧資儲狹。深防用度豐。無金施惻隱。有恨寄怔忡。空慚李長吉。短調問巴童。

次韻周履道爲予題所畫山水

突兀久遁日。嵒嶽思盪胸。故原忽在望。蒼翠疊重重。削鐵下直壁。潑黛然晴峯。百怪遞走現。萬媚爭來供。輭裊記獨坐。幽屐懷孤蹤。澄藍止水靜。新綠嘉樹濃。前瞻甫沒鳥。右顧方來龍。依微霽色敞。窅眇數聲鐘。隱心紛俱集。勝事諒難從。幻境且自怡。真樂何由逢。不惟步劇韻。亦以寫愁容。

席上

彼美孺林姬。綠雲何盤盤。清歌珠落斗。妙舞玉成團。風急酒暈薄。月斜花露寒。翦燈續殘醉。把袂接餘懽。雖非長夜飲。猶勝萬錢飡。

次韻吳近仁

昔騎千里馬，首絡黃金羈。馳射麋鹿場，麗龜以爲奇。鞍心置鐵鎗，腕下懸銅錡。壯心久落莫，功名安可期。

送陳惟允

抱劍入帝都，未知何所求。觀其辭氣閒，已類朱阿游。肝膽正激烈，旣悲還復謳。欲銷天下難，先斷佞臣頭。

浩歌一章

少小恥讀書，袒裸習槍楛。雄心不自禁，氣壓楚諸項。怒提彭城師，能使睢水絳。四十未得祿，蔬食伏陋巷。始悟平生狂，適增木然慙。憂來發浩歌，忿激聲不降。精誠上感天，貫日生白虹。

對雪示張髯

陰沴妬人日，苦寒逼燈宵。虛齋對春雪，況值驚騰颺。吹去映空沒，飛來著砌消。深憐役夫恨，荷鍤上河橋。

題畫

愛此溪上山，結茅斷橋裏。停雲宿檐阿，積雨上階址。嘉樹生秋陰，扁舟蕩春水。晨鐘上方來，日高人未起。

玉筍集卷六

古詩
七言

送鐵厓先生歸錢塘

時新除江
西提舉

團花染累吳蠶繭。五色文綾出金翦。海風吹度滕王宮。南浦西山畫簾捲。天狗夜吠聲如雷。東奎西壁昏煤炰。土洲自可駕黃犢。鐵箸何用畫寒灰。牛酥燭花春未老。湖上同誰翦芳草。真珠酒瀉紫蒲萄。金錯刀鐫紅瑪瑙。六橋楊柳香霧深。吳娃一笑千黃金。莫邪不作老龍舞。鐵管自成丹鳳吟。輾輾送別湖源道。江花照人日杲杲。長風吹送書畫船。先生眼空方醉眠。

唐五王擊毬圖

興慶宮前春正熱。綠楊夾道花如雪。毬門風起日西斜。五馬歸來汗成血。潞州別駕醉眼纈。雙袖傾欹擁岐薛。申王按鞞宋王馳。杖撲毬囊手親挈。草平如掌馬力均。玉鞭十里不動塵。黃門扶入五花帳。大衾長枕如家人。花萼相輝雨氣寒。樓中歌管漸闌殘。紫駟不踏毬場路。萬里青驄蜀道難。

中秋碧雲師送蟹

天風吹綻黃金粟。簷前老兔飛寒玉。客窗不記是中秋。但覺鄰家酒漿熟。柳田秋霽稻未鎌。葦箔竹籬收

團尖紅膏溢齒嫩乳滑脆美簇簇橙絲甜無腸公子誇嬰饒兩戟前驅終受縛歷心晝煖白玉臍照眸夜泣紅銅殼麴生風度亦可憐且對霜娥供大嚼酒後高歌繞碧雲九峯一夜霜華落

天香閣觀王元章梅次其所題詩韻

天風閣下秋氣清上人邀我閣下行舉頭驀見王冕畫使我塵埃雙眼清摩挲素壁如鏡平上有萬點冰花明若非華光騁三昧誰使造化驅百靈繁枝久不林下見老幹忽來堂上生拳攣礫魄鶴膝凸屈曲盤拏猿背撐薄寒似覺霜氣勁慘淡似有參星橫酒家門前曉月落羅浮夢裏春風輕枝閒積雪擬待伴樹杪翠衣疑有聲皎如姑射太綽約靜似處子多娉婷鐵心石腸不挂念冷蕊疎香偏動情短籬倒照日杲杲野橋春水波泠泠空懷孤山已半世不到西湖今十星何當結茅里閭近相與把杯懷抱傾閑扶竹杖石上坐起持鐵笛風前鳴君不見梅花艇子浮如萍浮遍鑑湖八百里胡爲送死將軍營嗚呼胡爲送死將軍營

松隱圖

松陰道人松作屋漁松衣松松下宿秋簷露溼女蘿衣午窺風香扶苓粥華頂神遊跨白鸞繁陰獨步攜青鹿也識秦封解汚人十年夢斷丁公腹餅輕花粉試新黃液熱天漿沸醞醪卻笑張良見事遲老盡容顏方辟穀

青山白雲圖

青山青青白雲白。一尺小溪千里隔。扁舟橫岸不見人。雞聲何處秦人宅。桃花流水春粼粼。不識人間有戰塵。待得紫芝如掌大。歸來甘作太平民。

贈答薊邱菡茂宣

憶昔往弔望諸君。曾識燕南屠狗者。昭王臺前春雨晴。綠柳陰中共馳馬。短軀五尺頗精悍。插戟黃髯不盈把。青樓買笑土揮金。紅粉供筵龍作鮓。酒酣慷慨發悲歌。老淚滂沱苦揮洒。美人亦起撥四絃。密怨濃歡一時寫。漏深丙夜不肯睡。剪刀落盡銀燈池。馮陵大叫不自知。豈問軒駒有旁舍。皇帝神聖丞相賢。廣寓承平樂有年。文華正富膽力盛。牀頭況有黃金錢。雄豪自許魏無忌。氣岸誰推魯仲連。淹纏歲月不知老。豈信朱顏易枯槁。門前客去金亦盡。故國歸來空懊惱。十年干櫓苦風塵。碧血白骸蔽秋草。武功不就文業荒。悔不當年致身早。飄泊江湖未有涯。南北東西營一飽。薊門學士燕南豪。平生恥交兒女曹。憤來幾欲擲敗筆。老去猶思撫大刀。胸懷磊落厭譎詐。狐媚每笑奸人勞。報仇不搏韓相死。籌邊肯使單于逃。家徒四壁避風雨。儲無儋石充烹庖。撐腸拄腹十萬卷。光燄自與山岳高。蹇驢一旦去京國。扁舟萬里衝洪濤。詐齊儒魯兩蠻觸。勾吳於越雙鱗蝮。眼空四海礙兩脚。身小九州輕一毛。空懷長策繼董賈。未忍嘉遜追由巢。竭來水國共作客。一見便爾悲綈袍。軒昂惜不霄漢遇。老鈍乃爾窮途遭。窮途相遭兩無那。君

政窮愁我饑餓。神交契合不忍離。風雨茅齋數相過。瓦盆濁醪爲君酌。劇韻長詩招我和。狂心頓忘新蕩
煩。癡情猶懷舊驕惰。詣君脫巾下牀坐。容我解衣上牀臥。片時高興且睢張。萬斛濃愁總摧破。須臾起立
爲君賀。一片雄心勿輕挫。但當飽食待時需。會有天書覓王佐。顛連困苦未足憂。富貴從來伏奇禍。

李嵩宋宮觀潮圖

磁州夜走泥馬駒。臥牛城中生綠蕪。炎精炯炯照吳會。大築錢塘作汴都。玉殿珠樓連翠閣。七寶籠櫺敞
雲縠。生移艮岳過江南。不數東京舊懽樂。茂樹盤盤迷綠雲。龍飛鳳舞峯巒奔。玉牀下壓大江小。海水正
入東華門。木樨花開秋可數。統統靈囂振天鼓。海門一線截江來。雪壁銀城晝飛舞。吳商楚賈千萬艘。黃
龍戰船頭尾高。豈無海道走中土。長驅逐北乘風濤。煙霧蒼蒼繞城郭。屋瓦魚鱗互參錯。百萬驕民事醉
醺。坐使中原厭羊酪。因循六帝不復讎。西風八月凭江樓。攢宮人飲白骨恨。洪波不洗青衣羞。邦基削盡
師臣逐。軹道人降子嬰。哭繡胸文錦踏浪兒。反首誰能報君辱。廟子沙頭卓大旗。天吳縮頸不敢馳。行人
指塔話楊槌。三十六宮秋草飛。

董羽龍

南山隱隱雷作聲。北山油然雲氣生。蜿蜒百丈走神物。海水壁立青天崩。南陽董公苦揮灑。百世誰能辯
眞假。鯉魚夜躍蜻蜓飛。腐甲頑鱗滿郊野。九重殿深天宇廣。不覩聖顏空悵惘。乃公別有三尺泉。爲爾往

誅當道蟒。

古城八詠 在宮陽
江南

黃公洞

辟穀功臣神骨腐。袖裏遺編竟何補。炎精火斷穀城祠。二十四陵皆黑土。深山窮谷多春風。十月九月桃花紅。篝燈煮石自卒歲。廐將不煩隆準公。

黃巢寨

石徑山前夜飛矢。金色蝦蟆渡江水。千年碧火照黃坑。鹿角蒺藜圍故壘。黑風搖關金統破。人骨糜成鋒已挫。怨魂不捨入仙營。哭聲夜繞陳州磨。

金雞石

黃道荆榛鬱儀死。跣足趾閒生黑子。紅光相盪白晝昏。中夜惡聲四旁起。絳衣朱幘天下雄。時乖亦隨星殞空。誰能琢枕獻天子。一聲啼白扶桑東。

驪珠石

秦皇鞭石石入海。驪珠領下生光彩。金聲扶上碧壺顛。五色燭天光不改。共工觸山梁棟搖。百川震蕩海水號。何當用爾作大礎。穩托不周天柱牢。

棲鶴巖

霜崖壁立秋風肅。野鶴東來巖上宿。老拳夜握煖爪禽。義心誓磔饑蛟肉。通都大邑狐狸號。鳳凰無語鴻鶴逃。銀黃兔鶻不下擊。紫鞵空用金鏐鏐。

棲鶴峯

遼東失卻丁令威。赤壁夢裏橫江飛。明河洲頭槎已爛。千歲去家今始歸。晴峯歷歷入雲小。獨立秋空望華表。華陽真逸上清來。鐵笛一聲山月曉。

黃天籟

昆明劫火燒成灰。臨平葑湖撥不開。黃泥萬頃下無底。海眼一線通往來。南徐江邊海鱗走。江神頓足黃龍吼。便翻銀漢濯泥沙。要此妖蛇先授首。

來青閣

宋大理丞馮驥讀書樓也。宋亡。驥戰死。獨松閣下。

獨松閣下忠魂歸。明珠洲邊樓閣飛。怪底青山在屋裏。戶牖自能吞翠微。神芝名山一朶盪胸舞。翠滴寒光溼秋雨。諸孫炙盡竹書青。從此襟懷小齊魯。

題竹雪齋

去年曾賦竹雪謠。今夜適來齋下宿。入門見扁已不凡。推窗縱觀清可掬。長竿挺挺森似束。密葉錯金幹

栽玉萬鞭走地虎。春露千梢拂雲鬢。尾曲大嚼雖無筍可燒。雅歌剩有詩堪續。肩輿竟造欲誰共。把筆狂題許吾獨。經樓曉霽霧初散。僧舍秋高酒初熟。滿引觚稜滌塵慮。大拍闌干豁吟目。江南九月天尚燠。那有瑤光灑銀屋。扁舟興盡且歸去。雪裏再來尤不俗。老僧一笑萬山靜。幽鳥不鳴千樹綠。

菊潭爲顧子順賦

盤龍塘下潭如井。百尺甘泉冰雪冷。瓊蘂一勺露生香。能黑華顛駐光景。九月十月天雨霜。七十二種分秋芳。粼粼曉碧卓倒景。白者白玉黃金黃。咀菊之英飲潭綠。不數南陽舊甘谷。童子開門溜帽紗。報道新醅夜來熟。

題不礙雲山樓

遠山近水濃淡清。朝雲暮雲先後生。我樓雖小實空闊。雲自往來山自橫。山耶雲耶兩無礙。地久天長果誰在。渺茫蜃氣等虛空。縱有軒窗何足怪。爲愛雲山構小樓。看山看雲今白頭。山形起伏只如舊。雲溼雲晴知幾秋。開窗向山作長揖。長揖雲山兩俱入。推窗送山出樓去。山出雲歸樓自立。愚公好勤不奈閑。孫子子厭躋攀。眼空四海本無物。何事欲移門外山。

題壽老人松年圖

我昔湖上看眠松。蟠屈蒼龍陰十畝。青天晝暝雷雨黑。白日猶疑鬼神守。卻憶僧前如雨落。春雨新秧不

盈握。如今合抱復蔽牛。偃蹇輪囷臥邱壑。松下老僧金骨仙。親手種松忘歲年。倒持一尺白鸞尾。拄頰聽風當晝眠。茯苓作粥粉作餅。千斛松醪供醕酏。不用飛丹駐玉顏。前身自是陶宏景。人道大椿多壽齡。以松視椿椿未靈。根盤入地九萬里。劫火一番枝更青。

題畫柏

憶昔皇輿九鼎重。萬里荆揚遠朝貢。榘栝柏蔽江來。竹頭木屑俱成用。自從劫火煽孽風。豈有樛枝宿鸞鳳。翦墮伐廟鬼亦斂。拔石移根山欲動。戎車戰艦莫計工。塗肝碎腦空喧哄。斧斤不時入山林。毀圮樓臺禍梁棟。載民舟楫挽民牛。盡廢耕耘遠防送。孔明祠下根已無。黛色參天恍如夢。摩挲香葉望太平。何日可消天下痛。

爲唐元仲彬詠白雞

海南曾進司農鳥。黑骨白毛天下少。桃都雪後獲火精。陳倉月下逢陳寶。意態不殊韓上廡。搜身側目見者驚。玉翎冰翅逼人冷。半夜牀頭聞劍聲。長鳴自解作人語。何用嚶嚶叫風雨。賈昌輕薄宋宗恩。可惜雄姿久無主。槃跚獨步暗萬雉。紅冠滴露生燕支。昂藏勇氣莫敢抗。啼得晨霜皆倒飛。蓮花漏箭一百刻。三叫能令天下白。秋風吹荒蜀道祠。露溼螢窗對書客。

爲隱師題林若拙畫

阿師堂上生雲霧。突兀峯巒起縑素。元雲黶黶溼丹青。積翠爛斑落庭戶。漲空嵐氣湧波濤。噴石寒光飛瀑布。鐘昏煙寺僧未歸。澗跨板橋人不渡。黃茆幾簇尖頭屋。綠林一帶無根樹。茸茸碧蘚雨乍晴。恰恰黃鸝春欲暮。新水桃花溪上舟。閑亭芳草沙頭路。意匠潛移造化機。筆端想有神靈助。尙書在昔已擅場。弟子如今稱獨步。抵須指畫索我題。不惜長篇爲君賦。

張以文夏山欲雨圖

董元夏山今罕覩。名家所藏皆可數。海上張郎法度雄。胸次嶙峋獨追古。山腰孛孛雲氣吐。石頭流汗日當午。殷殷雷聲黑太陽。盛暑鬱蒸天欲雨。木葉颼颼風滿浦。收港小舟催進櫓。塢裏農莊八九家。政望甘霖沃焦土。山川高厚自有神。肯使膏腴成瘠鹵。我方憫雨而高堂。坐閱斯圖心獨苦。豈無手板對西山。瘦頰髮來不堪拄。

題高尙書畫

土山豐隆石山瘦。大溪春容小溪驟。遠林溼翠結秋陰。茅屋空村鎖清晝。板橋跨渡一逕微。泥滑只憂騎馬歸。雲昏列嶂最深處。一段楚天無雁飛。高侯畫山誰與匹。名重當今稱第一。萬疊千尋丈尺閒。益知庸工無此筆。論畫甚勿先論人。以名求實常失真。但看所畫何如耳。強辯不須多討論。尙書才藝真英物。胸次雄蟠山水窟。每驚爽氣起高堂。恨不日來閑拄笏。

題華山高臥圖

蹇驢不踏封邱塵。華山歸臥雲臺雲。曲肱枕石且適意。世事耳邊殊不聞。建隆天子小天下。自起潛行風雪夜。經濟元臣不敢眠。夜夜衣冠待車駕。南征北伐事紛紛。猛將四出貔貅軍。盡取荆吳并蜀廣。牀頭好睡只容君。

圮橋進履圖

暴秦肆吞如盜劫。六雄繫頸甘婦妾。下邳少年真可憐。不保相韓先世業。千金買死博浪沙。豈謂大椎摧副車。逼搜十日幸脫網。蒲伏草中蹲怒蛙。穀城老翁老無恥。坐倚橋亭落雙履。英氣猶能壓後生。笑呼孺子爲吾取。孺子容貌雖婦如。孺子心膽勇且竄。搏羸搏項不必屈。乃肯屈身於老夫。翁知孺子已可教。一卷奇編投所好。不獨身榮帝者師。四百漢基由此造。保身末路異韓彭。功在三霄冒曉行。後來廷尉號長者。猶待王生全令名。

宿永福寺醉贈舉講師

九月十月天氣暄。走馬看花來福泉。石頭衝水雪平礪。楓葉著霜紅蔽川。講師倚杖出速客。邀我樓頭看山色。秋天日落風四噪。清氣逼人眠不得。金籠巨燭光煌煌。舉觥一飲連十觴。明朝酒醒忽上馬。兩袖西風歸興長。

周昉橫笛圖

一婦跨鐙如習騎。一婦鵠立類勇士。一婦橫笛坐胡牀。容貌衣裳略相似。蓬鬆雲髻作嫵妝。丫鬢手擎紅錦囊。人言天寶宮中女。我意梨園舊樂娼。憶昔承平生內荒。宮中消息漸難藏。昨宵一曲寧哥笛。明日新聲滿教坊。春嬌滿眼情脈脈。喚起紅桃親按拍。不將三弄作伊涼。潛把閑情訴秦虢。聲悽調低和絃索。碧然有聲如裂帛。月落長安天四更。六宮一夜梨雲白。

桂林圖

瑤階夜冷莎雞泣。老兔西飛天宇溼。萬斛秋香捲海風。丹砂滿地誰收拾。太湖仙子月中立。青瑣畫闌塵不入。玉鞭一尺跨白鸞。笑向霜娥作長揖。

太真明皇譜笛圖

黑奴絃索花奴鼓。譚奴撫掌闍奴舞。阿環自品玉玲瓏。御手夷猶親按譜。風生龍爪玉星香。露溼櫻脣金縷長。莫倚花深人不見。李謩側足傍宮牆。

玉筍集卷七

古詩 長短

雙龍圖

雲谷道人手持一片東溪纒。雲林散人爲作雙龍出入清潮圖。硯池濃磨五斗墨。手塗腳踏頃刻雲模糊。旣不爲爬山引九子。亦不作掣電吞雙珠。但見一龍盤空偃蹇飛。下尾闔穴一龍攪海奮迅直上青天衢。雄者筋脈緊。雌者腹肚麤。雙衝交挺白玉柱。兩角對樹青銅株。宛宛修尾捲蹴浪花白。聶聶鉅甲挾拍天。風鳥性馴肯入孔甲駕。氣惡欲踢豐隆車。張吻啖阿香。舞爪拏天吳。轟霆時或取旱魃。飛雨自足蘇焦枯。寸池尺泊雖云不能一日處。十年未用猶可高臥南陽廬。雲谷子。七寶鉢。孟深袖手。雲林子。九環金錫。且載塗。吾將倒三江。傾五湖。洗餘百戰元黃血。盡率凡鱗朝帝都。

贈天馬生

天馬生。騎天馬。三尺昆吾手中把。有時上殿前。斬佞臣頭。有時臨戎。怒斫奸雄髻。天馬生。馬有千里材。劍有連城價。馬或爲館人脫。劍或爲徐君挂。官可棄。金可捨。此身可殺不可罵。喜不爲兒女顏。怒不作粗豪吒。七尺雄軀人可齊。一片義心誰得畫。天馬生。嗜利如嚼蠟。嗜義如啗蔗。天馬生。豈不知四海若潰瓜。九

州紛解瓦。十年苦戰血成窪。千里流移肉爲鮮。八陣圖。吾不祕。出師表。君當寫。吁嗟乎天馬。

滄浪舟圖爲謝士英題

謝公拔劍斬吳松。截得滄浪一泓水。倒卓青天入水中。一葉漁舟凌水起。舟與水升降。水與天拍浮。雖無具區三萬六千頃。混淪一片元氣清悠悠。謝公本好勝。況復知慮周。常恐有力者。夜半偷挾舟。當頭築土山。對面圍蓬邱。花竹麗晴晝。葦蓼涵高秋。映蓮去白鷺。穿柳下輕鷗。粼粼錦生瀾。汨汨珠跳漚。綠蓑挂鶴尾。畫槳倚船頭。謝公天性頗疎散。拄頰日來凭梅樓。豈無濟勝具。恥襲康樂遊。亦有鎮靜才。嬾懷安石憂。手把六尺珊瑚竿。餌懸一線黃金鈎。篷窗雨不閉。棧纜夜忘收。天隨舞元真。謳名不變鷗。夷服不異羊裘。舟下風清韻欵乃。花開水響聲夷猶。我方買棹事遠游。燕齊楚越將周流。長淮大江不滿眼。裘裳舉足如涉溝。燥吻吸雲夢。隻手掬滄洲。邈視謝公水。漚沓無一抔。舟車二十年。窮途困遐陬。潑蹄起波浪。潢潦弄干矛。故道走運河。洪濤沃九州。我前舞鯨鱗。我後躍蛟蚪。沴氣蔽白日。荒荒使人愁。旣匪急名宦。又不勤商賈。胡爲泛此不測淵。萬里遑遑忘樂土。猛省急回來。歸程已豺虎。江湖鼎沸海飛煙。膏染荆榛血漂楮。走覓謝公舟。求作滄浪侶。謝公舟在東海濱。滄浪水深多縱鱗。飛橋不可渡。戰艦莫通津。餽美四腮鱸。羹滑千里蕁。雲淨水光淡。波來風力勻。倚笛紛綠藻。落柁斷青蘋。數舉鸚鵡杯。滿酌桃花春。飲餘呼蠟屐。醉起岸綸巾。濯足濯纓儘。由我孺子有歌公不噴。

贈馮以玉宣使

余素奇以玉。有奇骨。且有奇志。一宣郎。何足以辱之。然行遠自邇。升高自卑。古人皆然。故敢以女家破莎車。平赤眉之助。梁期之。

馮宣使清如冰。溫如玉。年未三十享天祿。既不學腐儒老書卷。又不學寒士臥空谷。東鄰兒子癡。窗前弄絲竹。西鄰兒子嬌。穿域事蹋踘。獨持一片丈夫心。萬里虎飛思食肉。南垣相公選行人。千萬人中獨拔君。樓船夜破海東浪。驛馬北馳天上雲。作徒不必論魏尚。焚券抵用驚田文。忠肝義膽刻心骨。大掃羣醜書奇勛。李家大黃箭六尺。王家小鐵鎗百斤。西京奉世東都公孫。功名至今千古存。宣郎職小未足論。

送宗上人

海上宗師美如玉。手執落花流水軸。扣門求我送行詩。自說移禪向西竺。西竺迢遙十萬程。豺虎塞途那可行。武林別有小西竺。八面蓮花圍化城。層巒疊嶂開佛國。孽火劫風然不得。浮杯不用渡東洋。飛錫無勞問西極。樹撐鬼努力。石鬪虎攫食。水奔龍折身。山回鳳鋪翼。雲起太虛白。雨來清晝黑。月輪夜挂龍樹東。斗峯曉落貌峯北。玉枝風動兩元猿。金沙水冷雙鸕鷀。素食不絕天廚供。禪衣自有雲機織。水南寺隱隱。傳石鐘。石上座鏗鏗振金錫。寶髻無邊發象光。長舌有聲飛霹靂。贈君誌公杖頭刀與尺。爲我裁量松下石。待吾釣盡吞舟魚。分爾半巖懸襪襪。

僧厖

武陵老祖死盤瓠。至今子孫奸如狐。懸蹄蓋眼亦常類。而況細腰矮脚俱慵鷄。鶴倉九尾古聞有。茹獮四

尺今非無。胡爲蠻種肆。惡逸視宋。猊欺韓盧。獨不見陸家傳書走長途。張家注睛。昨奸佞。楊家袞草滯。焦枯。徒能殺都官。走愛弟。逐華氏。追夷吾。吠堯尙有說。食桀良可吁。箝口視盜。曾未殺。拱手學人何足誅。吾常怪漢祖少恩。夷皋無謨。蕭何短智。李斯實愚。族信醜。越痛可惜。捨穿嗾盾。尤無辜。宮中牝雞除不得。發蹤指示言何誣。東門狡兔自無恙。望夷馬鹿將奚逋。西旅底貢實自召。西園枉用銅司徒。分陝保奩不可見。使我悲憤思焚屠。吁嗟乎。提彌明。膽氣麤。金椎不舉良非夫。

詠雙陸

君馬一十五。臣馬一十五。共成三十騎。相拒河之澚。君馬黑虬龍。臣馬赤虓虎。盤旋兩陣閒。不復計行伍。彎彎水中月。蛾眉挂天宇。疎星二十四。薄曉見燦者。亂眼無旌旗。寂耳罷金鼓。奔衝互馳驟。交縱肆擒虜。君馬踰津梁。臣馬越城隍。君馬渥洼種。一日千里長。臣馬的盧骨。一躍五丈強。君馬左馳迅飛電。臣馬右驟激羽箭。東關未下黃金鎖。西塞先扃紫鑰鍵。牙散宛轉兩叫喧。喝六呼么破顏面。君不見宮中無子武。墜悲。席上有情韋后嬉。典籙天子不自振。地下孤臣血泪垂。

賦西鄰兒東家生各一首

西鄰健兒書不讀。駿馬硬弓習馳逐。十年遭逢天下亂。一品榮食卿相祿。出專邊庭分閫寄。入坐朝堂秉鈞軸。重輕楚漢一諾閒。指劃成敗千人服。分茅裂土趣刻印。墜堊流丹新賜屋。我曹何爲事筆硯。風雨西

窗翦殘燭。飲酣違高歌。憂來思慟哭。嘗恐少年人。思之未精熟。報國勿論命。愛君終獲福。功高心愈下。志靜欲易足。君不見淮陰壯士功蓋世。一請假王赤三族。

東家老生面白皙。脫粟五升逐日糴。燈窗埋頭理文字。瘦兒啼餓妻夜績。悄然窮巷車馬斷。挂戶蓆簾遮敗壁。頓生髓肉睛垂泪。懶惰筋骸愁運甓。寂寂常羞鄧禹笑。咄咄不忘殷浩戚。心如秋風鷹在韞。志若夜雨馬伏櫪。豈無六鈞弓。牽弦誇破的。亦有五尺戈。交臂習搏擊。痛礙絕秦書。竊草罵曹檄。深愧死傷勇。事此一人敵。君不見孟軻四十不動心。有道可援天下溺。

贈日者

我生之年歲在酉。日掛龍角身懸柳。水爲命元用金母。十年落限空搔首。紛紛豪傑爭趨走。雌雄未決誰能剖。知子有術術不苟。肯以公侯許誰某。嗟余流落成老醜。豈有文章垂不朽。逆旅相遭偶攜手。許我功業可期貧不久。囑君爲我三緘口。過眼浮雲我何有。且飲今宵花下酒。莫管明朝殺敵完。換取黃金印如斗。

送康上人歸觀兼遊方

湖之西。浙之東。山如舞鳳。水如蟠龍。精藍古刹據其上。往往煥爛金銀宮。蓮臺猊座事轉換。天龍圍繞森金銅。山珍海藏列怪異。琅玕瑪瑙紛青紅。雲廊月殿綿亘不見日。蜂房蟻戶開簾櫳。法門自別教禪律。一

蒂乃爾分三宗。神僧大德亦閒出。闡揚道德誇神通。地龍凡聖相混雜。服色則類實不同。五山十刹占奇觀。天生鬼造非人功。三竺靈隱在湖上。南北對峙雙高峯。飛來小朵割鷲股。桂子萬樹吹香風。冷泉一派瀉寒玉。六月冰雪清心胸。天台石梁跨澗險。莫渡瀑布萬丈飛銀虹。半千開士住方廣。神異變現初無蹤。插天絕頂露石骨。雁宕妙處宜秋冬。天燈夜照舍利塔。雲竇咫尺鄰天童。桃花小白境界別。大士出沒洪濤中。伏龍五洩屬婺女。徑山天目巢雲松。自餘佳處不可以名記。青鞋布襪山萬重。僧康僧中雄。弱冠祝髮辭乃翁。攜錫下赤城。千里遨吳松。十年值亂離。汨汨悲途窮。一朝忽憶歸省堂。上老因之遍扣叢林鐘。僧康雖浮屠。讀書頗聞道。不背君父恩。不違佛祖教。侍膳與問安。劬勞知所報。移錫與駐單。去住從所好。泉石足盤桓。煙霞堪笑傲。水不畏蛟龍。陸不虞虎豹。僧康爾佛徒。有杯可以渡。有葦可以桴。真山真水處。處宜爾居。何爲袖軸求我書。我書三過讀。於爾無補徒誇諛。東或越。西或吳。少留一席地。小結松閒廬。爲報兩邦山水窟。不妨我亦賦歸歟。

送馮判官之昌國

斬奕將軍飛上天。十年海水生紅煙。驚濤怒浪盡壁立。樓櫓萬艘屯戰船。蘭山搖蕩秀山舞。小白桃花半吞吐。鴟夷不裹狀元尸。白日雄兵圍帥府。長鯨東來驅海獸。天吳九首龜六眸。鉅牙鑿齒爛如雪。怒殺小民如有鱗。春雷一震海帖伏。龍變海魚安海族。煙青滷窳雪翻盤。浪煖黃魚串金鏃。海鹽生計稍得蘇。職

貢重修遵鳥服。判官家世忠孝門。獨松節士之奇孫。經綸手段飽周孔。豈與弓馬同等倫。晝窮經史夜兵律。麟角鳳毛多異質。直將仁義犯笞榜。恥與姦賊競刀筆。吾聞判官昔佐元戎幕。三軍進退出籌度。便移輜路事刑名。坐使剽游歸禮樂。鳳凰池。麒麟閣。酬德報功殊不薄。九天雨露聖恩深。萬里扶搖雲路廓。

題富春吳雲槎皆山樓

前樓後樓山巖峩。東窗西窗石盤陀。巒岈犬牙峯錯綜。鞆轄虎口若相摩。便如乘標導伯禹。徧歷岱華踰嵩嶧。誰移琅琊置樓下。環滌形勢迴向斯。樓多奔巒峻嶺曲折走奇狀。寒肩瘦脊鬣鎖千飛。雷變現吐神怪。草樹蒼鬱迷天羅。白雲漫漫下無底。萬頃往來如海波。松栝栝柏直上盪日月。元鶴赤鳳皆來窠。雨樵煙牧異昏曉。笠戴黃竹蓑青莎。皆山主人不食天子祿。青檢紫綺雙烏靴。拄笏夜上東谷月。抱膝畫昞南庭柯。銀虹百尺下挂屋。簷角曲澗宛轉盤旋渦。山人樓居恣豪飲。餒飶映口頻醺醺。偃息野樹臥石枕。起舞落日攀松蘿。醉翁作記冠一代。塗竄舊稟無差訛。文人才士亦繼作。詩賦頌美何猗那。嗟余半世苦奔走。官馬大野舟濁河。殘山剩水不到目。清賞有癖今成痼。蜃樓消長不足較。但使有山猶可歌。

贈馬庸

既不能學書記姓名。又不能學劍敵一人。丈夫武定禍亂文經綸。捨此何以立我身。扶風豪士有馬庸。軀幹短小氣吐虹。自言若不致身鳳凰池。亦當安身虎豹叢。如何尙荷戈。遠戍東海東。吾聞王師夜報捷。席

捲千里風塵空。何不泛樓船。兮鼓南風。渡長江。兮追羣雄。馬豪士。誰不死。努力功名從此始。爲我酌酒誓江神。曰所不盡取中原歸國家。復濟大江有如水。

題黑神廟

雄巫。嗔角神。犀吼。翻脚。翻躡。起筋斗。血俛怒嚼。葛黨刀。剝面腥風下。天狗。烏騅。擎雲捷飛豹。金獸吞頭。渾脫帽。青蛇。丈八。裊蠻旂。北府新分南嶽號。捲魚鷗。吻高插空。飛藹列棟。紛青紅。花裙草袴。自膜拜。白日。椎鼓。夜擊鐘。莫。貉。會長。不平賊。十丈龜。跌誇石刻。旣不能。阜旂元甲。接武黑雲都。漫綴竿旄。半天黑。君不見。堯州祠。銜星。會稽借鬼兵。井埋骸骨爛。屍與雉堞平。烏乎。五花營。千里馬。珠如礫。金如瓦。亡妻走妾各事仇。三尺弓弦。泪成把。黑神黑神何爲者。

玉筍集卷八

近體五言

瑞柳十二韻

綠霧鬪華滋。柔條著地垂。玲瓏隔翠幙。婀娜拂長絲。種近臨春閣。分來太液池。彩堂依密蔭。珍幹夾宏基。九烈朝衣貴。三眠晝漏遲。汗溝全盛日。張緒少年時。裊裊含芳色。茸茸發令姿。藏鶉春尚淺。拂燕舞頻欹。沐雨披雲鬢。翠煙斂黛眉。妬深渾是恨。嬌重半如癡。莫訝多纖麗。何曾識別離。更培連理樹。相對映門楣。

投贈周元帥十韻

玉帳臨江近。金城鎮海遙。鼓聲秋動地。劍氣夜衝霄。露下星河白。風高草木凋。山寒旗獵獵。沙靜馬蕭蕭。左廣初傳駕。西船已畏燒。五離纔散鼠。六博又成梟。豪傑乘時奮。賢材早見招。紫樞虛上座。黃閣待清朝。會見擒奸操。歸來醉小喬。恩波門外柳。長拂富春潮。

壽星將軍十六韻

大將開軍府。明旌擁節旄。威聲千里震。雄略萬人豪。虎運乘時奮。龍星並日高。誓將擒趙歇。義不事朱滔。古法傳三陣。新書變六韜。花門重製鎧。大食舊遺刀。畫戟終依陛。彤弓豈在弢。銀章分斗印。珠板上花袍。

會客春開宴。傳觴夜伐馨。壽筵王母降。醴酒穆生逃。腥膈薰蝮角。燕支浴鳳毛。白麝銜瑞草。青鳥送蟠桃。豪飲酺三日。雄牽餽百牢。杯深紅瑪瑙。酒溢紫蒲萄。未祝南山頌。時勤北府勞。雲臺多彩繪。好去逐英髦。

林塘幽十四韻

勝境愜幽尋。芳塘簇茂林。漫天驚滉漾。拔地見蕭森。隔水時聞磬。穿花或聽琴。清浮鼈弁小。黑直蜃宮深。躍藻跳珍鯉。爭枝墜野禽。風回微作籟。雲去尙留陰。鶴起如迎客。龍歸若獻琛。蘿房依蔭茂。寶棧渡迷沈。春雨移舟坐。秋霜倚杖吟。豈惟便枕簟。莫欲棄冠簪。住久將忘世。觀來已悟心。埃塵猶不到。榮辱詎能侵。天貢朝朝下。神燈夜夜臨。閻浮那有此。大士現潮音。

贈道士十韻

紅絲牽斗杓。白刃斬霓腰。雲雨多消散。天星盡動搖。指摧狐女仆。目爍蜃郎焦。冠碾合臙玉。衣裁疊雪綃。青螺晨渡海。赤鯉夜迎潮。弱水纔容葦。蓬萊不用橋。暫離金母宴。又赴木公招。石鼎閑聯句。瓊樓臥品簫。秘書傳寶籙。名籍掛神霄。下士年華促。丹鑪許借燒。

寄何九處士十韻

聞道遷新業。濮家原上居。連牀棄珍玩。囊載束詩書。臘水春前釀。晴泥雨後蔬。琴清花院靜。棋響竹窗虛。紀歷忘秦漢。徵租絕吏胥。浮鷗孤艇棹。健犢短轅車。綠樹行吟罷。黃庭坐對餘。山林奚必問。鐘鼎待何如。

情已義皇上。時方雜霸初。觸蠻兩蝸角。天地一蘧廬。

宿瓜州渡

夜泊瓜州渡。天空客思清。月生滄海白。潮落大江傾。目斷中流楫。心摧去國旌。著鞭吾豈敢。王室正承平。

懷完者禿元帥

勇略經千載。威聲落萬夫。虎紋橫赤頰。犀骨貫霜顛。海盜清旗幟。倭人響畫圖。鯨鯢今縱恣。風浪滿江湖。

秋日古城

國勢方龍鬪。林居且鶴栖。鼓風秋樹急。接日暮雲齊。江淺沙吞地。山迴石礙溪。日將兵火信。融化作詩題。

寄天香師

圓帽頂紅毳。方袍搭絳紗。海龍邀早飯。山鹿進秋花。試墨探倭紙。尋船鬪建茶。時拋紅豆粒。竹下喚頻伽。

戲贈陳李二萬戶各一首

金虎橫腰重。銀盔壓頸酸。力能擒項籍。氣欲短曹瞞。雅有長城寄。貧無故紙鑽。憑誰奏天子。易爾惠文冠。聞道尊君父。功成丈八鎗。金牌晴射日。白馬夜飛霜。羊肉分軍士。人皮貼戰瘡。箕裘如可紹。不用試三場。

贈西僧

西離五印度。東渡獨繩橋。海若擎雙足。天花上七條。胡經函貝葉。飯鉢繫椰瓢。回首流沙路。程途十萬遙。

菊隱

隱士追陶令。黃花托素心。或從鄰舍飲。不厭貴人尋。曉露三花長。秋風五柳深。未須天子詔。且盡酒家金。

挽宣元杰諱園沁特穆爾

天下政多故。而公乃殞身。縱非補天手。猶勝望風臣。日月光雖薄。乾坤氣尙新。瘦軀如未死。撥亂屬何人。

挽陳衡之諱瑋

感舊詩千首。傷情酒一樽。煙塵嗟白晝。花月怨黃昏。瘦馬湖西路。輕輿江上邨。玉樓雖帝令。題著也銷魂。

挽徐文卿諱煥章

七尺虎熊體。所傷髭鬚稀。本鍾英氣出。竟抱病魂歸。土壘思排陣。風鏑記笑圍。空攜掛墳劍。無處發長噫。

挽李煥章諱文

飛翼樓前路。若耶溪上山。雲居期共隱。雪艇竟空還。邱嫂貧何業。孤兒長更頑。一泓桑瀆水。仍遶舊柴關。

挽張子堅諱風

文僅典州郡。武徒經亂離。異書肥白蠹。雄劍吼蒼螭。身冷家人散。門荒過客悲。忠魂倘爲厲。猶可捍城危。

挽張則正諱木。號小客星。又號小桐君。有親海集誅魃文行於世。

雲外客星落。江頭桐樹凋。有文誅旱魃。無祿佐清朝。觀海聲名大。回天志慮銷。孀妻與孤子。仍舊尾脩脩。

挽孫回之諱明

不臨西湖路。秋風幾嘆嗟。傷心倚廬樹。過眼合歡花。別業飛龍劍。離絃冷鳳琶。至今資聖寺。猶種故侯瓜。

挽馮君祥諱天瑞

髻鬣爲昆季。煙塵更別離。艱難惟爾共。忠勇果誰知。白馬金戈冷。紅鸞玉鏡悲。燕山萬里外。若箇送靈輜。

挽楊原中諱原

習熟夾鎗法。軍中作武師。兜鍪晝攪陣。蹀躞夜交綏。敢戰惟聞鼓。先登每望塵。可憐包馬革。無處認僵屍。

挽程以謙諱式

草冷駱駝壑。青燈斂怨魂。皇輿春蕩蕩。天策夜焯焯。望泰須從否。扶乾在抑坤。英雄今不語。斯意與誰論。

挽趙有道諱信

學就過人藝。不成昭代功。寥寥千古道。寂寂萬夫雄。已矣龜蛇廟。哀哉虎豹叢。余山西下日。無樹起悲風。

挽張思賢諱希賢

玉局頻鏖戰。皇墳屢辨疑。似君埋亦少。如我活何爲。海眼填星石。天喉坼斗司。英雄都老去。誰爲輔明時。

燈下有懷

憶昔童娉店。高屯坐夕曛。樹聲呼出月。石角礙回雲。野雉穿花見。清猿隔澗聞。馬頭三四子。曾縛故將軍。

寄贈延慶講臻雲谷

童子扣金鐘。洞天嘶玉龍。天王空裏見。羅漢定中逢。律已兼儒行。蜚聲徹教宗。有時吟未穩。哦遍夕陽松。

聽彈琴

吳生抱綠綺。爲我操春江。洄洑收沙嶼。飛濤濺石缸。岸低風振柁。船靜月窺窗。萬派朝宗意。鍾期信少雙。

送孫伯明教授

白髮桃源長。新恩教越州。丰儀高勝畫。情思淡於秋。春雨羲之屋。涼風賀監舟。遙知足登眺。日與繡衣遊。

答問湖源風土

湖源源上路。東與浦陽連。地勝藏春塢。民居小有天。秋山紅入畫。晴野白浮天。一道桃花水。如今泊戰船。

送海藏主之浙東

浙東多勝地。師往幾時還。夜雨天童寺。春風雁蕩山。鳥聲花外靜。江影渡頭閒。去去且隨分。無勞雙鬢斑。

送范士謙別

勝友早英發。懷才人未知。聰明管輅易。局面賈元棋。霜月雞聲早。江帆鴈影遲。相逢遽相別。別後愈相思。

簡蔣克政

四海皆龍戰。潛夫尙讀書。經營宜此始。出處定何如。樺棹雙枝戟。偏廂八陣車。欲煩徵聘使。因便寄吾廬。

次韻海石上人書事二首

張侯生冀北。關帝出河東。勇氣迅雷黑。忠肝畏日紅。腰橫小青劍。臂掛大黃弓。才力萬人敵。惜今無二公。且視北斗北。夜觀東井東。截天沆氣白。射月大星紅。心有一寸鐵。力微兩石弓。世乏段太尉。夢懷郭令公。

次韻僧文憲書事二首

分省銀章重。開邊鐵騎多。南徭心似獸。西馬項如駝。夜枕眠紅玉。春衣繡綠羅。營盤方十里。不用大風歌。朱粲糟人少。黃巢磨骨多。固陵宵遁馬。沙苑戰回駝。白羽裝鞭箭。紅銅鑄叵羅。兒童齊拍手。攔路唱苗歌。

聞說

聞說江城破。歸心夢裏驚。肺肝從此熱。手足近來輕。春事愁花朵。晨齋怯鼓聲。平生慕王猛。今日莫談兵。

戎馬

戎馬復四起。吾民何得蘇。江山雖王氣。花柳且皇都。竟日黃塵暗。連年白骨枯。王官皆重祿。大廈許推扶。

寄曾彥魯

大尹久不起。吾民何所任。挑燈註脈訣。閉閣讀官箴。舉世誰知己。逢人卽吐心。不如憑玉局。長日萬機沈。

寄曾文湜

老湜多情思。深吟苦寄誰。喝盧驚彥道。臨帖到羲之。小席金盤露。長圍玉局棋。醉眠忘戰伐。何物銳頭兒。

烏龜嶺草庵

戶納乾坤小。山環日月遲。瑞雲飛白鶴。靈石墮元龜。魔女能銷睡。狙公不濟饑。道人貪入定。忘卻下山時。

寄宣元杰王元諒

昔者蘆溝月。曾停十九車。水聲深入地。霜氣倒飛花。路險羸牛乏。泥堅瘦馬癡。槁錢賒不得。拔劍野人家。

悼博羅同知沒於軍

已矣專科學。於今定若何。陣雲寒可掬。兵氣耿相磨。鹿脯祀天乙。蛇神泣太阿。哀哀霹靂叢。偏向死門多。

挽盧處士

月掩少微星。幽人奪壽齡。宋清良可傳。郭泰不慚銘。斷壘荒煙白。新阡野樹青。猶賢玉川叟。有子抱遺經。

簡景初

千里淮吳府。先登得壯侯。馬蹄開鳥陣。虎氣繞蛇矛。春酒花攢帽。秋筭月滿樓。幕賓雖老病。曾識舊風流。

簡王維賢王彥洪

聞道元戎府。風流得二王。紫毫金錯字。白馬水平槍。鴈過蘆洲月。鴉啼楓樹霜。邊情宜少壯。遯肯老頻陽。

次韻許萬戶三首

爲問天台許。誰能洗太陽。旄頭雖弄角。屍氣故生光。山市千峯暗。江城百雉長。獨憐宮省樹。無事起悲涼。

伯圖紛雜亂。元象自昭回。茅屋幾風雨。孤城又草萊。壯心驚客雁。病眼亂寒梅。到處逢旌節。誰爲命世才。
文墨老奇士。弓旌得偉人。尙功惟殺敵。祕計肯和親。玉帳三邊夢。金符百戰身。猶懷蜀丞相。羽扇白綸巾。
取青樓夜飲戲葉子肅

酒令傳觴急。燈花嚼燭低。山人清似水。老子醉如泥。天黑月墮地。水寒星在溪。猶吹赤蹄紙。照道畫樓西。

江道翁挽詞三章自號冬木

相鶴浮邱伯。騎驢石曼卿。看花歸洞府。採藥返蓬瀛。劍影埋金氣。丹光隱木精。滿空飛羽葆。萬里海天清。
天上碧桃熟。山中丹藥成。茅山朝跨虎。弱水夜騎鯨。華蓋新分座。芙蓉舊領城。玉棺傳帝令。飛去覺身輕。
劫火然冬木。先生去就輕。法言遺許遜。大藥授茅盈。龍虎低金兆。煙霞護玉京。惟餘孫與子。傳得步虛聲。

簡陳照摩

尙憶錢王國。車中舊往還。肩輿小西市。立馬大官山。錦水明秋日。金戈報曉關。空漫乞米帖。無處破天慳。

劉廷璋齋居

穀障秋煙薄。花軒午漏長。傳衣裁白苧。頰弁刃黃楊。散帙迎風亂。清樽過雨涼。悠然北窗夢。情思到羲皇。
喜見樓次韻

高樓名喜見。遠客獨傷今。鞍馬思劉備。衣冠惜華歆。曙光浮海闊。秋色到江深。送目闌干久。冥鴻入窅沈。

贈吳熙

吳子勇爲義，壯爲金石交。燈前看劍室，花下弭弓鞘。春雪烏破夢，曉煙麋在庖。不知攘臂者，何事逐黃巢。

代悼亡

漢武黃金屋，何曾貯阿嬌。離鸞春對鏡，孤鳳夜聞簫。事往成陳迹，情多賦小招。分香并賣履，此意已蕭蕭。

悼瑞上人死於兵

執手言猶在，回頭事已非。寧知三尺劍，斷送六銖衣。緣淺金剛壞，魔深舍利飛。白雲堂上月，還照怨魂歸。

悼義閣黎死於兵

幻劍擊空屍，痛深何足悲。誰知祝髮日，便是斷頭時。綠樹懷芳趾，紅英惱夢思。最哀黃髮媪，不葬寧馨兒。

送哲古心往吳江報恩寺

蘭若歷江橋，長廊晝寂寥。鳥啼春後樹，龍起定中潮。花雨隨風散，茶煙隔竹消。客程他日路，清話借通宵。

題畫

雲寺隱難辨，煙江遠莫窮。水枯沙出石，葉落樹呼風。野渡秋逾靜，漁舟晚尙空。尺綃意無限，詎讓米南宮。

寄周履道

清事何方好，荆南溪上山。雅懷凌鮑謝，好手到張關。花鳥春風碎，雲松白晝閑。可憐無與共，獨岸小青還。

寄蔡漢臣

十四從戎陣。先鋒百戰輕。休官推李敢。敵馬避秦瓊。伐鼓春開宴。銜枚夜突營。何年靖淮梗。封錦壽春城。

留題陳惟允齋居

風雨茅齋夜。琴樽清晝時。雄談雖邂逅。遠別愈相思。落日鳴孤馬。平原卓大旗。知君頗豪俊。勿後戟門期。

分題得吳王井送張德常

劇地鑿山骨。重泉出洞天。聲虛響屣步。影照捧心妍。露冷銀牀滑。秋空玉鏡圓。養民功用在。莫問邑頻遷。

九日寄許廷佐張景昭

冷落黃花節。蕭條白鴈天。雄搏鵬九萬。饜戰馬三千。鐘鼎淹衰鬢。山河憶盛年。擬呼劉越石。同著祖生鞭。

次韻許萬戶

虎將有吟癖。詩成命僕騷。倚牀晨擊劍。隔屋夜呼醪。落日銅駝冷。秋江石陣高。欲持長脰槩。涉海寄敖曹。

九月十日同許廷佐吳近仁泛舟松江

汎汎江湖闊。蕭蕭廬舍稀。晚雲低遠樹。秋水淡晴暉。大野頻鏖戰。孤城未解圍。何當驅鐵馬。北向靖王畿。

不辭

不辭揚雄宅。甘居許汜牀。求田空敗意。識字漫成章。射虎衣裾短。屠龍劍鼻長。憂貧何日了。筋骨豈能強。

感古

關內收三傑。淮南養八公。金成幽血碧。龍起瑞雲紅。過眼王章碎。回頭帝業空。惟餘白楊樹。一類響悲風。

聽琵琶

引手作琵琶。槽深杪欒花。茶船方到岸。鹽客未回家。密語思何切。相尤怨更譁。江聲八千里。心緒滿天涯。

有懷亡弟

白塔寺前路。朔風吹軟沙。疊騎黃忽刺。側抱紫琵琶。乾酪曉衝酒。真酥夜打茶。朱容竟何在。雨泪溼黃麻。

虎邱寺

四野天垂幔。孤峯地湧金。潮來講臺潤。日午劍池深。曲徑穿紅樹。長廊蔽綠陰。小吳軒子好。誰繼老坡吟。

顧野王讀書堆

昔聞野王宅。今上讀書堆。篁竹最深處。菊花時自開。天風響鐘磬。海氣結樓臺。回首梁陳事。悲歌付一杯。

大都卽事六首

平章橋上日。光祿寺前春。楊柳綠垂地。桃花紅照人。粉香迷醉袖。草色妒行輪。屠狗悲歌者。空埋泉下塵。

三月西山道。春風平則門。繡鞍紅叱撥。氍帽黑崑崙。衣襖分香裏。壺瓶借火溫。醉歸楊柳月。綠霧掩黃昏。

小海春如畫。斜街曉賣花。連錢遊子騎。斑竹美人家。襖色搖紅段。盤香鬪蠟茶。額黃斜入鬢。側髻半翻鬢。

楊柳暮鴉啼。鐘樓日又西。小章隨客散。歸馬望塵嘶。碧瓦差宮樹。金波溢御堤。時平足行樂。誰問醉如泥。
紅雪點棉袍。青樓酒價高。朱絲紅杪櫂。玉斗紫葡萄。春餽行綾卷。秋醃割佩刀。簾鉤風不定。觸損鸚鵡毛。
千步廊前月。朦朧照御街。風簷鳴寶鐸。雷板耀金牌。城影平鋪地。樓陰半上堦。誰家吹短調。一夜亂春懷。

東成少府

浙水險天下。驚濤晝夜奔。雲雷號海獸。風雨走江豚。少府公田薄。鴻儒德望尊。聖朝容讜議。不用老吳門。

聽雪齋

萬籟入沈冥。坐深窗戶明。微於疎竹上。時作碎瓊聲。撲紙春蟲亂。爬沙夜蟹行。袁安政無寐。欹枕漏三更。

柬張彥禎知事

臺憲故人老。山林幽趣深。放船歌落日。倚杖聽秋霖。架有生風簡。囊無慎獄金。獨賢願同守。不負好儒心。

聞鄭國寶往無錫

匹馬抵毘陵。重圍百雉城。金湯從地湧。壁壘亘天橫。風勁雕弓急。霜寒畫角清。將軍正閒暇。高枕亞夫營。

寄馬將軍

馬服古名將。孤軍鎮海壖。射鵬天雨雪。拔槩地飛泉。箠手調銀甲。花奴遞玉鞭。虎營燈火夜。自註十三篇。

贈黃元帥

蕩盡百金產。圖成一代名。誓天關帝廟。割地呂蒙營。峴首嗟難鑿。江流竟莫清。滿懷忠義氣。揮作淚縱橫。

贈王良佐

雲起碧螺峯。賢人出處同。絕憐懷道德。無處逐英雄。使者徵王肅。諸侯重蓋公。也知囊底智。猶足掃江東。

寄中山隱講師

問訊山中隱。中山第幾重。風廊巡夜虎。雲鉢聽經龍。流水千溪月。寒巖一樹松。無因淨查滓。來共上堂鐘。

送宋仲溫還姑胥

興盡抱琴歸。江空歲暮時。孤城天拍水。長路雪漫歧。日月催年事。關河起夢思。胸藏幾兵甲。能壓布帆遲。

寄馬都事

職分歸南省。軍機重左司。欲成錢氏志。無出馬家眉。大府晨趨早。嘉猷夜退遲。歸來椿館下。猶作老萊嬉。

簡孫大雅

別後東家子。扃門只著書。但令儲有粟。豈問出無車。精緻追天祿。工夫到石渠。賓筵干櫓外。須爾講關雎。

柬成元章

共說成夫子。詩名逼有唐。精神輞川畫。風致午橋莊。野店雞前月。官河鴉後霜。雪髯渾未撚。七步已成章。

贈顏欽若

六合故人散。八方多難深。青年憂國淚。白髮奉親心。雨屐春苔妒。寒氈夜雪侵。尤憐乞米帖。日向水窗臨。

懷趙有道

武功原上路。憶爾奮幽尋。技巧神機祕。經營霸業深。幾年搔短髮。何日遂初心。病起寒江暮。囊空買藥金。

東顧明府

水國差徭重。江城廩舍稀。曉星懸印出。春雨勸農歸。官馬哦新月。公庭散夕暉。欲知通守瘦。但視野人肥。

寄鍾伯紀

著就春秋傳。緘封懶示人。共傳懷伯略。獨許作王臣。葛亮終存漢。揚雄漫劇秦。憑君瞻才力。天下政風塵。

寄題錢孟安書房

曲徑登平坡。危橋跨斷河。樹深偷日短。閣小借春多。酒熟妨詩債。茶香卻睡魔。醉心經史內。何用說登科。

岳飛墓祠

半蓋樹陰圓。長廊列從官。銀鎗火光現。鐵鍊雪花寒。二帝孤魂散。三軍老淚乾。獨存秦檜首。不挂蓑街竿。

過杭州雷院留題

急澗水沄沄。長松蔽夕曛。金鎗飛使者。肉翅下天君。寶殿閒鐘篋。瑤絨冷誥文。晚來龍取水。湖面滾雷雲。

題樂靜草堂

百稱仁者靜。所樂在居山。一鳥不敢語。萬松相對閑。小齋迂逕入。深戶雜花關。擾擾喧詼子。何曾見一斑。

簡邵可大

四裔政瓜潰。羣雄分蝟張。橫磨狂景劔。勇恃老僭鎗。瘴雨銷銅柱。天災火柏梁。誰爲股肱郡。往取後降王。

贈張習之

膏雨晝廉纖。爐煙不隔簾。燕泥侵玉麈。蛛網挂牙籤。夜枕花頻妒。春衫酒半淹。綠窗人散後。明鏡摘風髯。

贈何彥明

芳草綠芊芊。南梁二月天。綺窗低映戶。紅袖蚤登筵。化日連錢馬。輕風罨畫船。歸來東閣下。時有麗人篇。

送暹上人之笠澤

具區三萬頃。碧浸楚天深。日月循環沒。星河徹夜沈。寶坊開曉甸。幽磬隔秋林。但恐歸歟後。相思無處尋。

玉壺清冰室

斗室如蝸殼。沖然氣象溫。虛含太古雪。倒覆洗頭盆。色相俱難著。瑕瑜兩不全。誰言鐵如意。醉後怯王敦。

漁樂圖

昔在山陰住。門前是鑑湖。晚雲昏島嶼。秋水淨菰蒲。漁艇中流急。衡茅倚樹孤。歸來拂縑素。寫作釣魚圖。

次趙伯溫韻

共是越州客。同爲莊鳥吟。潮來鰻井沸。龍起鏡湖陰。烽火臨邊急。池塘入夢深。蘭亭修禊處。無復舊攜琴。

梁楷鍾馗

虎口插蛇髭。藍蓑鬚脚垂。帽裙全破碎。袍袖半離披。夜雨高堂靜。秋風耗鬼悲。人間多大怪。不獨錦棚兒。

立仗馬

照夜玉狻猊。霜毛鐵鑿蹄。春風金絡腦。小雨錦障泥。御駕馳天上。軍封受海西。日供三品料。絨口不聞嘶。

二喬圖

並倚兩含嬌。人呼大小喬。腕鬆紅玉釧。釵擘紫金翹。公瑾應同調。孫郎早見招。獨憐銅雀瓦。風雨夜蕭蕭。

錢塘逢施孝先

亂裏交遊散。信音殊未聞。海天清夜月。江樹早春雲。到處皆圖霸。何人果見真。相逢惟爾在。褶袴亦從軍。

奎上人松風閣

兩松依邃閣。謾謾發春音。夜靜灘聲近。秋高雨意深。石壇鳴落子。窗月動清陰。此際陶宏景。幽沈用世心。

寄題佘山普照寺

塔鎖聰公影。墳荒少保鄰。綠苔侵古檜。黃葉下高椿。寶殿秋雲合。雲廊月色新。兩山青遠送。長夜賴誰巡。

次鍾君來韻

我愛山中好。全無俗事牽。秋霜溪口樹。春水渡頭船。豆熟白鷗聚。花開錦雉眠。官閑僧舍近。棋罷又詩篇。

九日

客中逢九日。心折大刀頭。草白水沙靜。橘紅江樹秋。曉風欺破帽。落日盼歸舟。空把陶潛菊。長凭王粲樓。

次鐵笛道人韻

翠黛鎖眉山。濃愁無處安。玉環雙鳳叫。珠髻九龍盤。花落夢初斷。鶯啼春未闌。檀槽兒女語。昵昵向誰彈。

春登永安寺

宿雨忽開霧。凭高散旅愁。野煙啼翠鳥。庭草臥青牛。怪石尖於劍。長杉高過樓。尙懷登絕頂。東北望杭州。

立夏後一日寫懷

隔樹竹雞啼。夢深懷欲迷。玉人方拭淚。白馬政頻嘶。芳履閑花逕。塵牽倚繡闥。明年還舊約。歸醉瑞雲西。

懷越

遊子憶山陰。秋風自越吟。雲從秦望遠。城壓鏡湖深。笥轎常攜酒。松梭或載琴。遙憐舊童稚。久負浴沂心。

玉筍集卷九

七言長律

送海一漚十韻

尊者來從乾竺國。畏途生出玉門關。地窮西北河爲帶。水盡東南島若環。劫火自如潮勢吼。禪心已似石頭頑。法華雨施金盂水。貝葉經挑錫杖銀。幻境萬家飛蝶夢。滄波一箇野鷗閒。染輕龍女花難著。德重天廚食自頒。灑氣秋橫銀色界。白毫夜破鐵圍山。櫻溟此日浮杯去。蔥嶺何年隻履還。佛日未應遠下國。甘霖直欲遍人間。探窮大地蛟蛇窟。歸立穹天虎豹班。

遊黃公洞十八韻

十月山城氣候偏。黃公洞裏看春妍。五紋鸚雀嬌疑鳳。千葉蟠桃大似蓮。巨彈落星天狗碎。神箸出土佛牙堅。雜花冉冉張紅錦。芳草茸茸臥綠氈。厓瀉蜂腰橫斷杵。巖撐虎口抱空拳。澗邊野雉如人立。松下馴麕傍母眠。峯隱金雞啼曉月。瀑翻銀漢下長天。十圍龍竹高逾樹。五頂神芝秀結拳。薜壁冷雲封鬼谷。寶函金穴祕神淵。枰遺商皓棋三角。劍缺黃巢石半邊。丹火有人留蛻骨。玉棺幾度葬神仙。扶危鐵柱長存蹟。代步花輿不下肩。世隔衲僧方廣地。路迷漁父武陵船。華陽未老陶宏景。勾漏先歸葛稚川。記歷何嘗

知晉魏。流光端可繼。彭錢蓬萊方丈圖中見。流水胡麻世上傳。欲報穀城山下礦。已無圯上袖中編。便當導引師吾祖。深避衡茅一萬年。

送何山長十韻

黃岡義學何人建。山長新除甚日行。禮樂三千開治道。風雲九萬始修程。絃歌此去培英雋。俎豆由來得老成。齋舍諸生師郭泰。橋門萬衆羨桓榮。干戈久弛衣裳會。豪傑思趨月旦評。靜考義圖紬大衍。博評麟史議齊盟。壺觴日永歌魚麗。琴瑟春深和鹿鳴。豈但雅情違世務。終知雄略在經營。元黃未解乾坤戰。薄食徒傷日月明。珍重斯文膺至寄。可能坐待泰階平。

寄宣參謀十四韻

輕裘緩帶晉羊公。羽扇綸巾蜀臥龍。霸府規模談塵裏。神州形勢畫圖中。文章藻飾冰霜操。戈甲森羅錦繡胸。掌上風雲開八陣。指端神煞祕諸宮。廟謀素抱留侯略。雅量真成謝傅容。鹿角砦深嚴木柝。虎皮韞暖覆花廳。據鞍橫槩心何壯。賭墅圍棋興政濃。湖面鼓聲催落日。原頭旗影動秋風。蕭蕭歸馬荒陵樹。慘慘昏鴉夜寺鐘。偏伍暗分元武旆。牀機潛發鳳凰弓。燈前玉女趨符令。月下金神守劍鋒。幕客坐均三品食。健兒立侍萬夫雄。屠龍古技嗟先識。捫蝨奇論惜未逢。好在勇爲天下事。扁舟歸臥五湖東。

七言律

井西丹房

葛井西頭更向西。丹房高與白雲齊。鉛田虎下飛紅電。汞海龍沈結紫泥。山鬼俯欄窺火候。爐神伏地叩刀圭。飲餘一盞中黃酒。坐聽鶉聲松上啼。

觀習鄉兵

吳班馮習兩都頭。十里山城據上流。錦帳月明張夜宴。繡旗風暖試春蒐。裹瘡廣樂猶堪戰。垂翅回溪未足憂。天子念功思將帥。南宮聞已構層樓。

題院人畫小景

高棟層軒夜未央。溶溶新綠漲池塘。風輕楊柳金絲軟。月淡梨花玉骨香。亂唾碧茸紆曲逕。獨循青鎖轉迴廊。千金一刻誰能買。輸與豪家白面郎。

受上人房簪芍藥花

金縷盃安瑪瑙盤。花神爲我獻清歡。都將東武伽藍會。直作維揚宰相看。兩坐春風嬌拂座。一壺美酒醉凭闌。從教夾道吳兒笑。贏得烏紗玉露溥。

對牡丹有所贈

塵滿堯夫小步車。東風幾度負韶華。蜀人自適琴中調。吳女徒歌陌上花。半裹牛酥和夢寄。一腔羯鼓共

誰搗金刀剪斷雙頭錦。羅帽簷嬌壓欲斜。

寄周畫史

花竹翎毛滿近郊。可憐畫手日蕭條。鳩聲未絕春常雨。鷗影不移江自潮。魏武門風今作庶。梁家奴態動成謠。王淵獻頰俱無信。誰寫先生五柳橋。

雪筵

十年南雪不沾沙。獨爾孤篷載六花。路入溪山天一色。雲同湖海玉無瑕。瓊田預借收冰榜。銀漢驚飛貫月槎。我是寒江蓑笠叟。凍吟真敢繼劉叉。

席上得搖字

翠館行廚雪乍消。牆頭新柳又垂條。珊瑚枕暖人初醉。鸚鵡籠寒舌未調。座上綵鸞珠插鬢。掌中飛燕玉圍腰。海棠一夜東風軟。落盡雲邊金步搖。

嬉春

春來何處惱柔腸。柳下人家綠鎖窗。畫棟歌塵珠蔌蔌。雕盤舞袖翠雙雙。鼓翻芍藥雷轟座。酒熟醱醲雪滿缸。最憶瑤芝堂下路。一宵歸夢隔春江。

贈張師

馬似游龍掣似蛇。弁登雉雉服登緃。聲吞漢賊當陽坂。氣壓秦皇博浪沙。蔽日浮雲行按劍。滿天明月臥吹笳。同宗亦有狂書客。坐對寒窗擬禡牙。

題僧智果書梁武評書帖

三十四賢三百年。能書端有幾人傳。藝高梁武評都盡。筆到隋僧法度全。逸少雄強難繼踵。元常茂密孰齊肩。摩挲斷石思存古。起倚西風一慨然。

與甯子廉馬敬常飲酒得移字

我愛中州雙國士。尊前爲我解金龜。南山石爛歌逾緩。銅柱沙沈跡未移。割土有人窺漢鼎。磨崖無客頌唐碑。狂生雅抱澄清志。中夜聞雞起舞時。

送海上人從軍

閭黎不肯著袈裟。要斬人頭換白麻。天道近來增壁壘。火星昨夜入匏瓜。山城暮雨閑弓劍。沙塞秋風送鼓笳。縱不黃金銷鞞鞞。也勝紫繡踏麻鞋。

讀戰國策

雞連六國歎從人。蠶食諸侯笑暴秦。上黨禍階朝作厲。長平戰血夜生燐。苟全田建松間命。寧恤燕丹劍下身。抖盡祖龍囊底智。咸陽回首亦成塵。

春日寄賽將軍

雨後教場春草青，一鞭飛馬似流星。畫旗展綵明金字，花箭翻香落粉翎。虎豹韜鈴新戰陣，麒麟閱閱舊儀型。霸吳平楚男兒事，早立奇勳待我銘。

東衛處士

傍山依水作幽居，未減南陽諸葛廬。卓行自成高士傳，浮榮不用辟書除。烏絲小楮春題畫，青簡長編夜著書。愧我紅塵走官馬，計偕空詣漢公車。

詠櫻桃

海西四月櫻桃熟，曾醉吳郎珠樹叢。梗落金刀紅玉潤，彩搖華月赤瑛空。香唇每笑歌姬淡，小字深憐妒妾同。客裏薦新家廟遠，聖恩只憶大明宮。

題衛王畫

拄天直壁插山椒，拍挾晴空老氣驕。蒼隼沒雲猶可望，野煙著水未全消。樓臺落日秋蕭索，林麓西風晚寂寥。安得樂郊真似畫，日扶藜杖上溪橋。

大都書所見

桃皮劈篋響秋空，鵝項琵琶奏晚風。西馬長腰馱赤豹，北駝穹背掛元熊。太平有象歸文德，大獵無忘示

武功赫赫帥臣專獵狩。聖恩聞已賜彤弓。

元會

天眷聖明開大業。班分文武列賢寮。股肱元首歌虞舜。富壽多男祝帝堯。萬國山河歸正統。百王禮樂聚清朝。瓊樓玉殿攢金闕。紫霧紅光隔絳霄。

白塔寺

紺殿瑤臺列梵區。舞鸞翔鳳繞階除。黃金飛出栴檀像。白馬馱來貝葉書。七寶浮屠珠結繖。五龍交椅玉爲輿。法音一派鈞天起。萬籟聲高振碧虛。

登齊政樓

層樓拱立夾通衢。鼓奏鐘鳴壯帝畿。萬古晨昏常對待。兩九日月自雙飛。壽山樹色籠佳氣。御水波光蕩落暉。手把闌干頻北望。心如征鴈獨南歸。

渡江懷宣元杰

北固山前春水生。瓜州渡頭人不行。火殃夜落金山寺。海氣朝吞鐵甕城。萬古不磨青嶂老。六朝都逐大江傾。伯符公瑾今何在。狼石雄談最憶卿。

春日

彩毫漆點新蟬翼。奚墨雲磨舊馬肝。月落小窗瓊珮冷。夢回孤枕玉釵寒。茶藤架雪香生宴。么鳳籠煙醉倚闌。笑我一春長閉戶。柳花填巷臥袁安。

賦松江漁者

短棹輕舟白髮翁。往來常在柳西東。一篙綠水孤篷外。九點青山落照中。不盡春光楊柳雨。無邊秋興蓼花風。鷗夷盛酒羊裘臥。表海封齊莫論功。

早春

二月葑門河水新。落花芳草暗平津。綵雲不作青樓夢。黃鳥空鳴綠樹春。風暖畫旗開甲第。日斜歸馬趁行輪。紛紛冠蓋埃塵裏。誰問城東樹屋人。

悼惠師

八十一年塵夢醒。佛臺歸座九蓮青。金銀氣斂心無礙。衣鉢囊空性始靈。舍利自飛阿育塔。茶毘不損貝多經。春風草草新阡下。日有門徒打墓銘。

贈軒轅道士

子是彌明幾代孫。姓名乃使世間聞。坐驚星斗生雷劍。動使煙霞繞練裙。月裏白鸞招子晉。山前青虎借茅君。長春酒熟朝朝醉。高枕瑤琴臥碧雲。

王氏小桃源

一簇林塘隱者栖。天然畫出武陵溪。循牆流水灣灣曲。匝屋桃花樹樹低。春雨閉門山犬吠。炊煙隔竹午雞啼。幽深直待秦人避。但恐漁郎自路迷。

題宋仲溫墨蹟

江南羽化張天雨。海上神交宋仲溫。楷法鍾繇稱獨步。草臨皇象已專門。折釵未墜風前髮。屋漏先垂雨後痕。寄謝墨池諸俊彥。蚓蛇雞鶩莫須論。

留別賽景初

暖雲將雨驟陰晴。四月羅衣尙未成。萬點愁心飛絮影。五更殘夢賣花聲。方空越白承恩厚。繡榻諸干照道明。自笑窮途不歸去。空懷漫刺闔閭城。

蘭棘圖

山果羅生何瑣細。幽蘭叢雜愈馨香。寒根壓石垂垂瘦。惡棘侵蹊故故長。甘苦所需同雨露。萌芽餘幾更牛羊。撫圖未用增噓唏。且復呼兒進一觴。

送賽將軍入吳興收集故業

暫歇將軍帳下驄。樓船西入水晶宮。集賢書畫干戈外。公子田園簿籍中。天目諸山皆走北。太湖萬頃獨

朝東不堪重舉新亭歎。地下前王淚血紅。

謝惠墨

南唐五季久絕跡。老潘入井法不傳。太史鴻文今有價。故家豹棗定誰捐。篆成屈玉雙釵並。詩寫聯珠九曲穿。直待枋頭修史了。卻須佳傳贈陳元。

臨安軍前

寂歷荒城逼野蒿。昔人事業已徒勞。雁將秋色催歸馬。楓引霜花入戰袍。地阻東南鄉信遠。天昏西北陣雲高。不堪屢作還家夢。起向西風撫大刀。

畫馬

臆間鱗甲隱龍紋。前立啼雞後犬蹲。天仗威儀猶想見。江都法度尙生存。廢官自寵王毛仲。部校誰奇賀六渾。幾度夜深瞻象緯。可憐房宿至今昏。

王師討徐

相臣虎拜別龍顏。廟算神機指日還。大選五兵開武庫。長驅萬馬下天閑。投鞭足竭長河水。磨刃能平九里山。爲報龐助先授首。黃樓土色夜來殷。

次葉秀才韻

丈夫有淚濯氛埃。莫作尋常兒女哀。帝室河山初不改。令公模府幾時開。仰瞻北斗低金闕。遙望中天近玉臺。安得吳兒八千騎。爲君縛取衛王來。

黃大癡畫

樹裏人家似輞川。塢中草木類平泉。下方官府自徵稅。何處漁郎來繫船。百折澄溪東走海。萬尋直壁上摩天。筆端點點皆清氣。誰道癡翁不解仙。

書憤

離宮金翠化爲煙。土宇凋零舊幅員。豈是相君酣醉日。況逢天子中興年。武關兵馬全無信。潯水文章久未鐫。白髮詩翁憂帝室。長歌泣血拜啼鵑。

良宵

良宵情緒不堪題。立遍闌干意欲迷。鐵撥忽敲壺口破。金刀頓翦燭心齊。綠分楊柳湘簾細。紅壓櫻桃斗帳低。彷彿第三橋畔宿。月明珠樹夜烏啼。

次韻江鍊師

道人容貌似嬰孩。手扶天罡步斗魁。拄杖神遊卻月觀。渡風夜上鍊丹臺。劍橫秋水蒼龍化。衣染春雲玉女裁。聞道蓬萊隔東海。芙蓉三朵翠成堆。

次韻孫墳

十年戎馬動成羣。勢比連雞未解紛。天狗星流聲震地。蚩尤旗卷氣垂雲。仆碑誰讀平淮頌。誑鬼人傳詛楚文。安得爾家賢討虜。雄談狼石坐宵分。

花洞

花洞花開雲錦鋪。看花遊女白如荼。素羅便面歌紅拂。紫障呆恩舞綠珠。楊柳露乾方作態。海棠春困未全蘇。畫船來往仙潭闊。人在銷金十里湖。

李遵道枯木

葉蠹心枯勢欲僵。火焚雷剪類空桑。強扶朽質排元氣。力挽旁枝障太陽。鬼狀虺隤生意少。龍鱗剝落本根傷。薊邱深意吾知得。珍重君王別棟梁。

次韻贈張省史從軍南征

震天金鼓紫駝驕。卓犖連珠畫斗杓。甲馬魚鱗開曉日。錦袍花萼上春潮。桃榔雨暗湯泉溢。茉莉風喧海瘴消。幕下何人專草檄。共誇謀議得張昭。

玉筍集卷十

五言絕句

次韻虞閣老題柯丹邱畫

夜雨幽篁密。晨霜落木多。月明商女恨。江冷越人歌。

天馬二首

蕃方皆貢馬。聖意本求書。縱使行千里。終當駕鼓車。
今代佛郎國。龍媒進上都。後斯能作頌。周朗善爲圖。

董羽臥沙龍

仰閣青牛首。橫搯赤鯉腮。輕雷驚不起。直待早潮來。

宮廊雪霽圖

樹影上階除。宮廊雪霽初。門前有鹹草。倚柱待羊車。

宮怨

寶索懸珠珮。霜花上玉墀。井桐紅似錦。不寫御溝詩。

畫扇

萬木落秋風。雙柑氣勢雄。鱗峒一卷石。留取補天空。

陸垣畫

山果綴丹實。霜林開畫屏。美人湘水上。誰與拾秋馨。

醉歸

五柳低垂地。孤松俯壓檐。門生舁竹轎。往取醉陶潛。

士女圖

孔雀當階舞。芙蓉夾路生。玉人誰作伴。相對坐調笙。

葡萄

天上金盤露。人間玉樹秋。長卿消渴久。明日再扶頭。

竹石

春來不肯晴。綠苔遍頑石。曉起看新梢。一夜高一尺。

柯丹邱枯木竹石圖

粲粲翡翠斂。歷歷珊瑚樹。露涼羅月高。湘魂不知處。

梁楷鬼

既竊寧王笛。又盜妃子扇。雖曰情狀深。終爲端士見。

桂花便面

冷露下山阿。寒光溼秋宇。天香鏡中來。照見嫦娥語。

畫竹

涼風徐徐來。六月靜如水。但恐瀟湘姿。不堪美人倚。

秋棠

秋棠類春櫻。粲粲耀緋綠。可憐竹與蘭。零落在空谷。

畫扇

渴龍飲清江。江水皆倒立。風雨滿山來。石楠半身溼。

溫日觀葡萄

銀鬚懸紫駝。驛騎曉來急。西風吹竹窗。一夜鮫人泣。

盛子昭畫

秋樹半著霜。水落石巉巖。寄謝清渭翁。釣得營邱否。

八仙花

手折八仙花。贈余十日別。春光不待人。歸來已成雪。

六言絕句

採桑圖

道旁人畫秋胡。桑間誰是羅敷。莫戀懷中金餅。倚門家有嚴姑。

瘦馬圖

神駿豈在澤毛。力強不妨少肉。仗前無限豐駒。徒糜君王芻粟。

湖上二首

綠蓋遮籠茵。蒼碧欄搖蕩。鴛鴦。卷畫船中鼓板。銷金鍋裏時光。紅杏牆頭粉蝶。綠楊窗外黃鸝。何處春光最好。踏青人在蘇隄。

夜月

夜月小樓筆簾。東風深院琵琶。料理宿醒未了。春光又在鄰家。

冠蓋

冠蓋花間玉驄。綺羅簾下香風。一體傷春病酒。奈何轉眼西風。

問鵲

寒食清明已過。牡丹芍藥將開。爲問簷前喜鵲。遠人何日歸來。

楊妃睡起圖

琥珀梳空荔子。龍香撥冷琵琶。問道三郎何在。今朝早仗南衙。

自歎

臺閣荒涼鼎鐘。家山孤負雲松。徧地煙塵豹虎。何年雷雨蛟龍。

宮體

綺疏面面玲瓏。銜牙步步丁東。金尾屏風孔雀。銀牌絲線梧桐。

早春湖上

玉驄草鞭平田。油幕風輕畫船。燕子斂頭春勝。梨花院裏秋千。

軍士

黃犢草肥易牧。雕弓雪冷難彎。比似馬鞍作枕。何如牛背看山。

陶淵明

二頃半田種秫。八十餘日居官。稍帶收成解印。也教妻子心寬。

題畫

遠岫層層何處。矮房簇簇誰家。煙樹夕陽歸鳥。清溪古渡橫槎。

寄王祖孝

許昌城中種菜。宏農道上騎牛。笑我雨宵剪燭。憐君月夜凭樓。

漁翁圖

細雨斜風箬笠。淡煙殘月篷窗。意足半篙春水。夢回一枕秋江。

七言絕句

秋夜書所見

大星殞地聲動屋。明月入樓光滿牀。起看北斗正半夜。白氣繞城如女牆。

長蘆鎮書客況

旋風捲簾楹拄天。長河斷流冰膠船。擬隨富翁同守凍。只有一句沽酒錢。

聽松圖

洪厓羽士氅衣輕。脚踏青鸞下玉京。直壁倒懸秋萬尺。盤陀石上聽松聲。

早春寄雅宜山人

天平東下瞰靈巖。一派雲巒黑萬杉。鴛燕未來花柳瘦。欲於何處試春衫。
贈菊田道人

秋雨開田四十雙。陶家舊徑遂成荒。中年眼角方如口。始信菊花滋味長。
鄭生長揖圖二首

淮南黥王乃可傲。高陽酒徒何必輕。駕馭英雄須有術。不宜如此見書生。
踞牀洗足非爲慢。長揖軍門也不多。大抵英雄皆坦率。子陽罄折竟如何。
許將軍郊居

東青門東草地平。曉來濃霜如雪明。細弓膠勁不須焙。手撚鶻頭尋雁聲。
簡竇彥南

二十四橋風月清。瓊花觀裏坐吹笙。金盤露冷凝脂滑。一夜新霜睡不成。
赤壁圖

白露橫江山月小。柔櫓啞啞聲渺渺。船尾一聲吹洞簫。回首黃州天已曉。
竹蝶圖

落盡春紅春夢熟。平沙小院窗中綠。美人睡起背東風。蛺蝶飛來上修竹。

子陵獨釣圖

天上故人赤伏符。羊裘大澤隱狂奴。絕憐一線桐江月。不換當年諫大夫。

佘山道中

老樹排雲石徑斜。炊煙起處有人家。一聲啼鳥春成夏。新綠滿汀浮柳花。

脊鶴圖

曉來霜重兼葭溼。枯楊颯颯西風急。鄰家兄弟政鬪爭。不見脊鶴原上立。

吳仲圭畫荔枝障

知味何人似蔡襄。方紅陳紫與誰嘗。七閩塵障南來使。腸斷薰風十八娘。

弔寶維賢參政

紫團犀鎊新公服。鐵馬金戈舊戰場。倘使僵尸包馬革。也勝廟食水仙王。

鐵笛道人遺筆箴七絕

朔客有以箴箴遺道人者。道人以送余。且將以詩。仍半五溪馮溥之名也。

贊皇太尉有新題。不減吳江與會稽。最憶秋山霜月夜。卷蘆一曲醉如泥。
朔客蒼頭一尺髭。酒酣氣熱卷蘆吹。花娘不展徘徊拜。虛負王孫五字詩。

長安城裏紫葡萄。關塞遺聲透月高。一十八星清竅冷。無人喚起薛陽陶。
南徐江上月黃昏。誰嚼寒爐對酒樽。滿耳胡風全不競。空煩公主嫁烏孫。
漢家鹵簿最多儀。夾駕雙弧武騎隨。不似酒邊呼李袞。靜攜九漏月中吹。
一曲邊聲繞月樓。滿天兵氣似并州。塞鴻不管關山怨。閒卻吹螺小比邱。
國手傳聞張野狐。清歌最善月中蘆。風前靜洗箜篌耳。別畫明皇按舞圖。

冬至古城簡楊馮二先生二首

徧地妖氛起砲車。十年戎馬未寧居。瑞雲一朵壺中境。留作先生魯觀書。
昨夜三更雨似酥。新陽地底動葭莩。憑誰蚤起書雲物。梓慎曾爲魯大夫。

留別盛經歷

重關複道固高深。戰勝尤宜苦用心。莫倚昔曾擒李密。賊徒今不走桃林。

方頤

方頤大口玉顏紅。七尺長身猛似熊。偏得將軍傳武藝。闕街飛馬背開弓。

題畫

晴川渺渺停春水。怪石巖巖插亂山。最愛夕陽煙寺裏。千株古木一僧閒。

釣魚圖

水痕新落露灘沙。葉葉丹楓映晚霞。六尺釣竿三尺線。先生意不在魚蝦。

趙集賢枯木竹石

槎牙老樹響天風。寂歷幽篁泣露叢。惆悵玉堂舊公子。故家陵廟月明中。

戲歌兒

開門落籍丁文椀。教子讀書隨意歌。湖上水雲樓上月。如今贏得夢魂多。

達實巴圖爾平章復許州

狡計爭功笑子都。登城不在奪熬弧。少留天使須臾飯。坐看將軍入許鄒。

贈日者

玉節旌旗照帥符。虎爭龍鬪正吞屠。煩君勇啓談天口。說破當今推祕圖。

贈僧聲無像

蚩尤天狗正猙獰。五緯紛紜起鬪爭。一點圓靈無認處。六符誰問泰階平。

西窗三首

西窗大樹遮夕陽。南樓小溪生晚涼。青天無雲鳥飛絕。白蘋起風蟬噪長。

寒瓜激齒冰雪香。白石枕頭魂夢長。枇杷葉大暑光薄。梧桐生子秋意涼。
赤日欲落又未落。清風忽來又不來。溪邊屬玉成對立。水上藕花相閒開。

跋

右玉筍集十卷。元張憲撰。案憲字思廉。山陰人。家玉筍山。因以爲號。仕張仕誠。爲樞密院都事。吳平後。變姓名。走杭州。寄食報國寺。以死。明史文苑傳。附載陶宗儀傳末。考朱竹垞靜志居詩話。稱宗儀入明。自署其居爲小栗里。雖好爵未廢。而集中如乙卯人日紀行。入都門。早朝。聞皇太孫卽位等詩。可以不作。可以不作而作之。宜錄入明詩矣。玉筍集固無之也。其心迹殆迴不侔矣。

四庫提要。已著錄。稱卷首有楊維禎。周砥。戴良。及安成劉鈺四序。又孫大雅玉筍生傳及楊基玉筍生傳。書後各一篇。而此鈔本俱佚之。僅存劉鈺一序。顧俠君元詩選。稱思廉師事楊廉夫。尤多懷古感時之作。劉鈺一序。可稱知己。又靜志居詩話。稱鐵厓弟子。才鋒犀利。莫過張思廉。讀其長歌。波瀾橫溢。弟子不必不如師也。錄其詩於明詩綜外臣卷內。多至三十二首。所以推挹之者亦至。其風骨實迥異於可閑老人也。乃可閑嘗策張仕誠之必敗。嘗作詩刺之云。一陣東風一陣寒。芭蕉長過石闌干。只消幾箇蓼騰醉。看得春光到牡丹。思廉豈不如其明哲。閱其詩。悲憤無端。願竟不能自拔。亦可哀已。詩於七言古外。復分歌吟。長短句。諸名目。微嫌破碎。以原本如是。卽仍之。咸豐辛亥。穀雨令節。南海伍崇曜謹跋。



編主五雲王

編初成集書叢

集 笥 玉

中華民國二十四年十二月初版

撰 者 張 憲

發 行 人 王 雲 五
上海河南路

印 刷 所 商 務 印 書 館
上海河南路

發 行 所 商 務 印 書 館
上海及各埠

*C六二二七

盛

七

集



| |
|------|
| 3 |
| 1 |
| 2265 |